


John Carter Brown.



3rd copy.



The Table is wanting in this Vol.

Each copy blank etc.

RELATION

DE CE QVI S'EST-PASSE'

EN LA

NOVVELLE FRANCE,

EN L'ANNE'E 1634.

Enuoyée au

R. PERE PROVINCIAL

de la Compagnie de IESVS

en la Prouince de France.

*Par le P. Paulle Ieune de la mesme Compagnie,
Superieur de la residence de Kebec.*



A PARIS,

Chez SEBASTIEN CRAMOISY, Imprimeur
ordinaire du Roy, rue S. Jacques, aux Cicognes.

M DC. XXXV.

AVEC PRIVILEGE DV ROY.

JOHN CARTER BROWN.




Extrait du Priuilege du Roy.

PAR Grace & Priuilege du Roy, il est permis à Sebastien Cramoisy, Imprimeur ordinaire du Roy, marchand Libraire Iuré en l'Vniuersité de Paris, d'imprimer ou faire imprimer vn liure intitulé, *Relation de ce qui s'est passé en la Nouvelle France en l'année mil six cens trente-quatre, Enuoyée au Reuerend Pere Barthelemy Iaquinot, Prouincial de la Compagnie de IESVS en la Prouince de France, Par le P. Paul le Jeune de la mesme Compagnie, Superieur de la Residence de Kebec: & cependant le temps & espace de neuf années consecutives. Avec defenses à tous Libraires & Imprimeurs d'imprimer ou faire imprimer ledit liure, sous pretexte de desguisement, ou changement qu'ils y pourroient faire, à peine de confiscation, & de l'amende portée par ledit Priuilege. Donné à Paris le 8. Decembre mil six cens trente-quatre.*

Par le Roy en son Conseil,

V I C T O N .





RELATION
DE CE QVI S'EST
PASSE' EN LA NOVVELLE
FRANCE SVR LE GRAND
Fleuve de S. Laurens en l'année
mil six cens trente-quatre.



ON R. PERE,

Les Lettres de vostre Reuerence, les témoignages de son affection pour la cōuersion de ces peuples, les effets de son amour en nostre endroit, la venue de nos Peres qu'il luy a pleu nous enuoyer pour renfort cette année, les desirs qu'ont vn si grand nombre des nostres de venir en ces contrées sacrifier leurs vies & leurs travaux pour la gloire de Nostre Seigneur: Tout cela ioinct avec le bon succez qu'eurent

A

2 *Relation de la nouvelle France,*

les vaisseaux l'an passé à leur retour , & l'heureuse arriüée de ceux qui sont venus cette année , avec le zele que tesmoignent Messieurs les associez de la Compagnie de la nouvelle France pour la conuersion de ces peuples barbarres. Tous ces biens ioincts ensemble venäs fondre tout à coup dans nos grands bois par l'arriüée de Monsieur du Pleissis General de la flotte qui nous met däs la iouïssance des vns, & nous apporte les bonnes nouuelles des autres, nous comblent d'vne consolation si grande, qu'il me seroit bien difficile de la pouuoir bien expliquer : Dieu en soit beny à iamais , si sa bonté continuë de se respan-dre sur ces Messieurs , comme nous l'en prions de toute l'estenduë de nostre cœur, tant d'ames plongées dans vne nuit d'erreur qui dure depuis vn si long-temps, verront en fin le iour des veritez Chrestiennes : Et nostre bon Roy , Monseigneur le Cardinal , Messieurs les Associez , Monsieur le Marquis de Gamache grand appuy de nostre Mission & quantité d'autres , par la faueur desquels le Sang du Fils de Dieu leur sera vn iour appliqué, auront la gloire & le merite d'auoir contribué à vne si sainte oeuvre.

en l'année 1634.

3

Je distingueray la Relation de ceste année par chapitres, à la fin desquels ie mettray vn journal des choses qui n'ont autre liaison que la suite du temps auquel elles sont arriuées. Tout ce que ie diray touchant les Sauvages, ou ie l'ay veu de mes yeux, ou ie l'ay tiré de la bouche de ceux du pays, nommément d'un vieillard fort versé dans leur doctrine, & de quantité d'autres avec lesquels i'ay passé six mois peu de iours moins, les suiuant dans les bois pour apprendre leur langue. Il est bien vray que ces peuples n'ont pas tous vne mesme pensée touchant leur creance, ce qui fera paroistre vn iour de la contrariété entre ceux qui traicteront de leurs façons de faire.

Des bons deportemens des François.

CHAPITRE I.

NOus auons passé cette année dans vne grande paix & dans vne tres-bonne intelligence avec nos François. La sage conduite & la prudence de Monsieur de Champlain Gouverneur de Ke-

A ij

4 *Relation de la nbuuelle France,*
bec & du fleuve saint Laurens qui nous
honore de sa bien-veillance, retenant vn
chacun dans son deuoir, a fait que nos pa-
roles & nos predicatiōs ayent esté bien re-
ceuës, & la Chappelle qu'il a fait dresser
proche du fort à l'honneur de nostre Da-
me, a donné vne belle commodité aux
François de frequenter les Sacremens de
l'Eglise, ce qu'ils ont fait aux bonnes Fe-
stes de l'année, & plusieurs tous les mois
avec vne grande satisfaction de ceux qui
les ont assiste. Le fort a paru vne Aca-
demie bien réglée, Monsieur de Champlain
faisant faire lecture à sa table le matin de
quelque bon historien, & le soir de la vie
des Saints; le soir se fait l'examen de con-
science en sa chambre & les prieres en
suirte qui se recitent à genoux. Il fait son-
ner la salutation Angelique au commen-
cement, au milieu & à la fin du iour sui-
uant la coustume del'Eglise. En vn mot
nous auons subiect de nous consoler voy-
ans vn chef si zelé pour la gloire de No-
stre Seigneur & pour le bien de ces Mes-
sieurs.

Croiroit-on bien qu'ils'est trouué vn de
nos François en Canada qui pour contre-
carrer les dissolutions qui se font ailleurs

en l'année 1634.

5

au Carnauai, est venu le Mardy gras dernier, pieds & testé nuë sur la neige & sur la glace depuis Kebec iusques en nostre Chappelle, c'est à dire vne bonne demie lieuë, ieusnant le mesme iour pour accomplir vn vœu qu'il auoit fait à Nostre Seigneur, & tout cela sans autres tesmoings que Dieu & nos Peres qui le rencontrent.

Pendant le saint temps de Carefme, non seulement l'abstinence des viandes defenduës & le ieusne s'est gardé, mais aussi tel s'est trouué qui a fait plus de trente fois la discipline, deuotion bien extraordinaire aux soldats & aux artisans tels que sont icy la plus part de nos François.

Vn autre a promis d'employer en ceures pies la dixiesme partie de tous les profits qu'il pourra faire pendant tout le cours de sa vie. Ces petits eschantillons font voir que l'Hyuer n'est pas si rude en la nouuelle France qu'on n'y puisse recueillir des fleurs du Paradis.

Ie mettray en ce lieu, ne scachant où le mieux placer ailleurs, ce qu'un de nos François tres-digne de foy & recogneu pour tel, nous a raconté de Iacques Michel Huguenot qui amena les Anglois en

6 *Relation de la nouvelle France,*
ce païs cy: Ce miserable la veille de sa
mort ayant vommy cōtre Dieu & contre no-
stre sainct Pere Ignace mille blasphemes,
& s'estant donné cette imprecation qu'il
vouloit estre pendu s'il ne donnoit vne
coupple de soufflets auant la nuict du iour
suiuant à vn de nos Peres qui estoit pris
del'Anglois, vomissant contre luy des in-
iures fort mesleantes, il fut surpris bien-
tost apres d'une maladie qui luy osta toute
cognoissance & le fit mourir le lendemain
comme vne beste: Quatre circonstances de
ce rencontre donnerent de l'estonnement
aux Huguenots mesmes, la maladie qui le
prit quelques heures apres ses blasphemes,
l'erreur des Chirurgiens qui estoient en
nombre, lesquels donnerent des remedes
soporiferes à vn letargique, son trespas si
soudain & sans cognoissance, expirant sans
qu'aucun s'en apperceust quoy qu'il y eust
six hommes aupres de luy, la fureur des
Sauuages enuers son corps qui le deterre-
rent & le pendirent selon son impreca-
tion, puis le ietterent aux chiens: Les An-
glois qui estoient dans le fort de Kebec
ayant sceu cette hystoire tragique, dirent
tous estonnez, que si les Iesuites scauoient
tout cela qu'ils en feroient des miracles.

en l'année 1634. 7

Or nous le ſçauons maintenant & cependant nous n'en ferons ny prodiges ny miracles : mais nous dirons ſeulement qu'il ne fait pas bon blaſphemer contre Dieu ny contre ſes ſaincts , ny ſe bander contre ſon Roy trahiſſant ſa patrie : Mais venons maintenant à nos Sauuages.

*De la conuerſion , du Bapteſme & de
l'heureuſe mort de quelques
Sauuages.*

CHAPITRE II.

Quelques Sauuages ſe ſont faiſts Chreſtiens cette année, trois ont eſté baptizez ceſt Hyuer en mon abſence, en voicy les particularitez toutes pleines de conſolation que nos Peres m'ont raconté à mon retour.

Le premier eſtoit vn ieune homme nommé Saſouſmat aagé de 25. à 30. ans, les François le ſurnommoient Marſoler : Le ieune homme entédant vn iour vn Truchement parler des peines d'Enfer & des recompensés du Paradis, luy dit, mene

8 *Relation de la Nouvelle France,*

moy en France pour estre instruiſt, autrement tu reſpondras de mon ame, donc eſtant tombé malade il fut plus aiſé de l'induire à ſe faire Chreſtien, le Pere Brebœuf m'a donné de luy ce memoire.

„ Ayant appris la maladie de ce ieune hōme
„ ie le fus viſiter, & le trouuay ſi bas qu'il auoit
„ perdu le iugemēt, nous voila dōc dans
„ vn regret de ne le pouuoir ſecourir, ce qui
„ fit prédre reſolution à nos Peres & à moy
„ de preſenter à Dieu le lendemain le Sacrifice
„ de la Meſſe à l'honneur du glorieux S. Ioseph Patron de cette nouuelle
„ France, pour le ſalut & conuerſion de ce
„ pauvre Sauuage: à peine auions nous quitte l'Autel
„ qu'on nous vint aduertir qu'il eſtoit rentré en ſon bon ſens,
„ nous le fuſmes voir, & l'ayans ſondé nous le trouuaſmes
„ remply d'un grand deſir de receuoir le S. Baptesme,
„ nous differaſmes neantmoins quelques iours pour luy
„ donner vne plus grande inſtruction. En fin il m'en
„ uoya prier par noſtre Sauuage nommé Manitougatche,
„ & ſurnommé de nos Frères la Naſſe, que ie l'allasſe baptizer,
„ diſant que la nuit precedente il m'auoit
„ veu en dormant venir en ſa Cabane pour luy
„ conferer ce Sacremēt, & qu'aussi-toſt

en l'année 1634.

que ie m'estois assis aupres de luy que
rout son mal s'en estoit allé, ce qu'il me
confirma quand ie le fus voir : ie luy refu-
say neantmoins ce qu'il demandoit pour
animer dauantage son desir, si bien qu'un
autre Sauvage qui estoit present ne pou-
uant souffrir ce retardement, me deman-
da pourquoy ie ne le baptizois point puis
qu'il ne falloit que ietter vn peu d'eau sur
luy & que s'en estoit fait, mais luy ayant
reply que ie me perdrois moy mesme si
ie baptizois vn infidelle & vn mécreant
mal instruit : le malade se tournant vers
vn François, luy dit, Matchounon n'a
point d'esprit, c'est ainsi que s'appelloit
cet autre Sauvage, il ne croit pas ce que
dit le Pere, pour moy ie le crois entiere-
ment. Sur ces entrefaites les Sauvages
voulans décabaner & tirer plus auât dans
les bois, Manitougatche qui commēçoit à
se trouuer mal, nous vint prier de le rece-
voir & le pauvre malade aussi en nostre
maison, nous prîmes resolution d'auoir
soin des corps, pour aider les ames que
nous voyons bien disposées pour le Ciel.
On met dōc sur vne traine de bois ce bon
ieune homme, & on nous l'amene sur la
neige, nous le receuons avec amour &

10 *Relation de la Nouvelle France,*
,, l'accommodons le mieux qu'il nous est
,, possible, luy tout remply d'aise & de con-
,, tentement de se voir avec nous, tesmoi-
,, gna vn grand desir d'estre baptizé, & de
,, mourir Chrestien. Le lédemain qui estoit
,, le 26. de Ianuier estant tombé dans vne
,, grāde syncope nous le baptizasmes, croyās
,, qu'il s'en alloit mourir, luy donnans le
,, nom de François en l'honneur de S. Fran-
,, çois Xavier, il reuint à soy, & ayant appris
,, ce qui s'estoit passé, il se monstra plein de
,, ioye d'estre fait Enfant de Dieu, s'entre-
,, tenant tousiours iusques à la mort, qui fut
,, deux iours apres, en diuers actes que ie
,, luy faisois exercer tantost de Foy & d'Es-
,, perance, tantost d'Amour de Dieu & de
,, regret de l'auoir offensé, il prenoit en ce-
,, la vn plaisir fort sensible, & recitoit tout
,, seul avec de grands sentimens ce qu'on
,, luy auoit enseigné, demandant vn iour
,, pardon à Dieu de ses pechez, il s'accusoit
,, tout haut soy-mesme comme s'il se fust
,, confessé, puis la memoire luy manquant,
,, Enseigne moy (me disoit-il) ie suis vn
,, pauvre ignorant, ie n'ay point d'esprit,
,, suggere moy ce que ie dois dire; vne autre
,, fois il me pria de luy ietter de l'eau beniste
,, pour l'aider à auoir douleur de ses pechez,

cela m'estonna, car nous ne luy auions
pas encores parlé de l'vsage de cette eau,
nous ayant inuité à chanter aupres de luy
quelques prieres de l'Eglise, nous le voyōs
pendant ce sainct exereice les yeux esle-
uez au Ciel avec vne posture si deuote
que nous estions tous attendris, admirans
les grâdes misericordes que Dieu operoit
dedans cette ame, qui en fin quitta son
corps fort doucement le 28. de Ianuier
pour aller iouir de Dieu.

Quand la nouuelle de sa conuerſion &
de sa mort fut ſceue de nos François à Ke-
bec, il y en eut qui ietterent des larmes de
ioye & de contentemens, beniffans Dieu
de ce qu'il acceptoit les premices d'une
terre qui n'a presque porté que des espi-
nes depuis la naissance des ſiecles.

Il arriua vne chose biē remarquable peu
d'heures apres sa mort, vne grāde lumiere
parut aux fenestres de nostre maison, s'é-
levant & s'abbaiſſant par trois fois, l'un de
nos Peres vid cēt esclat, & plusieurs de nos
hommes qui sortirent incontinent, les vns
pour voir si le feu n'estoit point pris en
quelque endroit de la maison, les autres
pour voir s'il esclairoit, n'ayans trouué au-
cun vestige de cette flamme ils creurent

que Dieu declaroit par ce prodige la lumiere dont iouïssoit cette ame qui nous venoit de quitter. Les Sauvages de la Cabane du defunct virent dans les bois où ils s'estoient retirez cette lumiere, ce qui les espouuenta d'autant plus qu'ils creurent que ce feu estoit vn presage d'une future mortalité en leur famille.

I'estois pour lors (moy qui escriis cecy) à quelques quarante lieuës de Kebec dās la cabane des freres du defunct, cette lumiere s'y fit voir à mesme temps & à mesme heure, comme nous l'auons remarqué; depuis le Pere Brebœuf & moy confrontans nos memoires, & mon hoste frere du trespasſé l'ayant apperceuë sortit dehors tout espouuanté, & la voyant redoubler s'escria d'une voix si estonnante, que tous les Sauvages & moy avec eux fortismes de nos cabanes : ayant trouué mon hoste tout perdu ie luy voulus dire que ce feu n'estoit qu'un esclair, & qu'il ne falloit pas s'espouuanter, il me repartit fort à propos que l'esclair paroïſſoit & disparoïſſoit en vn moment, mais que cette flāme s'estoit pourmenée deuant ses yeux quelque espace de tēps: de plus, as-tu ia mais veu, me dit-il, esclairer ou tonner dans vn froid si

cuisant comme est celuy que nous ressentons maintenāt. Il est vray qu'il faisoit fort froid, ie luy demanday ce qu'il croyoit dōs de ces feux, c'est, me fit-il, vn mauuais augure, c'est, vn signe de mort, il m'adiousta que le Manitou ou le diable se repaissoit de ces flammes.

Pour retourner à nostre bien-heureux defunct, nos Peres l'enterrerent le plus solemnellemēt qu'il leur fut possible, nos François s'y trouuans avec beaucoup de deuotiō. Manitougatche nostre Sauuage ayant veu tout cecy en outre, considerant que nous ne voulions rien prendre des hardes ou des robbes du trespasſé, lesquelles il nous offroit, il resta si edifié & si estonné qu'il s'en alloit par les cabanes des Sauuages, qui vindrent bien-tost apres à Kebec, raconter tout ce qu'il auoit veu, disant que nous auions donné toute la meilleure nourriture que nous eussions à ce pauvre ieune homme que nous en auions euvn soin cōme s'il eust esté nostre frere, que nous nous estions incommodez pour le loger, que nous n'auions rien voulu prendre de ce qui luy appartenoit, que nous l'auions enterré avec beaucoup d'honneur. Cela en toucha si biē quelques-vns,

14 *Relation de la nouvelle France,*
notamment de sa famille, qu'ils nous amenèrent sa fille morte en travail d'enfant pour l'enterrer à nostre façon, mais le P. Brebœuf les rencontrant leur dit, que n'ayât pas esté baptizée nous ne la pouuions mettre dans le Cimetiere des enfans de Dieu. De plus sçachant qu'ils font ordinairement mourir l'enfant quand la mere le laisse si ieune, croyans qu'il ne fera que languir apres son deceds, le Pere pria Manitouchatche d'obuier à cette cruauté, ce qu'il fit volontiers, quoy que quelques-uns de nos François estoient desia resolu de s'en charger au cas qu'on luy voulust oster la vie.

Le second Sauuage baptizé a esté nostre Manitouchatche autrement la Nasse, i'en ay parlé dans mes Relations precedentes, il s'estoit comme habitué aupres de nous auant la prise du pais par les Anglois, commençant à defricher & à cultiver la terre, le mauuais traitement qu'il receut de ces nouueaux hostes l'ayât esloigné de Kebec, il tesmoignoit par fois à Madame Hebert qui resta icy avec toute sa famille qu'il souhaittoit grandement nostre retour. Et de fait si tost qu'il sceut nostre venue il nous vint voir, & se caba-

en l'année 1634. 15

na tout aupres de nostre maison, disant qu'il se vouloit faire Chrestien, nous asseurant qu'il ne nous quitteroit point si nous ne le chassions, aussi ne s'est-il pas beaucoup absenté depuis que nous sommes icy, cette communication luy a fait concevoir quelque chose de nos mysteres. Le seiour qu'a fait en nostre maison Pierre Antoine le Sauvage son parent luy a seruy, dautant que nous luy auõs declaré par sa bouche les principaux articles de nostre creance. O que les iugemens de Dieu sont pleins d'abismes ! Ce miserable ieune homme qui a esté si bien instruit en France s'estant perdu parmy les Anglois, comme i'escriuis l'an passé, est deuenu apostat, renegat, excommunié, athée, valet d'un Sorcier qui est son frere: Ce sont les qualitez que ie luy donneray cy apres parlant de luy : & ce pauvre vieillard qui a tiré de sa bouche infectée les veritez du Ciel, a trouué le Ciel, laissant l'Enfer pour partage à ce renegat, si Dieu ne luy fait de grandes misericordes : Mais suiuanz nostre route, apres la mort de François Sasousmat dont nous venons de parler, ce bon homme ennuyé de n'auoir avec qui s'entretenir: car pas vn de nous ne sçait

16 *Relation de la nouvelle France,*
encores parfaitement la langue, se retira
avec sa femme & avec ses enfans, mais la
maladie dont il estoit desia attaqué, s'aug-
mentant, il presse sa femme & ses enfans
de le ramener avec nous, esperant la mes-
me charité qu'il atoit veu exercer enuers
son compatriote, on le receut à bras ou-
uerts, ce qu'ayant apperceu, il s'escria, ie
mourray maintenant content puis que ie
suis avec vous. Or comme ses erreurs a-
uoient vieilly avec luy, nos Peres reco-
gneurent qu'il pensoit autant & plus à la
santé de son corps qu'au salut de son ame,
tesmoignant vn grand desir de viure, re-
mettant son Baptisme iusques à mon re-
tour, neantmoins comme il s'alloit affoi-
blissant ils souhaitterent de le voir vn pe-
tit plus affectiōné à nostre creance, ce qui
les incita d'offrir à Dieu vne neufuaine
à l'hōneur du glorieux Espoux de la sain-
cte Vierge pour le bien de son ame, le cō-
mencement de cette deuotion fut le com-
mencement de ses volontez plus ardan-
tes, il se monstra fort desireux d'estre in-
struit commençant à mespriser ses super-
stitions, il ne voulut plus dormir qu'il
n'eust au prealable prié Dieu, ce qu'il fai-
soit encores deuant & apres sa refection,
si bien

si bien qu'il diffiera vne fois plus de demie-heure à māger ce qu'ō luy auoit présenté, pource qu'on ne luy auoit pas fait faire la benediction, demandant au Pere Brebœuf qu'il luy fist dire douze ou treize fois de suite pour la grauer en sa memoire. C'estoit vn contentement plein d'edification, de voir vn vieillard de plus de soixante ans, apprendre d'vn petit François que nous auons icy, à faire le signe de la Croix, & autres prieres qu'il luy demandoit. Le Pere Brebœuf voyant que ses forces se diminueient, & que d'ailleurs il estoit assez instruit, luy dit que sa mort approchoit, & que s'il vouloit mourir Chrestien, & aller au Ciel, qu'il falloit estre baptisé. A ces paroles il se monstra si ioyeux qu'il se traifna luy mesme comme il peut en nostre Chapelle, ne pouuant attendre que les Peres qui preparoient ce qu'il falloit pour conferer ce Sacrement le vinssent querir: vn de nos François, son Parrain, luy donna le nom de Ioseph. Deuant & pendant son baptisme, qui fut le troisieme d'Auril, le Perel'interrogeant sommairement sur tous les

articles du Symbole, & sur les commandemens de Dieu, il respondit nettement & courageusement qu'il croyoit les vns, & s'efforceroit de garder les autres si Dieu luy rendoit la santé, monstrent de grands regrets de l'auoir offensé: sa femme & l'une de ses filles estoient presentes, celle-là ne pouuoit tenir les larmes & l'autre se monstroir, toute estonnée, admirant la beauté des saintes ceremonies de l'Eglise.

Le retournay de mon hyueruement d'auec les Sauuages, six iours apres son baptisme, ie le trouuay bien malade, mais bien content d'estre Chrestien. Je l'embrassay comme mon frere, bien resioüy de le voir enfant de Dieu, nous continuasmes de l'instruire, & de luy faire exercer des actes des vertus, notamment Theologiques, pendant l'espace de douze iours, qu'il suruescut apres son baptisme.

Les Sauuages desirans le penser à leur mode avec leurs chants, avec leurs tintamarres, & avec leurs autres superstitions, tascherent plusieurs fois de nous l'enleuer iusques là, qu'ils amenèrent vne traine pour le reporter, & l'un de

en l'année 1634. 19

leurs forciers ou iongleurs le vint voir exprés pour le débaucher de nostre creance : mais le bon Neophyte tint ferme, respondant qu'on ne luy parlât plus de s'en aller, & qu'il ne nous quitteroit point, que nous ne l'enuoyassions. Ce n'est pas vne petite marque de l'efficacité de la grace du saint Baptême, de voir vn homme nourry depuis soixante ans & plus, dedans la Barbarie, habitué aux façons de faire des Sauuages, imbu de leurs erreurs & de leurs refueries, resister à sa propre femme, à ses enfans, & à ses gendres, & à ses amis & à ses compatriotes, à ses *Manitouso-uets*, forciers ou iongleurs, non vne fois, mais plusieurs pour se ietter entre les bras de quelques estrangers, protestant qu'il veut embrasser leur creance, mourir en leur Foy & dedans leur maison. Cela fait voir que la grace peut donner du poids à l'ame d'un Sauuage naturellement inconstante.

Enfin, apres auoir instruit nostre bon Ioseph du Sacrement de l'Extreme-Onction, nous luy conferasmes, & iustement le Samedy Saint son ame partit de son corps, pour s'en aller cele

20. *Relation de la nouvelle France,*
brer la feste de Pasques au Ciel. L'un
de ses gendres l'ayant veu fort bas,
estoit demeuré auprès de luy pour voir
comme nous l'enseuelirions apres sa
mort, desirant qu'on luy donnast vne
Castelogne & son petunoir, pour s'en
seruir en l'autre monde: mais comme
il alloit porter la nouuelle de cette
mort à la femme du deffunct, nous
l'enseuelismes à la façon de l'Eglise
Catholique, honorant ses obseques le
mieux qu'il nous fut possible. Mon-
sieur de Champlain pour tesmoigner
l'amour & l'honneur que nous por-
tons à ceux qui meurent Chrestiens,
fist quitter le traual à ses gens, &
nous les enuoya pour assister à l'office,
nous gardasmes le plus exactement
qu'il nous fut possible les ceremonies
de l'Eglise, ce qui agrea infiniment
aux parens de ce nouveau Chrestien;
vne chose neantmoins leur depleut
quand on vint à mettre le corps dans
la fosse, ils s'apperceurent qu'il y auoit
vn peu d'eauë au fonds, à raison que
les neiges se fondoient pour lors &
degouttoient là dedans, cela leur frap-
pa l'imagination, & comme ils font

superstitieux les attrista vn petit. Cet erreur ne sera pas difficile à combattre, quand on sçaura bien leur langue; voila à mon aduis les premiers des Sauvages adultes baptisez, & morts constans en la foy dans ces contrées.

Le troisieme Sauvage baptisé cette année, estoit vn enfant âgé de trois à quatre mois seulement, son Pere estant en cholere contre sa femme, fille de nostre bon Ioseph, soit pource qu'elle le vouloit quitter, ou qu'il estoit touché de quelque ialousie, il print l'enfant & le ietta contre terre pour l'assommer: Vn de nos François suruenant là dessus, & se souuenant que nous leurs auions recommandé de conferer le Baptisme aux enfans qu'ils verroient en danger de mort, au cas qu'ils ne nous peussent appeller, il prit de l'eauë & le baptiza: ce pauvre petit neantmoins ne mourut pas du coup, sa mere le reprit & l'emporta avec soy dans les Isles quittant son mary, qui nous a dit depuis qu'il croit que son fils est mort, sa mere estant tombée dans vne maladie qu'il iuge mortelle.

Le quatrieme estoit fils d'un Sau-

22 *Relation de la nouvelle France,*

nage nommé Khivirineou, sa mere s'appelloit Ouitapimoueu, ils auoient donne nom à leur petit Itaouabissiou ses parens me promirent qu'ils nous l'apporteroient pour l'enterrer en nostre cimetiere au cas qu'il mourut, & qu'ils nous le donneroient pour l'instruire s'il guerissoit, car il estoit malade, faifans ainsi paroistre le contentement qu'ils auoient que leur petit fils receut le saint Baptisme: le le baptisay donc, & luy donnay le nom de Iean Baptiste, ce iour estant l'octaue de ce grand Saint. Le sieur du Chesne Chirurgien de l'habitation, qui vient volontiers avec moy par les Cabanes, pour nous aduertir de ceux qu'il iuge en danger de mort fut son parrain.

Le cinquiesme fut baptizé le mesme iour, son Pere auoit tesmoigné au sieur Oliuier truchement, qu'il eut bien voulu qu'on eust fait à son fils ce qu'on fait aux petits enfans François, c'est à dire qu'on l'eust baptizé, le sieur Oliuier m'en ayant donné aduis i'allay voir l'enfant, ie differay le baptisme pour quelques iours, le trouuant encore plein de vie; en fin le P. Buteux &

moy l'estans retournez voir, nous appellasmes Monsieur du Chesne, qui nous dit que l'enfant estoit bien mal. ie demanday à son Pere s'il seroit content qu'on le baptizât, tres-cōtent (fit-il,) s'il meurt ie le porteray en ta maison, s'il retourne en santé il sera ton fils, & tul'instruiras. Ie le nommé Adrian du nom de son Parrain, il se nommoit auparavant Pichichich, son Pere est surnommé des François Baptiscan, il s'appelle en Sauuage Tchimaouirineou, sa mere Matouetchiouanoueco-ueou. Ce pauvre petit âgé d'environ 8. mois s'enuola au Ciel, la nuit suiuate son Pere ne manqua pas d'apporter son corps, amenant avec soy dix-huict ou vingt Sauuages, hommes, femmes & enfans, ils l'auoient enueloppé dans des peaux de Castor, & par dessus d'un grand drap de toile, qu'ils auoient achepté au magazin, & encore par dessus d'une grande escorce redoublée. Ie déueloppay ce paquet, pour voir si l'enfant estoit dedans, puis ie le mis dans un cercueil que nous luy fismes faire, ce qui agreea merueilleusement aux Sauuages : car ils croyent que l'a-

24 *Relation de la nouvelle France,*

me de l'enfant se doit servir en l'autre monde de l'ame, de toutes les choses qu'on luy donne à son depart, ie leur dis bien que cette ame estoit maintenant dedans le Ciel, & qu'elle n'auoit que faire de toutes ces pauuretez neâtmoins nous les laissâmes faire, de peur que si nous les eussions voulu empêcher, ce que j'aurois peu faire, (car le Pere chanceloit desia,) les autres ne nous permissent pas de baptizer leurs enfans quand ils seroient malades, où du moins ne les apportassent point apres leur mort. Ces pauvres gens furent ravis, voyants cinq Prestres reuestus de surplis honorer ce petit ange Canadien, chantant ce qui est ordonné par l'Eglise, couvrans son cercueil d'un beau parement, & le parsemant de fleurs: nous l'enterrâmes avec toute la solemnité qui nous fut possible.

Tous les Sauvages assistoient à toutes les ceremonies, quand ce vint à le mettre en la fosse, sa mere y mit son berceau avec luy & quelques autres hardes selon leur coustume, & bien-tost apres tira de son lait dans vne pe-

En l'année 1634. 25

titte escuellle d'escorce quelle brusla sur l'heure mesme. Je demanday pourquoy elle faisoit cela, vne femme me repartit, qu'elle donnoit à boire à l'enfant, dont l'ame venoit de ce laic. Je l'instruis la dessus, mais ie parle encores si peu qu'à peine me pût elle entendre.

Après l'enterrement nous fismes le festin des morts, donnans à manger de la farine de bled d'Inde, meslée de quelques pruneaux à ces bonnes gens, pour les induire à nous appeller quand eux ou leurs enfans seront malades. Bref ils s'en retournerent avec fort grande satisfaction, comme ils firent paroistre pour lors, & particulièrement deux iours après.

Le Pere Buteux retournant de dire la Messe de l'habitation, comme il visitoit les Cabanes des Sauvages, il rencontra le corps mort du petit Iean Baptiste qu'on enueloppoit comme l'autre, ses parents, quoy que malades, luy promirent de l'apporter chés nous. On ma desia fait recit (dit la mere) de l'honneur & du bon traictement que vous faictes à nos enfans, mais ie ne

veux point qu'on d'eueloppe le mien. Là dessus le Pere du premier trespaslé luy dist, on ne fait point de mal à l'enfant on ne luy oste point ses robbes, on regarde seulement s'il est dedans le paquet, & si nous ne sommes point trompeurs, elle acquiesça & presenta son fils pour estre porté dans nostre Chapelle, dans laquelle le Pere Buteux nous l'amena en la compagnie de ses parens & des autres Sauvages; nous l'enterrâmes avec les mesmes ceremonies que l'autre, & eux luy donnerent aussi ses petits meubles pour passer en l'autre monde, nous fîmes encores le festin qu'ils font à la mort de leurs gens, bien ioyeux de voir ce peuple s'affectionner petit à petit, aux saintes actions de l'Eglise Chrestienne & Catholique.

Le quatorziesme de Iuillet ie baptizay le sixiesme, c'estoit vne petite Algonquine aagée d'environ vn an, ie ne l'eusse pas si tost fait Chrestienne, n'estoit que ses parens s'en vouloient aller vers leur pays. Or iugeant avec Monsieur du Chesne, que cet enfant traouillé d'une fièvre ethique, estoit en

langer de mort, ie luy conferay ce Sacrement, elle fut appellée Marguerite, en la nommoit en Sauvage *Memichigouchioniscoucou*, c'est à dire, femme d'un European, son Pere se nomme en Algonquain *Pichibabich*, c'est à dire Pierre, & sa mere Chichip, c'est à dire un Canard, ils m'ont promis que cette pauvre petite recouure sa santé qu'ils me l'apporteroient, pour la mettre entre les mains de l'une de nos françoises, comme ce peuple est errant, ie ne sçai maintenant où elle est, je crois qu'elle n'est pas loing du Paradis, si elle n'y est desia.

La septiesme personne que nous auons mis au nombre des enfans de Dieu, par le Sacrement de Baptisme, c'est la mere du petit Sauvage, que nous auons nommé bien-venu; elle l'appelloit en Sauvage *Ourotinououcou*, & maintenant on l'appelle Marie, ce beau nom luy a esté donné, suivant le vœu qu'auoit fait autresfois le R. Pere Charles l'Allement, que la premiere Canadienne que nous baptiserions, porteroit le nom de la sainte Vierge, & le premier Sauvage, celuy de

28 *Relation de la nouuelle France,*

de son glorieux Espoux saint Ioseph. nous n'auions point cognoissance de ce vœu, quand les autres ont esté baptizés. I'espere que dans fort peu de iours il sera entierement accompli: mais pour retourner à nostre nouuelle Chrestienne, l'ayant trouuée proche du fort de nos François, abandonnée des gens, pource qu'elle estoit malade, ie luy demanday qui la nourrissoit, elle me respondit que les François luy donnoient quelque morceau de pain, & que quelques vns reuenans de la chasse, luy iettoient par fois en passant vne tourterelle, si vous voulez cabaner, luy dis-je, proche de nostre maison, nous vous nourrirôs, & vous enseignerons le chemin du Ciel. Elle me repartit d'une voix languissante, car elle estoit fort mal, hélas! y voudrois bien aller, mais ie ne scaurois plus marcher, ay e pitie de moy, enuoye moy querir dans vn Canot. I'en y manquay pas le lendemain matin 23. Iuillet ie la fis apporter proche de nostre maison; la pauvre femme me demandoit bien si elle n'entreroit point chez nous, elle s'attendoit que nous luy feriôs la mesme

charité que nous auions fait aux deux
premiers baptizés, mais ie luy respōdis
qu'elle estoit fēme, & que nous ne pou-
uions pas la loger dās nōtre maisōnette
qui est fort petite, que neātmoins nous
luy porterions à manger dans sa Caba-
ne, & que tous les iours ie l'irois voir
pour l'instruire, elle fut contente.
Quand ie commençay à luy parler
de la sainte Trinité, disant, que le Pere,
& le Fils, & le saint Esprit, n'estoient
qu'un Dieu qui a tout fait: ie le sçay
bien, me fit-elle, ie le crois ainsi; Je
fus tout estonné à cette repartie, mais
elle me dit que nostre bon Sauuage
Ioseph luy rapportoit par fois ce que
nous luy disions, cela me consola fort,
car en peu de temps elle fut suffisam-
ment instruite pour estre baptizée:
I'estois seulement en peine de luy faire
concevoir vne douleur de ses pechez,
les Sauuages n'ont point en leur lan-
gue, si bien en leurs mœurs, ce mot de
péchē: le mot de meschanceté & de
malice signifie parmy eux vne action
contre la pureté, à ce qu'ils m'ont dit:
I'estois donc en peine de luy faire
concevoir vn deplaisir d'auoir offensé

Dieu, ie luy leus par plusieurs fois les Commandemens, luy disant que celuy qui à tout fait haïssoit ceux qui ne luy obeïssoient pas, & qu'elle luy dit qu'elle estoit bien marrie de l'auoir offensé: La pauvre femme qui auoit bien retenues deffences que Dieu a fait à tous les hommes de mentir, de pail- larder, de desobeïr à ses parents, s'accusa tout seule de toutes ses offences par plusieurs fois: disant de soy mesme, celuy qui as tout fait aye pitié de moy, IESVS, Fils de celuy qui peut tout, fais moy misericorde: ie te promets que ie ne m'enyureray plus ny que ie ne diray plus de paroles des honnestes, que ie ne mentiray plus, ie suis marrie de t'auoir fasché, i'en suis marrie de tout mon cœur, ie ne mens point, aye pitié de moy, si ie retourne en santé, ie croiray tousiours en toy, ie t'obeiray tousiours, si ie meurs aye pitié de mon ame; l'ayant donc veüe ainsi disposée, craignant d'ailleurs qu'elle ne mourust subitement, car elle estoit fort malade, ie luy demanday si elle ne vouloit pas bien estre baptizée, ie voudrois bien encore viure, me dit-elle,

ie. cogneu qu'elle s'imaginoit que nous ne donnions point le baptême qu'à ceux qui deuoient mourir incontinent apres; ie luy fist entendre que nous estions tous baptizés, & que nous n'estions pas morts, que le baptême rendoit plustost la santé du corps, qu'il ne l'ostoit; baptise moy donc au plustost me fit elle: ie la voulus esprouuer, il estoit arriué quelques canots de Sauvages à Kebec, ie luy dis, voila une compagnie de tes gens qui vient l'arriuer, si tu veux t'en aller avec eux, ils te receuront, & ie te feray porter en leurs cabanes; la pauvre creature se mit à pleurer & à sanglotter si fort, qu'elle me toucha, me resmoignant par ses larmes qu'elle vouloit estre Chrestienne, & que ie ne la chassasse point: enfin voiant son mal redoubler, nous prîmes resolution de la baptizer promptement; ie luy fist entendre qu'elle pourroit mourir la nuit, & que son ame s'en iroit dans les feux, si elle n'estoit baptizée: que si elle vouloit receuoir ce sacrement en nostre Chapelle, que ie l'y ferois apporter dans une couuerture, elle resmoigna qu'elle

en estoit contente: ie men vay, luy disie, preparer tout ce qu'il fault, prends courage, ie t'enuoieray bien-tost querir: la pauvre femmen'eut pas la patience d'attendre, elle se traïsne comme elle pût, se reposant à tous coups, en fin elle arriua à nostre maison esloignée de plus de deux cent pas de sa cabane, & se jetta par terre n'en pouuant plus, estant reuenue à soy, ie la baptizay en presence de nos Peres, & de tous nos hommes: elle me respondit brauement à toutes les demandes que ie luy feis, suiuant l'ordre de conferer ce Sacrement aux personnes qui ont l'vsage de raison: Nous la reportasmes dans sa cabane toute pleine de joie, & nous remplis de consolation voiant la grace de Dieu operer dans vne ame où le diable auoit fait sa demeure si long temps. Cecy arriua le premier iour d'Aoust.

Le lendemain quelques François m'estant venus voir, l'allans visiter, ils la trouuerent tenant vn Crucifix en main, & l'apostrophant fort doucement: Toy qui est mort pour moy, fais moy misericorde, ie veux croire en
 toy

toy toute ma vie, aye pitié de mon ame.
Je rapporte expressement toutes ces particularitez, pour faire voir que nos Sauvages ne sont point si barbares qu'ils ne puissent estre faits enfans de Dieu : L'espere que là où le péché a regné, que la grace y triomphera, cette pauvre femme veit encores plus proche du Ciel que de la santé.

Je conclurray ce Chapitre par vn chastiment assez remarquable d'une autre Canadienne, qui ayant fermé l'oreille à Dieu pendant sa maladie, semble auoir esté rejetée à sa mort. Le Pere Brebœuf l'ayant esté voir, pour luy parler de receuoir la foy, elle se mocqua de luy, & mesprisa ses paroles: sa maladie l'ayant terrassée, & les Sauvages voulans decabaner, la porterent à cette honneste famille, habituée icy depuis vn assez long temps; mais n'ayât pas où la loger, ces Barbares la trainerent au fort, si nous n'eussions esté si esloignez, assurement ils nous l'auroient amenée; car ie me doute qu'ils la presentoiēt à nos François, voyans que nous auions receu avec beaucoup d'amour les deux Sauvages morts Chre-

stiens. Monsieur de Champlain voyant qu'il estoit desia tard luy fist donner le couuert pour vne nuit, ceux qui estoient dans la chambre où on la mit furent contrains d'en sortir, ne pouuans supporter l'infection de cette femme.

Le iour venu Monsieur de Champlain fist appeller quelques Sauuages, & leur ayant reproché leur cruauté d'abandonner cette creature qui estoit de leur nation, ils la reprirent & la trainerent vers leurs Cabanes, la rebutans comme vn chien, sans luy donner le couuert. Cette miserable se voyant delaissee des siens, exposée à la rigueur du froid, demâda qu'on nous fist appeller; mais cōme il n'y auoit point là de nos François, les Sauuages ne voulurent pas prendre la peine de venir iusques en nostre maison, esloignée d'une bonne lieuë de leurs Cabanes, si bien que la faim, le froid, la maladie, & les enfans des Sauuages, à ce qu'on dit, la tuerent; nous ne fûmes aduertis de cette histoire tragique que quelques iours apres sa mort: s'il y auoit icy vn Hospital il y auoit tous les malades du

pays, & tous les vieillards, pour les hommes nous les secourerons, selon nos forces, mais pour les femmes il ne nous est pas bien feant de les recevoir en nos maisons.

*Des moyens de convertir les
Sauvages.*

CHAPITRE III.

LE grand pouuoir que firent paroistre les Portugais au commencement dedans les Indes Orientales & Occidentales, ietta l'admiration bien auant dedans l'esprit des Indiens, si bien que ces peuples embrasserent quasi sans contreditte la creance de ceux qu'ils admiroient. Or voicy à mon aduis les moyens d'acquérir cet ascendant, par dessus nos Sauvages.

Le premier est d'arrester les courses de ceux qui ruinent la Religion, & de se rendre redoutable aux Hiroquois, qui ont tué de nos hommes, comme chacun sçait, & qui tout fraischement ont massacré deux cent Hurons, & en

36 *Relation de la Nouvelle France,*

ont pris plus de cent prisonniers. Voilà selon ma pensée la porte vnique, par laquelle nous sortirons du mespris, où la negligence de ceux qui auoient cydeuant la traicte du pays, nous ont ietté par leur auarice.

Le second moyen de nous rendre recommandables aux Sauuages, pour les induire à receuoir nostre sainte foy, seroit d'enuoyer quelque nombre d'hommes bien entendus à defricher & cultiuer la terre, lesquels se ioignant avec ceux qui sçauroient la langue, trauailleroient pour les Sauuages, à cōdition qu'ils s'arresteroient, & mettroient eux-mesmes la main à l'œuure, demeurants dans quelques maisons qu'on leur feroit dresser pour leur vsage, par ce moyen demeurants sedentaires, & voyants ce miracle de charité en leur endroit, on les pourroit instruire & gagner plus facilement. M'entretenant cēt Hyuer avec mes Sauuages, ie leurs communiquois ce dessein, les asseurant que quand ie sçauois parfaitement leur langue, ie les aiderois à cultiuer la terre, si ie pouuois auoir des hommes, & s'ils se vou-

loient arrester , leurs representant la misere de leurs courses , qui les touchoit pour lors assez sensiblement. Le Sorcier m'ayant entendu , se tourna vers ses gens , & leur dit , voyez comme cette robe noire ment hardiment en nostre presence ; ie luy demandy pourquoy il se figuroit que ie mentois, pource, dit-il , qu'on ne voit point d'hommes au monde si bons comme tu dis, qui voudroient prendre la peine de nous secourir sans espoir de recompense , & d'employer tant d'hommes pour nous aider sans rien prendre de nous ; si tu faisois cela, adiousta-il , tu arresterois la pluspart des Sauvages , & ils croiroient tous à tes paroles.

Ie m'en rapporte, mais si ie puis tirer quelque conclusion des choses que ie vois , il me semble qu'on ne doit pas esperer grande chose des Sauvages, tant qu'ils seront errants ; vous les instruisés aujourdhuy , demain la faim vous enleuera vos auditeurs , les contrainnant d'aller chercher leur vie dans les fleuves & dans les bois. L'an passé ie faisois le Catechisme en begaiant à

38 *Relation de la nouvelle France,*

bon nombre d'enfans, les vaisseaux partis, mes oyseaux s'enuolèrent qu'il d'un costé qui de l'autre, cette année que ie parle vn petit mieux, ie les pensois reuoir, mais s'estans cabanez delà le grand fleuve de S. Laurens, i'ay esté frustré de mon attente. De les vouloir suiure, il faudroit autant de Religieux qu'ils sont de cabanes, encor n'en viendrait on pas à bout; car ils sont tellement occupez à quester leur vie parmy ces bois, qu'ils n'ont pas le loisir de se sauuer, pour ainsi dire. De plus ie ne crois point que de cent Religieux, il y en ait dix qui puissent resister aux travaux, qu'il faudroit endurer à leur suite. Ie voulus demeurer avec eux l'Automne dernier, ie n'y fus pas huit iours, qu'une fièvre violente me faisoit, & me fist rechercher nostre petite maison, pour y trouuer ma santé: Estant guarý ie les ay voulu suiure pendant l'Hiver, i'ay esté fort malade la pluspart du temps: ces raisons & beaucoup d'autres que ie deduirois, n'estoit que ie crains d'estre lōg, me font croire qu'on trauaillera beaucoup, & qu'on auancera fort peu, si on n'arreste ces Barbares,

de leur vouloir persuader de cultiuer d'eux-mesmes sans estre secourus, ie doute fort si on le pourra obtenir de long temps; car ils n'y entendent rien: De plus ou retireront ils ce qu'ils pourront recueillir, leurs cabanes n'estants faites que d'escorce, la premiere gelée gastera toutes les racines & les citrouilles qu'ils auroient ramassées. De semer des poids & du bled d'Inde, ils n'ont point de place dans leurs todis; mais qu'ils nourriront pendant qu'ils cōmenceront à defricher; car ils ne vivent quasi qu'au iour la iournée, n'ayāt pour l'ordinaite au temps qu'il faut defricher aucunes prouisions. En fin quand ils se tueroiēt de trauailler, ils ne pourroient pas retirer de la terre la moitié de leur vie, iusques à ce qu'elle soit defrichée, & qu'ils soient bien entendus à la faire profiter.

Oraue le secours de quelques braues ouuriers de bon trauail, il seroit aisē d'arrester quelques familles, veu que quelques vns m'en ont desja parlé, s'accoustumans d'eux-mesmes petit à petit à tirer quelque chose de la terre.

Je sçay bien qu'il y a des personnes de

40 *Relation de la Nouvelle France*,
bon iugement, qui croyent qu'encor
que les Sauvages soient errants, que la
bonne semence del'Evangile ne laisse-
ra pas de germer & de fructifier en leur
ame, quoy que plus lentement, pource
qu'on ne les peut instruire que par re-
prises. Ils se figurēt encor que s'il passe
icy quelques familles comme on a des-
ja commencé d'en amener, que les Sau-
uages, prendrōt exemple sur nos Fran-
çois, & s'arresteron pour cultiuer la
terre. Je fus frappé de ces pensées au
commencement que nous vinsmes icy,
mais la cōmunicatiō que i'ay euë avec
ces peuples, & les difficultez qu'ont des
hōmes habituez dans l'oisiueté, d'em-
brasser vn fort travail, comme est la
culture de la terre, me fōt croire main-
tenant que s'ils ne sont secourus, ils
perdront cœur, notamment les Sauua-
ges de Tadoussac. Car pour ceux des
trois riuieres, où nos François font fai-
re vne nouvelle habitation cette an-
née, ils ont promis qu'ils s'arresteron
là & qu'ils semeront du bled d'Inde, ce
qui me semble n'est pas tout à fait as-
suré, mais probable, pour autant que
leurs predecesseurs ont eu autresfois

vne bonne bourgade en cet endroit, qu'ils ont quittée pour les inuasions des Hiroquois leurs ennemis.

Le Capitaine de ce quartier là, m'a dit que la terre y estoit fort bonne, & qu'ils l'aimoient fort s'ils deuiennent sedentaires, comme ils en ont maintenant la volonté, nous preuoyons là vne moisson plus feconde des biens du Ciel, que des fruiçts de la terre.

Le troisieme moyen d'estre bien-voulu de ces peuples, seroit de dresser icy vn seminaire de petits garçons, & avec le temps vn de filles, sous la conduite de quelque brauemaitresse, que le zele de la gloire de Dieu & l'affectiõ au salut de ces peuples, fera passer icy, avec quelques Compagnes animées de pareil courage. Plaise à sa diuine Majesté d'en inspirer quelques vnes, pour vne sinoble entreprise, & leur fasse perdre l'apprehension que la foiblesse de leur sexe leur pourroit causer, pour auoir à trauerser tant de mers, & viure parmy des Barbares.

A ce dernier voyage des femmes enceintes sont venuës, & ont aisemēt surmonté ces difficultez, comme auoient

42 *Relation de la nouuelle France,*
faict d'autres auparauant. Il y a aussi du
plaisir d'appriuoiser des ames Sauua-
ges, & les cultiuer pour receuoir la se-
mence du Christianisme. Et puis l'ex-
perience nous rend certains, que Dieu
qui est bon & puissant enuers tous, au
respect neantmoins de ceux qui s'expo-
sent genereusemēt & souffrent volon-
tiers pour son seruice, il a des caresses
assaisonnées de tant de suauitez, & les
secoure parmy leurs dangers d'une si
prompte & paternelle assistance, que
souuent ils ne sentent point leurs tra-
uaux, ains leuts peines leur tournent à
plaisir, & leurs perils à consolation sin-
guliere : Mais ie voudrois tenir icy où
nous sommes les enfans des Hurons.
Le Pere Brebœuf nous faict esperer
que nous en pourrons auoir, s'il entre
auec nos Peres dans ces pays bien peu-
plez, & si on trouue de quoy fonder ce
seminaire. La raison pourquoy ie ne
voudrois pas prēdre les enfans du pays
dans le pays mesme, mais en vn autre
endroit, c'est pour autant que ces Bar-
bares ne peuuent supporter qu'on cha-
stie leurs enfans, non pas mesme de
paroles, ne pouuans rien refuser à vn

enfant qui pleure, si bien qu'à la moindre fantaisie ils nous les enleueroient deuant qu'ils fussent instruits; mais si on tient icy les petits Hurōs, ou les enfans des peuples plus esloignez, il en arriuera plusieurs biens: car nous ne serōs pas importunés ny destournés des peres en l'instruction des enfans; cela obligera ces peuples à bien traiter, ou du moins à ne faire aucun tort aux François qui seront en leur pays. Et en dernier lieu nous obtiendrons, avec la grace de Dieu nostre Seigneur, la fin pour laquelle nous venons en ce pays si esloigné, sçauoir est la conuersion de ces peuples.

De la creance, des superstitions, & des erreurs des Sauvages Montagnais.

CHAPITRE IV.

I'Ay desia mandé, que les Sauvages croyoient qu'un certain nōmé Atachocam auoit créé le monde, & qu'un nommé Messou l'auoit réparé. J'ay interrogé là dessus ce fameux Sorcier & ce vieillard, avec lesquels j'ay passé

l'Hyuer, ils m'ont respondu, qu'ils ne sçauoient pas qui estoit le premier Auteur du mode, que c'estoit peut-estre Atahochā, mais que cela n'estoit pas certain qu'ils ne parloient d'Atahocam, que comme on parle d'une chose si esloignée, qu'on n'en peut tirer aucune assurance, & de fait le mot Nitatahokan en leur lāgue, signifie, ie raconte vne fable, ie dis vn vieux conte fait à plaisir.

Pour le Messou, ils tiennent qu'il a réparé le monde qui s'estoit perdu par le deluge d'eau, d'où appert qu'ils ont quelque traditiō de cette grande inondation vniuerselle qui arriua du temps de Noë, mais ils ont remply cette verité de mille fables impertinentes. Ce Messou allant à la chasse ses loups Ceruiers dont il se seruoit au lieu de chiens, estans entrez dans vn grand lac ils y furent arrestez. Le Messou les cherchant par tout, vn oyseau luy dit qu'il les voyoit au milieu de ce lac, il y entre pour les retirer, mais ce lac venant à se desgorger couurit la terre, & abisma le monde, le Messou bien estōné, enuoya le corbeau chercher vn morceau de terre pour rebastir cet element, mais il

n'en peut trouuer, il fist descendre vne Loutre d'as l'abisme des eauës, elle n'en peut rapporter, enfin il enuoya vn rat musqué, qui en rapporta vn petit morceau, duquel se seruit le Messou, pour refaire cette terre où nous sommes, il tira des flesches aux troncs des arbres, lesquelles se conuertirent en brâches, il fist mille autres merueilles, se vengea de ceux qui auoient arresté ses Loups Ceruiers, épousa vne Ratte musquée, de laquelle il eust des enfans qui ont repeuplé le monde, voila cōme le Messou a tout restably. Je touchay l'an passé cette fable, mais desirant rassembler tout ce que ie sçay de leur creance, i'ay vsé de redittes. Nostre Sauuager acōtoit au Pere Brebœuf que ses compatriotes croyent qu'vn certain Sauuage auoit receu du messou le don d'immortalité dans vn petit paquet, avec vne grande recommandation de ne la point ouurir, pendât qu'il le tint fermé il fust immortel, mais sa femme curieuse & incredule, voulut voir ce qu'il y auoit dans ce present, l'ayant deployé, tout s'enuola, & depuis les Sauuages ont esté sujets à la mort.

Ils disent en outre, que tous les animaux de châce espee ont vn frere aîné, qui est cōme le principe & cōme l'origine de tous les indiuidus, & ce frere aîné est merueilleusement grand puiffât. L'aîné des Castors, me disoiēt-ils, est peut-estre aussi gros que nostre Cabane, quoy que ses Cadets (s'entēds les Castors ordinaires) ne soient pas tout à fait si gros que nos moutons; or ces aînez de tous les animaux sont les cadets du Messou, le voila bien appareté, le braue repareteur de l'Vniuers, est le frere aîné de toutes les bestes. Si quelqu'un void en dormant l'aîné ou le principe de quelques animaux, il fera bonne chasse, s'il void l'aîné des Castors, il prēdra des Castors, s'il void l'aîné des Eslans, il prendra des Eslans, iouyssans des cadets par la faueur de leur aîné qu'ils ont veu en songe. Je leur demanday où estoient ces freres aînez, nous n'en sommes pas bien asseurez, me disoiēt-ils, mais nous pensons que les aînés des oyseaux sont au ciel, & que les aînez des autres animaux sont dans les eauës. Ils reconnoissent deux principes des saisons, l'un

s'appelle *Nipinoukhe*, c'est celuy qui ramene le Printemps & l'Esté. Ce nom vient de *Nipin*, qui en leur langue signifie le Printemps. L'autre s'appelle *Pipounoukhe* du nom de *Pipoun*, qui signifie l'Hiver, aussi ramene il la saison froide. Je leurs demandois si ce *Nipinoukhe* & *Pipounoukhe* estoient hommes ou animaux de quelque autre espèce, & en quel endroit ils demoureroient ordinairement; & ils me responderent qu'ils ne sçauoient pas bien comme ils estoient faits, encor qu'ils fussent bien asseurez qu'ils estoient viuants; car ils les entendent, disent-ils, parler ou bruire, notamment à leur venue, sans pouuoir distinguer ce qu'ils disent; pour leur demeure, ils partagent le monde entre-eux, l'un se tenant d'un costé, l'autre de l'autre, & quand le temps de leur station aux deux bouts du monde, est expiré l'un passe en la place de l'autre, se succedans mutuellement; Voila en partie la fable de *Castor* & de *Pollux*. Quand *Nipinoukhe* reuiet, il ramene avec soy la chaleur, les oyseaux, la verdure, il rend la vie & la beauté au monde, mais *Pipounoukhe* rauage tout,

48 *Relation de la Nouvelle France,*
estant accompagné de vents froids, de
glaces, de neiges, & des autres appana-
ges de l'Hiver; Ils appellent cette suc-
cession del'un à l'autre *Achitescatoueth*,
c'est à dire ils passent mutuellement à
la place l'un de l'autre.

De plus, ils croient qu'il y a certains
Genies du jour, ou Genies de l'air, ils
les nomment *Khichikouai* du mot *Khi-
chikou*, qui veut dire le jour & l'air. Les
Genies, ou *Khichikouai*, connoissent les
choses futures, ils voyent de fort loing,
c'est pourquoy les Sauvages les con-
sultent, non pas tous mais certains ion-
gleurs, qui sçauent mieux bouffonner
& amuser ce peuple que les autres. Je
me suis trouué avec eux quand ils con-
sultoient ces beaux Oracles, voicy ce
que j'en ay remarqué.

Sur l'entrée de la nuit, deux ou trois
jeunes hommes dresserent vn taberna-
cle au milieu de nostre Cabane, ils plâ-
terent en rond six pieux fort auant dans
terre, & pour les tenir en estat, ils atta-
cherent au haut de ces pieux vn grand
cercle, qui les enuironnoit tous; cela
fait ils entourerent cet Edifice de Ca-
stelognes, laissant le haut du taberna-
cle

le ouuert, c'est tout ce que pourroit
faire vn grand homme, d'atteindre de
la main au plus haut de cette tour ron-
de, capable de tenir 5 ou 6 hommes de-
bout. Cette maisō estāt faite, on esteint
entièrement les feux de la cabane, iet-
tant dehors les tisons, de peur que la
flāme ne donne del'espouuāte à ces ge-
niés ou *Khichikouai*, qui doiuent entrer
en ce tabernacle, dans lequel vn ieune
jongleur se glissa par le bas, retrouvant
à cēt effect la couuerture qui l'enuirō-
noit, puis la rabbattāt quand il fut en-
tré, car il se faut bien donner de garde
qu'il n'y ait aucune ouuerture en ce
beau palais, sinon par le haut. Le jon-
gleur entré, commença doucement à
remir, comme en se plaignāt, il esbran-
loit ce tabernacle sans violence au cō-
mencement, puis s'animant petit à pe-
tit, il se mit à siffler d'une façon sourde,
& comme de loin: puis à parler comme
dans vne bouteille, à crier comme vn
chat-huant de ce pays-cy, qui me sem-
ble auoir la voix plus forte que ceux de
France, puis à hurler, chanter, variant
de tō à tous coups, finissant par ces syl-
labes, *ho ho, hi hi, gui gui nioué*, & autres

semblables cōtre faisant la voix, en sorte qu'il me sembloit oüir ces marionnettes que quelques bateleurs fōt voir en France: Il parloit tâost Mōragnais, tantost Algonquain, retenāt tousiours l'accent Algonquain, qui est gay, cōme le Prouençal. Au commencement, cōme i'ay dit, il agitoit doucement cēt edifice, mais cōme il s'alloit tousiours animant, il entra dans vn si furieux enthousiasme, que ie croyois qu'il deust tout briser, esbranlant si fortement, & avec de telles violences sa maison, que ie m'estonnois qu'un homme eust tant de force: car comme il eut vne fois cōmencé à l'agiter, il ne cessa point que la consulte ne fust faite, qui dura enuiron trois heures: Comme il changeoit de voix, les Sauuages s'escrioient au commencement *moa, moa*, escoute, escoute: puis inuitās ces Geniēs, ils leurs disoiēt, *Pitoukhecon, Pitoukhecon*, entrez, entrez. D'autrefois cōme s'ils eussent respondu aux hurlements du jongleur, ils tiroient ceste aspiration du fond de la poitrine, *ho, ho*. I'estois assis comme les autres regardant ce beau mystere avec defence de parler: mais cōme ie ne leur

ois point voüé d'obeissance, ie ne
sois pas de dire vn petit mot à la tra-
rfe: tantost ie les priois d'auoir pitié
ce pauvre jongleur, qui se tuoit dans
tabernacle: d'autrefois ie leur disois
ils criaissent plus haut & que leurs
eniés estoient endormis.

Quelques vns de ces Barbares s'ima-
gēt que ce jongleur n'est point là de-
ns, qu'il est transporté sans sçauoir
ou, ny cōment. D'autres disent que
le corps est couché par terre, que son
e est au haut de ce tabernacle, où el-
e parle au commencement, appellant
Geniés, & iettant par fois des estin-
les de feu. Or pour retourner à no-
re consultation, les Sauuages ayant
y certaine voix que contrefit le jon-
eur, poufferēt vn cris d'allegresse, di-
ts qu'vn de ces Geniés estoit entré:
is s'adressants à luy, s'escrioient, *Te-*
nachi, teponachi, appelle, appelle; sça-
ir est tes compagnōs; là dessus le jon-
eur faisant du Geniés, changeant de
& de voix les appelloit: cependant
stre forcier qui estoit presēt prit son
bour, & chantant avec le iongleur
estoit dans le tabernacle, les autres

respondoient: On fit dancier quelques ieunes gens, entr'autres l'Apostat qui n'y vouloit point entendre, mais le forcier le fit bien obeïr.

En fin apres mille cris & hurlements apres mille chants, après auoir dancé & bien esbranié ce bel edifice, les Sauuages croyãs que les Geniés ou *Kichikoua* estoient entrez, le forcier les consulta il leur demanda de sa santé (car il estoit malade) de celle de sa fême qui l'estoit aussi. Ces Geniés, ou plustost le jongleur qui les contrefaisoit, respondi que pour sa fême elle estoit desia morte, que c'en estoit fait, i'en eusse bien dit autant que luy, car il ne falloit estre ny prophete, ny forcier pour deuiner cela, d'autāt que la pauvre creature auoit la mort entre les dents: pour le forcier, ils dirēt qu'il verroit le Printemps. Or cognoissāt sa maladie, qui est vne douleur de reins, ou pour mieux dire, vn appanage de ses lubricitez & paillardises, car il est sale au dernier poinct, ie luy dis voyant qu'il estoit sain d'ailleurs, & qu'il beuvoit & mangeoit fort biē, que non seulement il verroit le printemps, mais encore l'Esté, si quelque autre ac-

en l'année 1634.

53

dent ne luy suruenoit, ie ne me suis
trompé.

Après ces interrogations, on deman-
da à ces beaux oracles s'il y auroit bien
de la neige, s'il y en auroit beau-
coup, s'il y auroit des Esclaves ou Ori-
gonaux, & en quel endroict ils estoient,
ils repartirent ou plustost le iongleur,
entretenant tousiours sa voix, qu'ils
oyoient peu de neige & des originaux
fort loing, sans determiner le lieu, ayant
en cette prudence de ne se point en-
gager.

Voila comme se passa cette con-
sulte, après laquelle se voulut arrester
le iongleur: mais comme il estoit nuict,
il sortit de son tabernacle, & de nostre
cabane si visteement, qu'il fust dehors
tant quasi que ie m'en apperceusse.
Luy & tous les autres Sauvages qui
estoyent venus des autres Cabanes à ces
beaux mysteres, estans partis, ie de-
manday à l'Apostat, s'il estoit si simple
de croire que ces Genies entraissent &
parlassent dans ce tabernacle, il se mit
à ruer sa foy, qu'il a perduë & reniée,
que ce n'estoit point le iongleur qu'il
parloit, ains ces *Khichikonal* ou Genies

54 *Relation de la Nouvelle France*,
du iour, & mon hôte me dit, entre to
même dans le tabernacle, & tu verras
que ton corps demeurera en bas, &
ton ame montera en hault: l'y voul
entrer, mais comme i'estois seul de m
party, ie preueu qu'ils m'auroient faic
quelque affront, & comme il n'y auoi
point de tesmoins, ils se seroient van
tez, que i'aurois recogneu & admiré la
verité de leurs mysteres.

Or j'auois grande enuie de sçauoir de
quelle nature ils faisoient ces Genies.
L'Apostat n'en sçauoit rien. Le forcier
voyant que i'eluantois ses mines, &
que i'improuuois ses niaiseres, ne me le
vouloit point enseigner, si bien qu'il
fallut que ie me seruisse d'industrie: Je
laissay escouler quelques semaines,
puis le jettant sur ce discours, ie luy
parlois comme admirant sa doctrine,
luy disant qu'il auoit tort de m'escon
duire, puis que à toutes les questions
qu'il me faisoit de nostre croyance, ie
luy respõdois ingenuement, sans me fai
re tirer l'oreille: En fin il se laissa gagner
à ses propres loüanges, & me descou
urit les secrets de l'escole: voicy la fable
qu'il me raconta, touchant la nature

& l'essence de ces Geniés.

Deux Sauvages consultant ces Geniés en mesme temps, mais en deux diuers tabernacles, l'un d'eux, homme tres-melchant, qui auoit tué trois hommes à coup de haches par trahison, fust mis à mort par les Geniés, lesquels se transportans dans le tabernacle del'autre Sauvage pour luy oster la vie, aussi bien qu'à son compagnon, ils se trouuerent eux mesmes surpris; car se iong leur se defendit si bien, qu'il tua l'un de ces *Khichikouai*, ou Geniés, & ainsi l'on a sçeu comme ils estoient faicts, car ce Genié demeura sur la place. Je luy demanday donc de qu'elle forme il estoit, il estoit gros comme le poing, me fit il, son corps est de pierre, & vn peu long; le conceu qu'il estoit faict en cone, gros par vn bout, s'allant tousiours appetissant vers l'autre. Ils croiét que dans ce corps de pierre il y a de la chair & du sang, car la hache donc ce Genié fust tué resta ensanglantée. Je m'enquestay s'ils auoient des piéds & des ailes, & m'ayant dict que non, & comment donc, leur fis-ie, peuuent ils entrer ou voler dans ces tabernacles,

56 *Relation de la Nouvelle France,*

s'ils n'ont ny pieds ny aïsses, le forcier se mit à rire, disant pour solution, en verité ceste robe noire n'a point d'esprit, voila comme ils me payent quand ie leurs fais quelque obiection à laquelle ils ne peuuent respondre.

Comme ils faisoient grand cas du feu que iettoit ce iongleur hors de son tabernacle, ie leur dis, nos François en ietteroient mieux que luy, car il ne faisoit voler que des estincelles de quelque bois pourry qu'il porte avec soy, comme ie me persuade, & si i'eusse eu de la resine, ie leur eusse fait sortir des flammes. Ils me contestoient qu'il estoit entré sans feu dans cette maison, mais de bonne fortune, ie luy auois veu donner vn gros charbon ardant qu'il demanda pour peruner.

Voila leur creance touchant les principes des choses bonnes: Ce qui m'estonne, c'est leurs ingrátitudes, car quoy qu'ils croient que le Messou a reparé le monde, que Nipinoukhé & Pipounoukhé rameinent les saisons, que leur Khichikouai leurs apprenent où il y a des Essans, ou Orignaux, & leurs rendent milles autres bõs offices: siest ce que ie n'ay peu iusques icy re-

reconnoistre qu'ils leur rendent aucun honneur: j'ay seulement remarqué que dans leurs festins, ils iettent par fois quelques cuillerées de gresse dās le feu, prononcant ces parolles *Papeouekou, Papeouekou*, faites nous trouver à manger, faites nous trouver à manger: ie crois que cette priere s'adresse à ces genies, auxquels ils présentent cette gresse comme la chose la meilleure qu'ils ayent au monde.

Outre ces principes des choses bonnes, ils reconnoissent vn Manitou, que nous pouuons appeller le diable, ils le tiennent comme le principe des choses mauuaises, il est vray qu'ils n'attribuent pas grande malice au Manitou, mais à la femme, qui est vne vraye diableſſe: le mary ne hait point les hommes, il se trouue seulement aux guerres, & aux combats, & ceux qu'il regarde sont à couuert, les autres sont tués: voila pourquoy mon hôte me disoit, qu'il prioit tous les iours ce Manitou de ne point ietter les yeux sur les Hiroquois leurs ennemis, & de leur en donner tousiours quelqu'un en leurs guerres. Pour la femme du Manitou, elle est

cause de toutes les maladies qui sont au mode, c'est elle qui tuë les hommes, autrement ils ne mourroient pas, elle se repaist de leur chair, les rongeanint interieurement, ce qui faict qu'on les voit amaigrir en leurs maladies: elle a vne robe des plus beaux cheueux des hommes & des femmes qu'elle tuë, elle paroist quelquefois comme vn feu, on l'entend bien bruire comme vne flamme, mais on ne scauroit distinguer son langage: d'icy procedent à mon aduis ces cris & ces hurlemens, & ces batemens de tambours qu'ils font alentour de leurs malades, voulans comme empescher cette diableffe de venir donner le coup de la mort: ce qu'elle faict si subtilement, qu'on ne s'en peut defendre, car on ne la voit pas.

De plus, les Sauvages se persuadent que non seulement les hommes & les autres animaux: mais aussi que toutes les autres choses sont animées, & que toutes les ames sont immortelles, ils se figurent les ames comme vn ombre de la chose animée, n'ayans iamais ouy parler d'une chose purement spirituelle, ils se representent l'ame de l'hō-

me, comme vne image sombre & noire, où comme vne ombre de l'homme mesme, luy attribuant des pieds, des mains, vne bouche, vne teste, & toutes les autres parties du corps humain. Voila pourquoy ils disent que les ames boient & mangent, aussi leurs dōnent-ils à manger quand quelqu'un meurt, iettant la meilleure viande qu'ils ayent dās le feu, & souuēt ils m'ont dit qu'ils auoient trouué le matin de la viande rongée la nuit par les ames. Or m'ayans déclaré ce bel article de leur croyance, ie leurs fis plusieurs interrogations. Premièrement, où alloient ces ames apres la mort de l'homme, & des autres creatures; elles vont, dirent ils, fort loin, en vn grād village situé où le Soleil se couche: Tout vostre pays, leur dis-je (sçauoir est l'Amerique) est vne grande Isle, comme vous tesmoignez l'auoir appris: comment est ce que les ames des hommes, des animaux, des haches, des cousteaux, des chaudières, bref les ames de tout ce qui meurt, ou qui s'vse, peuuent passer l'eau pour s'en aller à ce grand village que vous placez où le soleil se couche, trouuent

60 *Relation de la Nouvelle France,*
elles des vaisseaux tous prests pour
s'embarquer & trauerser les eaux: non
pas, mais elle vont à pied, me dirent-ils,
passants les eaux à gay en quelque en-
droict: & le moyen, leur fis-ie, de passer
à gay le grand Ocean que vous sça-
uiez estre si profond, car c'est cette grã-
de mer qui enuironne vostre pays, tu
te trompe, respondent-ils, où les terres
sont conjointes en quelque endroict,
ou bien il y a quelque passage guayable
par où passent nos ames: & de faict nous
apprenons que l'on n'a peu encore pas-
ser du costé du Nord, c'est à cause (leur
repartis-ie) des grãds froids qui sont en
ces mers, que si vos ames prēnent cette
route elles seront glacées & toutes roi-
des de froid, deuant quelles arriuent en
leurs villages.

Secondement ie leur demande, que
mangeoient ces pauures ames, faisant
vn si long chemin, elles mangent des
escorces, dirent-ils, & du vieux bois
quelles trouuent dans les forests, ie ne
m'estonne pas, leur respōdis-je, si vous
auez si peur de la mort, & si vous la
fuiiez tant, il n'y a guere de plaisir d'al-
ler manger du vieux bois & des escor-
ces en l'autre vie.

Tiercement. Que font ces ames estant arriuées au lieu de leur demeure: pendant le iour elles sont assises tenans leur deux coudes sur leur deux genoux, & leur testes entre leur deux mains, posture assés ordinaire aux Sauuages malades: pendant la nuit elles vont & viennent, elles trauaillent, elles vont à la chasse, ouy mais, repartis-ie, elles ne voient goutte la nuit, tu es vn ignorant, tu n'as point d'esprit, me firent ils, les ames ne sont pas comme nous, elles ne voyent goutte pendant le iour, & voyent fort clair pendant la nuit, leur iour est dans les tenebres de la nuit, & leur nuit dans la clarte du iour.

En quatriesme lieu, à quoy chassent ces pauures ames pendant la nuit? elles chassent aux ames des Castors, des Porcs epics, des Esclans, & des autres animaux, se seruãs de l'ame des raquettes, pour marcher sur l'ame de la neige, qui est en ce pays là: bref elles se seruent des ames de toutes choses, comme nous nous seruõs icy des choses mesmes. Or quant elles ont tué l'ame d'un Castor, ou d'un autre animal, ceste ame meurtelle tout a faict, ou bien a elle vne autre ame qui s'en aille en quelque

autre village? Mon forcier demeura court à cette demande; & cōme il a de l'esprit, voyant qu'il s'alloit enferrer s'il me respōdoit directemēt, il esquiva le coup: car s'il m'eut dit que l'ame mouroit entierement, ie luy aurois dit que quand on tuoit premierement l'animal, son ame mouroit à mēme temps: s'il m'eust dit que ceste ame avoit vne ame qui s'en alloit en vn autre village, ie luy eusse fait voir que chaque animal auroit selon sa doctrine plus de vingt, voire plus de cent ames, & que le mōde devoit estre remply de ces villages où elles se reti-
rent, & que cepēdāt on n'en voyoit aucun. Cognoissant dōc qu'il s'alloit engager, il me dit, tais toy, tu n'as point d'esprit, tu demande des choses que tu ne sçais pas toy-mesme, si j'auois esté en ces pays-là, ie te respondrois.

En fin ie luy dis que les Europeans nauigeoient par tout le monde, ie leur declaray, & leur fis voir par vne figure ronde, quel estoit le pays où le soleil se coucl e à leur regard, l'asseurant qu'on n'auoit point trouué ce grand village, que tout cela n'étoit que resueries, que les ames des hommes seulement estoiet

immortelles, & que si elles estoient bonnes, elles s'en alloient au ciel, que si elles estoient meschantes, elles descendoient dans les enfers pour y estre brûées à iamais, & que chacun receuroit selon ses œuures. En cela, dit-il, vous mentez vous autres, d'assigner diuers endroits pour les ames, elles vont en un mesme pays, du moins les nostres: car deux ames de nos cōpatriotes sont euenuës autresfois de ce grand village, & no^r ont appris tout ce que ie t'ay dit, puis elles s'en retournerent en leur demeure: ils appellent la voye lactée, *chipai meskenau*, le chemin des ames, source qu'ils pensent que les ames se suivent par cette voye pour aller en ce grand village.

Ils ont en outre vne grande croyāce leurs songes, s'imaginans que ce qu'ils ont veu en dormant doit arriuer, & qu'ils doiuent exécuter ce qu'ils ont veu: ce qui est vn grand malheur, car vn Sauvage songe qu'il mourra s'il ne se tue, il se mettra à mort à la premiere rencontre à l'escart. Nos Sauvages se demandoiēt quasi tous les matins, as-tu point veu de Castors, ou d'O-

64 *Relation de la Nouvelle France,*

rignac en dormant : & cōme ils voyoiēt que ie me mocquois des songes, ils s'estonnoient, & me demandoient à quoy crois-tu donc, si tu ne crois à tes songes? ie crois en celuy qui a tout fait, & qui peut tout; tu n'as point d'esprit, comment peus-tu croire en luy, si tu ne le vois pas? Ie ferois trop long de rapporter toutes les badineries sur ces sujets, reuēons à leurs superstitions qui sont sans nombre.

Les Sauvages sont grands chanteurs, ils chantent comme la pluspart des nations de la terre par recreation, & par deuotion; c'est à dire en eux par superstition : Les airs qu'ils chantent par plaisir sont ordinairement graues & pesants, il me semble qu'ils ont par fois quelque chose de gay, notamment les filles: mais pour la pluspart, leurs chansons sont massiues, pour ainsi dire, sombres, & mal-plaisantes : ils ne sçauent que c'est d'assembler des accorts pour composer vne douce harmonie : Ils proferent peu de paroles en chantant, variants les tons, & non la lettre. I'ay souuent ouy mon Sauvage faire vne longue chanson de ces trois mots *Kaie, nir, kbigatontaouim,*

& tu

& tu feras aussi quelque chose pour moy: Ils disent que nous imitons les gazotüillis des oyseaux en nos airs, ce qu'ils n'improuent pas, prenans plaisir quasi tous tant qu'ils sont à chanter, ou à ouïr chanter, & quoy que ie leur die que ie n'y entendois rien, ils m'inuitoient souuent à entonner quelque air, ou quelque priere.

Pour leurs châts superstitieux, ils s'en seruient en mille actions, le sorcier & le viellard, dont i'ay parlé, m'en donnerent la raison: deux Sauvages, disoient ils, estans jadis fort desolés, se voyans à deux doigts de la mort faute de viure, furent aduertis de chanter, & qu'ils feroient secourus; ce qui arriua, par ayans chanté, ils trouuerent à manger: de dire qui leur donna cest aduis, & comment, ils n'en sçauent rien: quoy que s'en soit, depuis ce temps là toute leur religion consiste quasi à chanter, se seruans des mots les plus barbares qu'ils peuuent rencontrer: Voicy vne partie des paroles qu'ils chanterent en une longue superstition qui dura plus de quatre heures, *Aiasé manitou, aiasé manitou, aiasé manitou, abiham, behinham,*

banhan, beninakhé hosé beninakhé, enigouano bahano anihé ouibini naninaouai nanahouai nanahouai aouibé ahahé aouibé : Pour conclusion, *ho! ho! ha!* Je demanday que vouloient dire ces parolles, pas vn ne m'en peut donner l'interpretation : car il est vray que pas vn d'eux n'entend ce qu'il chante, sinon dans leurs airs, qu'ils chantent pour se recreer.

Ils joignent leurs tambours à leurs chants, ie demanday l'origine de ce tambour, le veillard me dit, que peut estre quelqu'un auoit eu en songe qu'il estoit bon de s'en seruir, & que delà l'usage s'en estoit ensuiuy. Je croirois plustost qu'ils auroient tiré cette superstition des peuples voisins, car on me dit (ie ne sçay s'il est vray) qu'ils imitent fort les Canadiens qui habitent vers Gaspé, peuple encore plus superstitieux que celui cy.

Au reste, ce tambour est de la grandeur d'un tambour de basque, il est composé d'un cercle large de trois ou quatres doigts, & de deux peaux roidement estenduës de part & d'autre: ils mettent dedans des petites pierres ou

petits callious pour faire plus de bruit: le diametre des plus grands tambours est de deux palmes ou enuiron, ils le nomment *chichigouan*, & le verbe *niagahiman*, signifie ie fais ioüier ce tambour: ils ne le battent pas comme font nos Europeans: mais ils le tournent & remuent, pour faire bruire les caillous qui sont dedans, ils en frappent le terre, tantost du bord, tantost quasi du plat, pendant que le forcier fait mille singeries avec cest instrument. Souuent les assistans ont des batons en mains, frappant tous ensemble sur des bois, ou manches de haches qu'ils ont deuant eux, ou sur leurs *ouagans*, c'est à dire, sur leurs plats d'esforce renuersés: Avec ces tintamarres, s'ioignent leurs chants & leurs cris, ie trois volontiers leurs hurlements, tant ils s'efforcent par fois, ie vous laisse à penser la belle musique: ce miserable forcier avec lequel mon hoste, & le renegat, m'ont fait hiuerner contre leurs promesses, m'a pensé faire perdre la teste avec ses tintamarres: car tous les iours à l'entrée de la nuit, & bien souuent sur la minuit, d'autre-

68 *Relation de la Nouvelle France,*
fois sur le iour il faisoit l'enragé. Iay
esté vn assez long temps malade par-
my eux, mais quoy que ie le priasse de
se moderer, de me donner vn peu de re-
pos, il en faisoit encore pis, esperant
trouuer sa guerison dans ces bruits qui
augmentoient mon mal.

Ils se seruent de ces chants, de ce
tambour, & de ces bruits, ou tinta-
marres en leurs maladies, ie le declaray
assez amplement l'an passé, mais de-
puis ce temps là, i'ay veu tant faire de
fortifès, deniaiseries, de badineries, de
bruits, de tintamarres à ce malheureux
forcier pour se pouuoir guerir, que ie
me lasserois d'escrire & ennuierois vo-
stre reuerence, si ie luy voulois faire lire
la dixiesme partie de ce qui m'a sou-
uent lassé, quasi iusques au der-
nier poinct. Par fois cest homme en-
troit comme en furie, chantant, criant
hurlant, faisant bruire son tambour de
toutes ses forces: cependant les autres
hurloient comme luy, & faisoient vn
tintamarre horrible avec leurs bastõs,
frappans sur ce qui estoit deuant eux:
ils faisoient danser des ieunes enfans,
puis des filles, puis des femmes, il bais-

soit la teste, souffloit sur son tambour: puis vers le feu, il sifflait comme vn serpent, il ramenoit son tambour sous son menton, l'agitait & le tournoyant: il en fraploit la terre de toutes ses forces, puis le tournoyoit sur son estomach: il se fermoit la bouche avec vne main renuersée, & de l'autre, vous eussiez dit qu'il vouloit mettre en pieces ce tambour, tant il en fraploit rudement la terre: il s'agitoit, il se tournoit de part & d'autre, faisoit quelques tours à l'entour du feu, sortoit hors la cabane, tousiours hurlant & bruyant: il se mettoit en mille postures; & tout cela pour se guerir. Voila comme ils traitent les malades. I'ay quelque croyance qu'ils veulent coniurer la maladie, ou espouuanter la femme du Manitou, qu'ils tiennent pour le principe & la cause de tous les maux, comme i'ay remarqué cy dessus.

Ils chantent encore & font ces bruits en leurs sueries, ils croiroient que cette medecine, qui est la meilleure de toutes, celles qu'ils ont, ne leur seruiroit de rien, s'ils ne chantoient en suant: Ils plantent des bastons en terre faisant

70 *Relation de la Nouvelle France,*
vne espeece de petit tabernacle fort
bas : car vn grand homme estant assis
là dedans, toucheroit de sa teste le
hault de cetodis, qu'ils entourent &
couurent de peaux, de robes, de cou-
uertes : Ils mettent dans ce four
quantité de grosses pierres qu'il ont
faict chauffer, & rougir dans vn bon
feu, puis se glissent tous nuds dans ces
estuues, les femmes suent par fois
aussi bien que les hommes : d'autre-
fois ils suent tous ensemble, hommes,
& femme pelle & mesle : ils chantent,
ils crient, ils hurlent dans ce four, ils
haranguent : par fois le sorcier y bat
son tambour. Je l'escoutois vne fois
comme il faisoit du prophete là de-
dans, s'escriant qu'il voyoit des Ori-
gnaux, que mon hoste son frere en
tueroit, ie ne peus me tenir que ie ne
luy disse, ou plustost à ceux qui estoient
presens, & qui luy prestoient l'oreille
comme à vn oracle, qu'il estoit bien
croyable qu'on trouueroit quelque
masle, puisque on auoit desia trouué
& tué deux femelles, luy cognoissant
où ie visois, me dit en grondant, il est

crovable que cette robe noire n'a point d'esprit : Ils sont tellement religieux en ces crieries, & autres niaiseries, que s'ils font sueries pour se guerir, ou pour auoir bonne chasse, ou pour auoir beau temps, rien ne se feroit s'ils ne chantoient, & s'ils ne gardoient ces superstitions. I'ay remarqué que quand les hommes suent, ils ne se veulent point seruir des robes des femmes pour entourer leur sueries, s'ils en peuuent auoir d'autres: bref quand ils ont crié trois heures ou enuiron dans ces estuues, ils en sortent tous mouillés & trempés de leur sueur.

Ils chantent encore & battent le tambour en leur festins, comme ie declareray au chapitre de leurs banquets: ie leur ay veu faire le mesme en leurs conseils, y entremellant d'autres iongleries: Pour moy ie me doute que le forcier en inuente tous les iours de nouvelles pour tenir son monde en haleine: & pour se rendre recommandable: ie luy vis vn certain iour prédre vne espée, la mettre la pointe en bas, le manche en hault (car leurs espées

72 *Relation de la Nouvelle France,*
sont emmanchées à vn long baston) il
mit vne hache proche de cette espée,
se leu debout, fit ioüer son tambour,
chanta hurla à son accoustumée , il
fit quelques mines de dancier , tourna
à l'entour du feu : puis se cachant , il
tira vn bonnet de nuit, dans lequel il
y auoit vne pierre à esguiser , il la met
dans vne cullier de bois , qu'on essuya
exprés pour cest effect, il fit allumer
vn flambeau d'escorce, puis donna de
main en main le flambeau, la cueiller,
& la pierre, qui estoit marquée de quel-
ques raies , la regardans tous les vns
apres les autres , philosopant à mon
aduis sur cette pierre , touchant leur
chasse, qui estoit le subiect de leur con-
seil ou assemblée.

Ces pauures ignorants chantent
aussi dans leurs peines , dans leurs dif-
ficulitez , dans leurs perils & dangers :
pendant le temps de nostre famine,
ie n'entendois par ces cabanes, notā-
ment la nuit, que chants, que cris,
battements de tambours , & autres
bruits : & demandant ce que c'estoit,
mes gens me disoient qu'ils faisoient

cela pour auoir bonne chasse, & pour trouuer à manger, leurs chants & leurs tambours passent encore dans les sortileges que font les forciers.

Il faut que ie couche icy, ce que ie leurs vis faire le douxième Feurier, comme ie recitois mes heures sur le soir, le forcier se mit à parler de moy *aiamtheou*, il fait ses prieres, dit-il: puis prononçant quelques paroles, que ie n'entendis pas, il adiousta *Niganipahan*; ie letueray aussi tost: la pensée me vint qu'il parloit de moy, veu qu'il me haïssoit pour plusieurs raisons, comme ie diray en son lieu: mais notamment pour ce que ie taschois de faire veoir que tout ce qu'il faisoit n'estoit que badinerie & puerilité: Sur cette pensée qu'il me vouloit oster la vie, mon hoste me va dire, n'as tu point de poudre qui tuë les hommes? pourquoy, luy dis-je, ie veux tuer quelqu'un, me respond il? ie vous laisse à penser si j'acheuay mon office sans distraction, veu que ie scauois fort bien qu'ils n'auoient garde de faire mourir aucun de leurs gens, & que le forcier m'auoit menacé de mort

quelques iours auparauant, quoy qu'en riant, me dit il apres: mais ie ne m'y fiois pas beaucoup, voyant donc ces gens en action, ie r'entre dans moy-mesme, suppliant nostre Seigneur de m'assister, & de prendre ma vie au moment & en la façon, qu'il luy plairoit: neantmoins pour me mieux disposer à ce sacrifice, ie voulus voir s'ils pensoient en moy, ie leur demanday donc où estoit l'homme qu'ils vouloient faire mourir, ils me repartent qu'il estoit vers Gaspé à plus de cens lieües de nous. Ie me mis à rire, car en verité ie n'eusse iamais pensé qu'ils eussent entrepris de tuer vn homme de cens lieües loin. Ie m'enquis pourquoy ils luy vouloient oster la vie. On me respondit que cest homme estoit vn forcier Canadien, lequel ayant eu quelque prise avec le nostre, l'auoit menacé de mort, & luy auoit donné la maladie, qui le trauailloit depuis vn long temps, & qui l'alloit estouffer dans deux iours, s'il ne preuenoit le coup par son art: ie leurs dis que Dieu auoit deffendu de tuer, & que nous autres, ne faisons mourir personne: cela n'empescha point

qu'ils ne poursuiussent leur pointe. Mon
 hôte preuoiant le grand bruit qui se
 deuoit faire, me dit, tu auras mal à la
 teste, va t'en en l'autre cabane voisine:
 non, dit le forcier, il n'y a point de mal
 qu'il nous voye faire. On fit sortir tous
 les enfans & toutes les femmes, horsmis
 vne qui s'assit aupres du forcier: le de-
 meuray donc spectateur de leurs myste-
 res, avec tous les Sauuages des autres
 cabanes qu'on fit venir: Estans tous
 assis, voicy vn ieune homme qui ap-
 porte deux paux ou pieux fort pointus,
 mon hôte prepare le fort composé de
 petits bois formez en langue de ser-
 pēt des deux costez, de fers de fiesches,
 de morceaux de cousteaux rompus,
 d'un fer replié comme vn gros hame-
 çon, & d'autres choses semblables, on
 enuelpa tout cela dans vn morceau
 de cuir: Cela fait, le forcier prend son
 tambour, tous se mettent à chanter &
 hurler, & faire le tintamarre que j'ay re-
 marqué cy dessus: apres quelques chan-
 sons, la femme qui estoit demeurée se
 leue, & tourne tout à l'entour de la ca-
 bane par dedans, passant par deriere le

76 *Relation de la Nouvelle France,*

dos de tous tant que nous estions. S'estant rassise, le magicien prend ces deux pieux, puis designant certain endroit, commence à dire; voila sa teste (ie crois qu'il entendoit de l'homme qu'il vouloit tuer) puis de toutes ces forces, il plante ces pieux en terre, les faisant regarder vers l'endroit, où il croioit qu'estoit ce Canadien. Là dessus mon hôte va ayder son frere, il fait vne assez grande fosse en terre avec ces pieux : cependant les chants & autres bruits continuoient incessamment. La fosse faite, les pieux plantéz, le valet du sorcier, i'entens l'Apostat, va querir vne espée, & le sorcier en frappe l'un de ces pauts, puis descend dans la fosse, tenant la posture d'un homme animé qui tire de grands coups d'espée & de poignard ; car il auoit l'un & l'autre dans cette action d'homme furieux & enragé. Le sorcier prend le sort enuélépé de peau, le met dans la fosse, & redouble les coups d'espée à mesme temps qu'on redoubloit le tintamarre.

En fin ce mystere cessa, il retire l'espée & le poignard tout ensanglanté, les jette deuant les autres Sauvages; on re-

couvrez la fosse, & le magicien tout glorieux, dit que son homme est frappé, qu'il mourra bien tost, demande si on n'a point entendu ses cris : tout le monde dit que non, hormis deux ieunes hommes ses parens, qui disent auoir ouy des plaintes fort sourdes, & comme de loing. O qu'ils le firent aise, se tournant vers moy, il se mit a rire, disant, voyez cette robe noire qui nous vient dire qu'il ne faut tuer personne: Comme ie regardois attentiuement l'espée & le poignard, il me les fit presenter, regarde, dit-il, qu'est cela; c'est du sang, reparti-je, de qui? de quelque Orignac ou d'autre animal, ils se mocquerent de moy, disants que c'estoit du sang de ce Sorcier de Gaspé; comment, dis je, il est à plus de cent lieuës d'icy? il est vray font-ils, mais c'est le Manitou, c'est à dire le Diable, qui apporte son sang pardeffous la terre. Or si c'est hōme est vraiment Magicien, ie m'en rapporte, pour moy i'estime qu'il n'est ny Sorcier ny Magicien, mais qu'il le voudroit bien estre: tout ce qu'il faict selon ma pensée n'est que badinerie,

78 *Relation de la Nouvelle France* ;

pour amuser les Sauvages, il voudroit bien auoir communication avec le Diable ou Manitou, mais ie ne crois pas qu'il en ait : si bien me persuadaye, qu'il y a eu icy quelque Sorcier, ou quelque Magicien s'il est vray ce qu'ils disent des maladies & des guerisons, dont ils me parlent: c'est chose estrange, que le Diable qui apparoit sensiblement aux Ameriquains Meridionaux, & qui les bat & les tourmente de telle sorte, qu'ils se voudroient bien deffaire d'un tel hoste, ne se communique point visiblement ny sensiblement à nos Sauvages, selon ce que ie crois. Je sçais qu'il y a des personnes d'opinion contraire, croyans aux rapports de ces Barbares, mais quand ie les presse, ils m'aduoient tous, qu'ils n'ont rien veu de tout ce qu'ils disent, mais seulement qu'ils l'ont ouï dire à d'autres,

Cen'est pas le mesme des Ameriquains Meridionaux, nos Europeans ont ouï le bruit, la voix & les coups que ruë le Diable sur ces pauvres esclaves: & un François digne de creance,

m'a asseuré l'auoir oüy de ses oreilles: surquoy on me rapporte vne chose tres remarquable, c'est que le Diable s'enfuit, & ne frappe point ou cesse de frapper ces miserables, quand vn Catholique entre en leur compagnie, & qu'il nelaisse point de les battre en la presenced d'un Huguenot, d'où vient qu'un iour se voyans battus en la compagnie d'un certain François, ils luy dirent, nous nous estonnons que le diable nous batte, toy estant avec nous, veu qu'il n'oseroit le faire quand tes compagnons sont presents. Luy se douta incontinent que cela pouuoit prouenir de sa religion, (car il estoit Caluiniste) s'adressant donc à Dieu, il luy promist de se faire Catholique si le diable cessoit de battre ces pauvres peuples en sa preséce: Le vœu fait, jamais plus aucun Demon ne molesta Amariquain en sa compagnie, d'où vient qu'il se fist Catholique, selon la promesse qu'il en auoit faicte; mais retournons à nostre discours. J'ay veu deux autrefois faire les mesmes sortileges à nostre Magicien pretendu, &

garda toutes les ceremonies susdites, horsmis qu'il changea de sort, car vne fois il se seruit de quatre bastons faits en forme de fuseaux à filer, sinon qu'ils estoient plus gros, & qu'ils auoient comme des dents en certains endroits: Il se seruit encore du bout de la queue & du pied d'un Porc epic, & quelques poils d'Orignac, ou de Porc epic, liez ensemble en petit faisceau: l'autre fois il se seruit encore de ces fuseaux, d'un pied de Porc epic, ou d'un autre animal, d'os de quelque beste, d'un fer semblable, & celuy qu'on attache à vne porte pour la tirer, & de quelques autres badineries: son valet le renegat luy tenant tout cela prest, & battant le tambour pendant que son Maistre estoit occupé dans la fosse. Voila vne partie des actions esquelles se retrouuent leurs chants, leurs cris, hurlemens & tintamarres.

Leur Religiō, ou plustost superstitiō, consiste encore à prier: mais, ô mon Dieu! quelles oraisons font ils? Le matin les petits enfans sortans de la Cabane, s'escrient à pleine teste, *Caconakhé,*

Pakhais,

Pakhaïs Amiscouakhi, Pakhaïs Mousouakhi,
Pakhaïs: venez Porcs épics, venez Ca-
 tors, venez Elans, voila toutes leurs
 prières.

Les Sauvages eternuans, & quel-
 quefois même en autre temps, disent
 pendant l'Hiver, criants tout haut
Etouctaïan miraouinam an Mirouscamikhi,
 je serois bien aise de voir le Prin-
 temps.

D'autrefois ie leur ay ouïy demãder
 le Printemps, ou la deliurance du mau-
 vais, & autres choses semblables; &
 tout cela se faiët par desirs qu'ilsex-
 priment, criants tant qu'ils peuuent,
 je serois bien aise que ce iour conti-
 nuast, que le vent se changeast, &c. De-
 sire à qui ces souhaits s'adressent, ie ne
 saurois, car eux mesmes ne le sçauent
 pas, du moins ceux à qui ie l'ay de-
 mandé ne m'en ont pû instruire.

L'ay remarqué cy dessus qu'ils prient
 le Manitou de ne point ietter les yeux
 sur leurs ennemis, afin qu'ils les puis-
 sent tuer: voila toutes les prières &
 raisons que j'ay ouïy faire aux Sauva-
 ges, ie ne sçay s'ils en ont d'autres, ie

82 *Relation de la Nouvelle France,*

ne le crois pas. O que ie me sentoie riche & heureux parmy ces Barbares, d'auoir vn Dieu à qui ie peusse adresser mes souhaits, mes prieres & mes vœux! & qu'ils sont miserables de n'auoir point d'autres desirs, que pour la vie presente! l'oublieis à dire icy, mais ie l'ay couché cy dessus, qu'ils ont vne Image ou espee de sacrifice, car ils iettent au feu de la gresse qu'ils recueillent sur la chaudiere où cuit la viande, faisant cette priere *Papeouekon*, *Papeouekon*, faictes nous trouuer à manger, faictes nous trouuer à manger: ie crois qu'ils adressent cette oraison à leur *Khichikouai*, & peut-estre encore les autres; voicy vne superstition qui m'a bien ennuyé.

Le vingt-quatriesme de Nouembre, le Sorcier assembla les Sauuages, & se retrancha avec des robes & des couuertures en vn quartier de la Cabane; en sorte qu'on ne le pouuoit voir, ny ses compagnons: il s'y trouua vne femme avec eux qui marquoit sur vn baston triangulaire long de demie picque, toutes les chansons qu'ils disoient, ie

priay vne femme de me dire ce qu'ils faisoient dans ces retranchemens, elle me respondit qu'ils prioient, mais ie croy qu'elle me fist cette respõse, pour ce que quand ie faisois oraison, eux me demandans ce que ie faisois, ie leurs disois, *Nataiamibian misi ca Kbitat*, ie prie celuy qui a tout fait: & ainsi quand ils chantoient, quand ils hurloient, battans leurs tambours & leurs bastons, ils me disoient qu'ils faisoient leurs prieres, sans me pouuoir expliquer à qui ils les adressoient. Le nenegat m'a dit que ceste superstition, qui dura plus de cinq heures, se faisoit pour vn mort, mais comme il ment plus souuent qu'il ne dit vray, ie m'en apporte à ce qui en est: ils appellent ceste superstition *Ouechibouan*: en suite de ces longues oraisons, le Sorcier donna le patron d'un petit sac coupé en forme de jambe à vne femme pour en faire vn de cuir, qu'elle emplit à mon aduis de poil de Castor, car ie maniaay cette jambe qui me sembla molasse, & pleine d'un poil assez doux, ie demanday prou ce que c'e-

stoit, & pourquoy on faisoit ce petit sac tortu, mais iamais on ne me le voulut dire. Je sçeu seulement qu'ils l'appelloient *Manitoukathi*, c'est à dire, jambe du Manitou, ou du Diable. Elle fut long temps pendue dans la Cabane au lieu où s'asseoit le Sorcier; depuis on la donna à vn ieune homme pour la porter pendue au col, elle estoit des appartenances de ces longues prieres, que ie viens de coter, mais ie n'ay peu sçauoir à quel dessein cela se faisoit.

Ils gardent par fois encore vn ieusne fort rigoureux, non pas tous, mais quelques vns qui ont enuie de viure long temps; mon hoste voyant que ie ne mangeois qu'une fois pendant le Carême, me dit que quelques vns d'entre eux ieusnoient pour auoir vne longue vie; mais m'adjousta qu'ils se retiroient tous seuls dans vne petite Cabane à part, & que là ils ne beuuient ny mängeoient quelquefois huit iours, quelquefois dix iours durant: d'autres m'ont dit qu'ils sortent comme des squelets de cette Cabane, & que par

fois on en rapporte à demy-morts, ie n'ay point veu de ces grands ieulneurs, ni bien de grâds disneurs: vray est que ie n'ay point de peine à croire cét excez, car toutes les fausses religions sont pleines de puerilitez, ou d'excés, ou de saletéz.

I'ay veu faire vne autre deuotion au Sorcier, laquelle, comme ie crois, n'appartient qu'à ceux de sa profession; on luy dresse vne petite Cabane esloignée d'un jet de pierre ou de deux des autres, il se retire là-dedans pour y demeurer seul huit iours, dix iours, ou plus ou moins: Or vous l'entendez pour & nuit crier, hurler, & battre son tambour; mais il n'est pas tellement solitaire, que d'autres ne luy aillent aider à chanter, & que les femmes ne le visitent, c'est là où il se commet de grandes saletéz.

Les Sauvages sont encore fort Religieux enuers leurs morts; mon hôte, & le vieillard dont i'ay souuent fait mention, m'ont confirmé ce que i'ay es-jà escrit vne autrefois, que le corps mort du deffunct ne sort point par la

86 *Relation de la Nouvelle France,*

porte ordinaire de la Cabane, ains on leue l'escorce de l'endroi& où l'homme est mort, pour faire passer son cadavre.

De plus, disent ils, l'ame sort par la cheminée, ou par l'ouuerture qu'ils font au haut de leurs todis, ils frappent à coups de baston sur leurs Cabanes, afin que cette ame ne tarde point, & qu'elle ne s'accoste de quelque enfant, car elle le feroit mourir: ils enterrent les robbes, les chaudières, & autres meubles avec le trespassé, pour ce qu'ils l'ayment, & afin aussi qu'il se serue de l'ame de toutes ces choses en l'autre vie. Ils iettent comme j'ay déjà dit, la meilleure viande qu'ils ayent au feu, pour en donner à manger à l'ame du deffunct, qui mangé l'ame de ces viandes: ils n'estendent point les corps de leur long comme nous faisons les enseuellissans, mais ils les accroupissent & accourcissent comme vne personne qui est assise sur les talons: ils couppent vn petit touffet de cheueux du deffunct, pour presenter à son plus proche parent. Je n'en scay

pas la raison. Mais faisons vne autre liste de leurs superstitions & de leur ignorance, celles que ie viens de rapporter, concernent en quelque façon leur religion ridicule; les suiuanes se peuuent proprement appeller superstitions.

Les Sauuages ne iettent point aux chiens les os des Castors, Porcs épics femelles, du moins certains os de terminez; bref ils prennent garde tres-soigneusement que les chiens ne mangent aucun os des oyseaux & des autres animaux qui se prennent au lacer, autrement ils n'en prendront plus qu'avec des difficultez incomparables: encore y a il là dedans mille obseruations, car il n'importe que les vertebres ou le croupion de ces animaux soient données aux chiens, pour le reste il faut le jeter au feu; toutefois pour le Castor pris à la rêts, c'est le meilleur de ietter ses os dans vn fleuve, c'est chose estrange qu'ils recueillent & ramassent ces os, & les conseruent avec tant de soin, que vous diriez que leur chasse seroit perduë s'ils auoient

contreuenu à leurs superstitions: comme ie me mocquois d'eux, & que ie leurs disois que les Castors ne sçauoient pas ce que l'on faisoit de leurs os; ils me respondirent, tu ne sçais pas prendre les Castors, & tu en veux parler: deuant que le Castor soit mort tout à faict, me dirent-ils, son ame vient faire vn tour par la Cabane de celuy qui le tuë, & remarque fort bien ce qu'on fait de ses os; que si on les donnoit aux chiens, les autres Castors en seroient aduertis: c'est pourquoy ils se rendroient difficiles à prendre, mais ils sont bien aises qu'on iette leurs os au feu, ou dans vn fleuve, la rets notamment qui les a pris en est bien contente. le leur dis que les Hiroquois au rapport de celuy qui estoit avec nous, iettoient les os de Castor aux chiens, & cependant qu'ils en prenoient fort souuent, & que nos François prenoient du gibier plus qu'eux (sans comparaison) & que neantmoins nos chiens en mangeoient les os, tu n'as point d'esprit, me firent-ils, ne vois tu pas que vous & les Hiroquois cultiuez la terre

& en recueillez les fruicts, & non pas nous, & partant que ce n'est pas la même chose: ie me mis à rire entendant cette responce impertinente; le mal est que ie ne fais que beguayer, que ie prends vn mot pour l'autre, que ie prononce mal, & ainsi tout s'en va le plus souuent en risée; Que c'est vne grande peine de parler à vn peuple sans l'entendre. De plus, en leurs festins à manger tout, il faut bien prendre garde que les chiens n'en goustent tant soit peu, mais de cecy en vn autre chapitre.

Ils croyent que la gresle a del'esprit & de la connoissance, comme mon hoste faisoit festin pendant cet Hiuer, il dit à vn ieune homme, va t'en aduertir les Sauuages de l'autre Cabane qu'ils viennent quand ils voudront que tout est prest, mais ne porte point de flambeau, il estoit nuit & il gresloit fort & ferme: i'entends aussi les Sauuages sortans de leurs Cabanes, s'écrier à leurs gens, ne nous éclairez point, car il gresle. Je demanday par après la raison de cela, on me respōdit que la gresle auoit de l'esprit, & qu'elle haïssoit

la lumiere , ne venant ordinairement que sur la nuit : que si on portoit des flambeaux dehors, elle cesseroit, dont ils seroient bien marris, car elle sert à prendre l'Originac. Voila des gens biẽ entendus aux meteores, ie leur dis que la gresle n'estoit autre chose que l'eau de la pluye, qui se congeloit par la froidure, laquelle s'augmentât sur la nuit par l'eloignement du Soleil, il gresloit pluſtost qu'en plein midy: ils me repartirent à l'ordinaire, tu es vn ignorant, ne vois tu pas qu'il a faiçt froid tout le iour, & que la gresle a attendu la nuit pour venir; Je voulus repartir que la nuë n'estoit pas encore disposée, mais on me dit *eca titou eca titou nama Khitirinsin*, tais toi, tais toi, tu n'as pas d'esprit: voila la monnoye dont ils me payent, & dont ils payent bien souuent les autres sans s'alterer. Mon hoste coupoit par superstition le bout de la queue de tous les Castors qu'il prenoit, & les enfiloit ensemble. Je demanday pourquoy, le vieillard me dit, c'est vne resolution ou vne promesse qu'il a faiçt, afin de prendre beaucoup de Castors, de sçauoir à qui il fait ce vœu

ny luy, ny moy ne le sçaurions dire.

Ils mettent au feu vn certain os plat de Porc epic, puis ils regardent à sa couleur s'ils feront bonne chasse de ces animaux.

Quand quelqu'vn de leurs gens s'est égaré dans les bois, voyans qu'il ne retourne point en la Cabane, ils pendent vn fusil à vne perche pour le redresser; & cela fait, me disoient ils, qu'il voye du feu, & qu'il reconnoisse son chemin; Quand vn esprit s'est vne fois égaré du chemin de la verité, il donne bien auant dans l'erreur.

Mais à propos de leur fusil, ie diray icy qu'il n'est pas fait comme les nostres; ils ont pour meche la peau d'vne cuisse d'vn aigle, avec le duvet qui prēd feu aisement, ils battent deux pierres de mine ensemble, comme nous faisons vne pierre à fusil, avec vn morceau de fer ou d'acier: au lieu d'allumettes, ils se seruēt d'vn petit morceau de tondre, c'est vn bois pourry & bien seché, qui brusle aisement & incessamment iusques à ce qu'il soit consommé: ayant pris feu ils le mettēt dans de l'escorce de Cedre puluerisée, & soufflant

doucement cette écorce s'enflamme. Voila comme ils font du feu. l'auois porté vn fusil françois avec moy, & cinq ou six allumettes, ils s'estonnoient de la promptitude avec laquelle i'allumois du feu, le mal fut que mes allumettes furent bien tost vsées, ayant manqué d'en porter vn peu dauantage.

Ils ont encore vne autre espece de fusil, ils tournent vn petit baston de Cedre, de ce mouuement sort du feu qui allume du tondre: mais comme ie n'ay point veu l'usage de ce fusil plus familier aux Hurons qu'aux Montagnais, ie n'en diray pas dauantage.

Quand quelqu'un d'eux a pris vn Ours, il y a bien des ceremonies deuant qu'il soit mangé, vn de nos gens en prit vn. Voicy ce qu'on obserua.

Premierement l'Ours estant tué, celui qui l'a mis à mort ne l'apporte point, mais ils s'en reuient à la Cabane en donner la nouuelle, afin que quelqu'un aille voir la prise comme chose precieuse; car les Sauuages preferent la chair d'Ours à toutes leurs autres viandes: il me semble que le ieune Castor ne luy cede en rien, mais l'Ours a-

plus de graisse. Voila pourquoy il est plus aimé des Sauvages.

Secondement l'Ours a porté toutes les filles nubiles, & les ieunes femmes mariées qui n'ont point encore eu d'enfans, tant celles de la Cabane où l'Ours doit estre mangé, que des autres voisines, s'en vont dehors, & ne rentrent point tant qu'il y reste aucun morceau de cet animal, dont elles ne goustent point: Il negeoit & faisoit vn temps fort fascheux, il estoit quasi nuict quād cét Ours fut apporté en nostre Cabane: tout à l'heure les femmes & les filles sortirent, & s'en allerent Cabaner ailleurs le mieux quelles peurent non sans patir beaucoup, car ils n'ont pas tousiours des écorces à leur commandēt pour dresser leur maison, qu'ils couvrēt en tel cas de brāches de Sapin.

En troisiēsmelieu, il faut bien éloigner les chiens, de peur qu'ils ne lechent le sang, ou ne mangent les os, voire les excremens de cette beste, tād elle est chérie. On enterre ceux-cy sous le foyer, & on iette ceux-là au feu; voilce que i'obseruay en cette superstition. On fit deux banquets de cét Ours,

l'ayant fait cuire en deux chaudières, quoy qu'en mesme temps. On inuita les hommes & les femmes âgées au premier festin, lequel acheué, les femmes sortirent, puis on depêdit l'autre chaudière, dont on fit festin à manger tout entre les hommes seulement. Cela se fit le soir de la prise; le lendemain sur la nuict, ou le second iour, ie ne m'en souuiens pas bien, l'Ours estant entierement mangé, les ieunes femmes, & les filles retournerent.

Si l'oiseau qu'ils nomment *Onichatchan*, qui est quasi de la grosseur d'une pie, & qui luy ressemble, (car il est gris aux endroicts que la pie est noire, & blanc ou elle est blanche) se presente pour entrer dans leur Cabane, ils le chassent fort soigneusement, pource disent ils, qu'ils auroient mal à la teste: ils n'ë dōnent point de raison ils l'ont, si on les croit, experimenté, ie les ay veu prendre le gesier de cét animal, le fendans & regardans dedans fort attentiuement, mon hôte me dit, si ie trouue dedans vn petit os d'Originac (car cét oyseau mange de tout) ie tueray vn Orignac, si ie trouue vn os d'Ours, ie

tuera y vn Ours, & ainsi des autres animaux.

Dans la famine que nous auons enduré, nos Sauuages ne voulurent point manger leurs chiens, pource que si on tuoit vn chië pour le manger, vn hōme seroit tué à coups de hache, disoiēt-ils.

Mon hoste iettant quelques branches de pin dans le feu, il prestoit l'oreille au bruit qu'elles feroient en se brulant, prononçant quelques paroles; ie luy demanday pourquoy il faisoit cette ceremonie, pour prendre des Porcs épics, me respond il, de dire quel rapport il y a de ces branches brulées avec leur chasse, c'est ce qu'ils ne sçauent pas, & ne sçauroient sçauoir.

Ils ne mangent point la moëlle des vertebres, ou de l'espine du dos de quelque animal que ce soit, car ils auroient mal au dos, & s'ils fourroient vn baston dans ces vertebres, ils sentiroiēt vne douleur, comme si on le fichtoit dans les leur. Je le faisois expres deuant eux pour les desabuser, mais vn mal d'esprit si grand, comme est vne superstition inueterée depuis tant de siècles, & succée avec le lait de la nour-

96 *Relation de la Nouvelle France* ;

rice, ne se guerit pas en vn moment.

Ils ne mangent point les petits embrions d'Orignac, qu'ils tirent du ventre de leurs meres, sinon à la fin de la chasse de cét animal, la raison est que leurs meres les aiment, & qu'elles s'en rendroient fascheufes & difficiles à prendre, si on mangeoit leur fruiet si ieune.

Ils ne reconnoissent que dix Lunes en l'année, j'entends la pluspart des Sauvages, car i'ay fait auouër au Sorcier qu'il y en auoit douze.

Ils croyent que la Lune de Feurier est plus lōgue de plusieurs iours que les autres, aussi la nomment ils la grande Lune; Je leur ay demanday d'où venoit l'Eclypse de Lune & de Soleil; ils m'ont respondu que la Lune s'éclypsoit ou paroissoit noire, à cause qu'elle tenoit son fils entre ses bras, qui empeschoit que l'on ne vist sa clarté. Si la Lune a vn fils, elle est mariée, ou l'a été, leur dis-je, ouÿ dea, me dirent ils, le Soleil est son mary qui marche tout le iour, & elle toute la nuit; & s'il s'éclypse, ou s'il s'obscurcit, c'est qu'il prend aussi par fois le fils qu'il a eu de

la

la Lune entre ses bras : ouïy, mais ny la Lune ny le Soleil n'ont point de bras, leur disois-je, tu n'as point d'esprit: ils tiennent tousiours leurs arcs bandés deuant eux, voila pourquoy leurs bras ne paroissent point; & sur qui veulent ils tirer? hé qu'en sçauons nous. Le leur demanday que vouloient dire ces taches qui se font voir en la Lune; tu ne sçay rien du tout, me disoient ils; c'est vn bonnet qui luy couure la teste, & non pas des taches. Je m'enquis pourquoy le fils du Soleil & de la Lune n'estoit pas luisant comme ses parents, ains noir & obscur; nous n'en sçauons rien, me firent ils, nous auions esté au Ciel nous te ressemblerions. Au reste ils croyent qu'il vië quelquefois en terre, & quand il se pouruene en leur pays, ils meurent en grand dōbre. Je leur ay demandé s'ils n'auoiēt point veu de Cometes, ces Estoilles à longue queue, & ce que c'estoit; nous en auons veu, me dirent ils, c'est vn animal qui a vne grande queue, 4. pieds, & vne teste, nous voyons tous cela, disoiēt-ils. Je les interrogeay sur le tonnerre, ils me dirent qu'ils ne sçauoient pas quel animal c'estoit, qu'il mangeoit les serpents.

98 *Relation de la Nouvelle France,*
& quelquefois les arbres, que les Hurons croyét que c'est vn oiseau fort grand induit à cette creâce, par vn bruit sourd que fait vne espeece d'hirondelle qui paroist icy l'Esté: le n'ay point veu de ces oiseaux en France, i'en ay tenu icy, il a le bec, & la teste, & la figure du corps, cōme vne hirondelle, sinō qu'il est vn peu plus gros; il se pourmene le soir en l'air, faisant vn bruit pesât par reprises. Les Hurons disent qu'il fait ce bruit du derriere, cōme aussi l'oiseau qu'ils pēsent estre le tōnerre, & qu'il n'y a qu'un seul hōme qui voye cēt oiseau, & encore vne fois en sayie; c'est ce quem'ē dit mō vieillard.

Voilà vne partie de leurs superstitiōs; que de poussiere dedans leurs yeux, & qu'il y aura de peine à la faire sortir, pour leur faire voir le beau iour de la verité. Je croy neātmoins, que qui scauroit parfaitement leur langue, pour les payer promptement de bonnes raisons, qu'ils se mocqueroient eux-mesmes de leurs sottises: car par fois ie les rendois honteux & cōfus, quoy que ie ne parle que par les mains, ie veux dire par signes.

Ie veux conclurre ce chapitre par vn estōnement; on se plaint en France d'vn

Messe, si elle passe vne de mie heures; le Sermon limité d'une heure semble par fois trop long, à peine exerce l'on ces actes de Religion vne fois la semaine, & ces pauvres ignorants crient & hurlent à toute heure.

Le Sorcier les assemble souuent en plein minuit, à deux heures, à trois heures du matin, d'as vn froid qui gele tout; jour & nuit il les tient en haleine, employans, non vne ou deux heures, mais trois & quatre de suite, à faire leurs deuotions ridicules. On fait sortir les pauvres femmes de leurs Cabanes, se leuants en pleine nuit, emportants leurs petits enfans parmy les neiges chez leurs voisins. Les hommes harassés du travail du jour, ayant peu mangé & couru fort long temps, au moindre cry qu'on leur fait quittent leur sommeil, & s'en viennent promptement au lieu où se fait le Sabbat, & ce qui semblera au delà de toute creance. Je n'ay iamais veu former aucune plainte parmy eux, ny aux femmes ny aux hommes, ny mesme aux enfans. chacun se montrant prompt & allaire à la voix du Sorcier ou du jongleur, hélas! mon Dieu, les ames qui vous aiment se-

100 *Relation de la Nouvelle France,*
ront elles sans sentiment, voyants plus
de passion pour des folies, que pour la
verité? Belial est-il plus aimable que Ie-
sus? pourquoy dōc est-il plus ardāment
aimé, obey plus promptement, & plus
deuotement adoré? mais passons outre.

*Des choses bonnes qui se trouuent dans
les Sauvages.*

CHAPITRE V.

SINous commençons par les biens du
Scorps, ie diray qu'ils les possédēt avec
auantage : ils sont grands, droicts, forts,
bien proportionnez, agiles, rien d'effe-
miné ne paroist en eux. Ces petits Da-
moiseaux qu'ō voit ailleurs, ne sont que
des hōmes en peinture, à comparaison
de nos Sauvages. I'ay quasi creu autre-
fois que les Images des Empereurs Ro-
mains representoient plustost l'idée des
peintres, que des hommes qui eussent ia-
mais esté, tant leurs testes sont grosses
& puissātes, mais ie voy icy sur les épau-
les de ce peuple les testes de Iules Cesar,
de Pompée, d'Auguste, d'Othon, & des
autres que i'ay veu en France, tirées sur

le papier, ou releuées en des medailles.

Pour l'esprit des Sauvages, il est de bonne trempe, ie croy que les ames sont toutes de mesme estoc, & qu'elles ne different point substantiellemēt; c'est pourquoy ces barbares ayans vn corps bien fait, & les organes bien rangez & bien disposez, leur esprit doit operer avec facilité: la seule education & instruction leur māque, leur ame est vn sol tres bon de sa nature, mais chargé de toutes les malices qu'une terre delaissee depuis la naissance du mōde peut porter. le compare volōtiers nos Sauvages avec quelques villageois, pource que les vns & les autres sont ordinairement sans instruction; encore nos Payfans sont-ils preiquez en ce point: & neantmoins ien'ay eu personne iusques icy de ceux qui ont venus en ces contrées, qui ne confesse & qui n'aduoüe franchement que les Sauvages ont plus d'esprit que nos payfans ordinaires.

De plus, si c'est vn grand bien d'estre deliuré d'un grand mal, nos Sauvages sont heureux, car les deux tyrans qui donnent la gehenne & la torture à vn grand nombre de nos Europeans, ne re-

guent point dans leurs grands bois, i'entends l'ambition & l'avarice; Comme ils n'ont ny police, ny charges, ny dignitez, ny commandement aucun, car ils n'obeyssent que par bien-veillance à leur Capitaine; aussi ne se tuët ils point pour entrer dās les honneurs, d'ailleurs comme ils se contentent seulement de la vie, pas vn d'eux ne se donne au Diable pour acquerir des richesses.

Ils font profession de ne se point fascher, non pour la beauté de la vertu, dōt ils n'ont pas seulement le nom, mais pour leur contentement & plaisir, ie veux dire, pour s'affranchir des amertumes que cause la fascherie. Le Sorcier me disoit vn iour, parlant d'vn de nos François, il n'a point d'esprit, il se fasche, pour moy rien n'est capable de m'alterer; que la famine nous presse, que mes plus proches passent en l'autre vie, que les Hiroquois nos ennemis massacrent nos gens, ie ne me fasche iamais, ce qu'il dit n'est pas article de foy: car comme il est plus superbe qu'aucun Sauvage, aussi l'ay ie veu plus souuent alteré que pas vn d'eux; vray est que bien souuent il se retenoit, & se commādoit avec violence, notam-

ment quand ie mettois au iour ses niaferies. le n'ay iamais veu qu'un Sauuage prononcer cette parole, *Nimchoathin*, ie suis fasché encore, ne la proferail qu'une fois: mais i'aduertis qu'on prit garde à luy, car quand ces Barbares se faschent, ils sont dangereux & n'ont point de retenuë.

Qui fait profession de ne se point fascher, doit faire profession de patience, les Sauuages nous passent tellemēt en ce point, que nous en deuriens estre confus: ie les voyois dans leurs peines, dans leurs travaux souffrir avec allegresse Mon hôte admirant la multitude du peuple que ie luy disois estre en France, me demandoit si les hommes estoient bons, s'ils ne se faschoient point, s'ils estoient patients. le n'ay rien veu de si patient qu'un Sauuage malade: qu'on crie, qu'on tempeste, qu'on saute, qu'on dāse, il ne se plaint quasi iamais. Ie me suis trouué avec eux en des dangers de grandement souffrir; ils me disoient nous serōs quelquefois deux iours, quelque fois trois sans manger, faute de viure, prends courage, *Chinné*, aye l'ame dure, resiste à la peine & au travail, garde toy de la tristesse, autrement tu seras malade; regarde que nous ne laissons pas de rire,

quoy que nous mangions peu, vne chose presque seule les abbat, c'est quand ils voyent qu'il y a de la mort; car ils la craignent outre mesure; ostez cette apprehension aux Sauvages, ils supporteront toutes sortes de mespris & d'incommoditez, & toutes sortes de travaux & d'injures fort patiemment: Je produiray plusieurs exemples de tout cecy dans la suite du temps, que ie reserue à la fin de ces chapitres.

Ils s'entraiment les vns les autres, & s'accordent admirablement bien; vous ne voyez point de disputes, de querelles, d'inimitiez, de reproches parmy eux, les hommes laissent la disposition du menage aux femmes sans les inquieter, elles coupent, elles tranchent, elles donnent comme il leur plaist, sans que le mary s'en fasche. Je n'ay iamais veu mon hôte demander à vne ieune femme estourdie qu'il tenoit avec soy, que deuenoiét les viures, quoy qu'ils diminuassét assez viste. Je n'ay iamais oüy les femmes se plaindre de ce que l'on ne les inuitoit aux festins, que les hommes mangeoient les bons morceaux, qu'elles trauailloient incessamment, allans querir le bois pour le chauffage; faisant les Cabanes, passant les peaux, & s'occupans en

d'autres œuures assez penibles, chacun fait son petit affaire doucement, & paisiblement sans dispute. Il est vray neantmoins qu'ils n'ont point de douceur ny de courtoisie en leurs paroles, & qu'un François ne sçauroit prendre l'accent, le ton & l'apreté de leur voix, à moins que de se mettre en cholere, eux cependant ne s'y mettent pas.

Ils ne sont point vindicatifs entr'eux, si bien enuers leurs ennemis. Je coucheray icy vn exēple capable de confondre plusieurs Chrestiens. Dans les pressures de nostre famine, vn ieune Sauvage d'un autre quartier nous vint voir, il estoit aussi affamé que nous; le iour qu'il vint fut vn iour de ieusne pour luy & pour nous, car il ny auoit de quoy manger: le lendemain nos chasseurs ayās pris quelques Castors, on fit festin, auquel il fut tres-biē traité, on luy dit en outre qu'ō auoit veu les pistes d'un Orignac, & qu'on l'iroit chasser le lendemain; on l'invita à demeurer, & qu'il en auroit sa part, luy respōdit qu'il ne pouuoit estre dauantage; s'estant doncques enquis du lieu où étoit la beste, il s'en retourna: Nos Chasseurs ayans trouué & tué le lende-

main c'est Elan, l'enfeuelirent dās la neige, selon leur coustume, pour l'enuoyer querir au iour suiuant. Or pendāt la nuit mon ieune Sauvage cherche si biē, qu'il trouua la beste morte, & en enleue vne bōne partie sans dire mot, le larcin connu par nos gens, ils n'entrerent point en des furies, ne donnerent aucune malediction au voleur; toute leur cholere fut de se gauffer de luy, & cependāt c'estoit presque nous oster la vie, que de nous dérober nos viures, car nous n'en pouuions recouurer. A quelque temps de là, ce voleur nous vint voir, ie luy voulus représenter la laideur de son crime, mon hōste m'imposa silence, & ce pauvre hōme rejettant son larcin sur les chiens, nō seulement fut excusé, mais encore receu pour demeurer avec nous dans vne mesme Cabane. Il s'en alla donc querir sa femme, qu'il apporta sur son dos, car elle a les iambes sans mouuement; & vne ieune parente qui demeure avec luy apporta son petit fils, & tous quatre prirent place en nostre petit todis, sans que iamais on leur aye reproché ce larcin, ains au contraire on leur a tesmoigné tres-bō visage, & les a-on traittez com-

me ceux de la maison. Dites à vn Sauuage, qu'un autre Sauuage a dit pis que pendre de luy, il baissera la teste, & ne dira mot: s'ils se rencōtrrent par apres tous, ils ne feront nō plus de semblant de cela, comme si riē n'auoit esté dit, ils se traiteront comme freres, ils n'ont point de fiel enuers leur nation.

Ils sont fort liberaux entr'eux, voire ils sont estat de ne riē aimer, de ne point s'attacher aux biēs de la terre, afin de ne se point attrister s'ils les perdēt. Vn chiē déchira n'a pas long temps vne belle robe de Castor à vn Sauuage, il estoit le premier à s'en rire; l'une de leurs grādes injures parmy eux, c'est de dire cēt homme aime tout, il est auare; si vous leur refusez quelque chose, voicy leur reproche, cōme ie remarquay l'an passé, *Khisakhitan Sakhita*, tu aime cela, aime le tant que tu voudras: ils n'ouurent point la main à demy quand ils donnent, ie dis entr'eux, car ils sont ingrats au possible enuers les estrangers. Vous leur verrez nourrir leurs parents, les enfans de leurs amis, des femmes vefues, des orphelins, des vieillards, sans iamais leur rien reprocher, leur donnans abondamment

108 *Relation de la Nouvelle France,*
quelquefois des Originaux tous entiers;
c'est veritablement vne marque d'un
bon cœur, & d'une ame genereuse.

Comme il y a plusieurs orphelins par-
my ce peuple; car depuis qu'ils se sont
adonnez aux boissens de vin & d'eau de
vie, ils meurent en grand nombre; ces pau-
vres enfans sont dispersez dans les Ca-
banes de leurs oncles, de leurs tantes, ou
autres parents, ne pensez pas qu'on les
rabrouë, qu'on leur reproche qu'ils mán-
gent les viures de la maison, rien de tout
cela, on les traite comme les enfans du
pere de famille, ou du moins peu s'en
faut, on les habille le mieux qu'on peut.

Ils ne sont point delicats en leurs vi-
ures, en leur coucher, & en leurs habits,
mais ils ne sont pas nets; lamais ils ne se
plaignent de ce qu'on leur donne, qu'il
soit froid, qu'il soit chaud, il n'importe,
quand la chaudiere est cuite, on la par-
tage sans attēdre personne, non pas mes-
me le maistre de la maison, on luy garde
sa part qu'on luy presente toute froide.
I'en'ay point ouy plaindre mon hoste de
ce que l'on ne l'attendoit pas, n'estant
qu'à deux pas de la Cabane. Ils couchēt
sur la terre bien souuent, à l'enseigne des

estoyes. Ils passeront vn iour, deux & trois iours sans manger, ne laissant pas de rammer, chasser, & se peiner tant qu'ils peuvent. L'on verra dans la suite de cette relation, que tout ce que i'ay dit en ce chapitre est tres-veritable, & neantmoins i'en oserois asseurer que i'aye veu exercer aucun acte de vraye vertu morale à vn Sauvage: Ils n'ont que leur seul plaisir & contentement en veüe, adjoustez la crainte de quelque blasme, & la gloire de paroistre bons chasseurs; voila tout ce qui les meut dans leurs operations.

De leurs vices & de leurs imperfections.

CHAPITRE VI.

LEs Sauvages estans remplis d'erreurs, les ont aussi de superbe & d'orgueil. L'humilité naist de la verité, la vanité de l'erreur & du mensonge; ils sont vuides de la connoissance de la verité, & par consequent tres remplis d'eux mesmes. Ils s'imaginent que par droit de naissance ils doiuent iouir de la liberté des asnon Sauvages, ne rendant aucune subiection à qui que ce soit, sinon quand il leur plaist: Ils m'ont reproché cent fois que nous

craignōs nos Capitaines, mais pour eux qu'ils se mocquoient & se gaussioient des leur: toute l'autorité de leur chef est au bout de ses leures, il est aussi puissant qu'il est eloquent, & quand il s'est tué de parler & de haranguer, il ne sera pas obey s'il ne plaist au Sauvages.

Ie ne croy pas qu'il y aye de nation sous le ciel plus mocqueuse & plus gaousseuse que la nation des Montagnais, leur vie se passe à manger, à rire, & à railler les vns des autres, & de tous les peuples qu'ils cognoissent, ils n'ont rien de sérieux, sinon par fois, l'exterieur, faisans parmy nous les graues & les retenus: mais entr'eux sont de vrais badins, de vrais enfans, qui ne demandent qu'à rire. Ie les cachois quelquefois vn petit, notamment le Sorcier, les appellant des enfans, leurs tesmoignās que ie ne pouuois asseoir aucun iugement asseuré sur toutes leurs responses; car si ie leur demandois d'vn, ils me disoient d'autre, pour trouuer suiet de rire & de gausser: & par consequent ie ne pouuois connoistre quand ils parloient serieusement, ou quand ils se mocquoient. La conclusion ordinaire de leurs discours & de leurs entretiens, est en verité nous nous som-

mes bien mocquez d'vn tel.

J'ay fait voir dans mes lettres precedentes combien les Sauvages sont vindicatifs enuers leurs ennemis, avec quelle rage & quelle cruauté ils les traittent, les mageants apres leur auoir fait souffrir tout ce qu vn demon incarné pourroit inuenter, cette fureur est commune aux femmes, aussi bien qu'aux hommes: voire mesme elles les surpassent en ce point. J'ay dit qu'ils mangent les poux qu'ils trouuent sur eux, non pour aucun goust qu'ils y trouuēt, mais pour ce qu'ils veulent mordre ceux qu'ils mordent.

Ce peuple est fort peu touché de compassion, quand quelqu'vn est malade dans leurs Cabanes; ils ne laissent pas pour l'ordinaire de crier, de tempester, & de faire autant de bruit, cōme si tout le monde estoit en santé; ils ne sçauent que c'est de prendre soin d'vn pauvre malade, & de luy donner des viandes qui luy sont bonnes: s'il demande à boire, on luy en donne; s'il demande à manger, on luy en presente, sinon on le laisse là: del'inuiter avec amour & charité, c'est vn langage qu'ils n'entendent pas; tant qu'vn malade pourra manger, ils le por-

112 *Relation de la Nouvelle France,*

teront ou le traîneront avec eux; cesse-il de manger, ils croient que c'est fait de sa vie, ils le mettent à mort, tant pour le deliurer du mal qu'il endure, que pour se soulager de la peine qu'ils ont de le porter quand ils vont en quelque autre endroit. J'ay admiré avec cōpassion la pitié des malades que j'ay veu parmi eux.

Les Sauvages sont mesdisants au de là de ce qu'on en peut penser; ie dis mesme les vns des autres, ils n'espargnent pas leurs plus proches: ils sont avec cela fort dissimulez: car si l'un médit d'un autre, il s'en mocquent à gorge desployée: si l'autre paroist là dessus, il luy tesmoignera autant d'affection, & le traittera avec autant d'amour, comme s'il l'auoit mis iusques au troisieme ciel à force de le louer. La raison de cecy prouient à mon aduis de ce que leurs detractions & moqueries, ne sortent point d'un cœur enfielé, ny d'une bouche empestée, mais d'une ame qui dit ce qu'elle pense pour se donner carrière: & qui veut tirer du contentement de tout, voire mesme des mesdisances, & des gaufferies: cest pourquoy ils ne se troublent point; quoy qu'on leur die que d'autres se sont mocqués

qués d'eux, ou qu'ils ont blessé leur renommée: tout ce qu'ils repartent ordinairement à ces discours, c'est *mauvais*, il n'a point d'esprit, il ne sçait ce qu'il dit: & à la premiere occasion ils payeront leur detracteur en mesme monnoye, luy rendants le reciproque.

La menterie est aussi naturelle aux Sauvages que la parole, non pas entr'eux, mais enuers les estrangers: en suite de quoy l'on peut dire, que la crainte & l'espoir, en vn mot, que l'interest est la mesure de leur fidelité, ie ne me voudrois cōfier en eux, qu'autāt qu'ils craindroient d'estre punis s'ils manquoient à leur deuoir, ou qu'ils espereroient d'estre recompensés s'ils estoient fideles. Ils ne sçauent que c'est d'estre secrets, de tenir leur parole, & d'aimer avec constance; notamment ceux qui ne sont pas de leur nation, car ils sont de bon accord parmy eux, & leurs mesdisances & raileries, n'alterent point leur paix, & leur bonne intelligence.

Ie diray en passant que les Sauvages Montagnais ne sont point larrons, l'entrée leur est libre dans les demeures des François, parce qu'ils ont la main seure:

mais pour les Hurons, si on auoit autant d'yeux qu'ils ont de doigts aux mains, encore ne les empescheroit-on pas de dérober, car ils dérobent avec les pieds: ils font profession de ce mestier, & en suitt d'estre battus si on les descouure. Car cōme i'ay desia remarqué, ils porteront les coups que vous leur donnerez patiemment; non pas en reconnoissance de leur peché, mais en punition de leur stupidité, s'estans laissez surprendre en leur larcin. Je laisseray à parler d'eux aux Peres qui les sont allez voir, dont i'enuierois la condition, n'estoit que celui qui nous assigne nos departemēs est toujours aimable, & toujours adorable, quelque part ou portiō qu'il nous dōne.

Il est du manger parmy les Sauuages, comme du boire parmy les yurognes d'Europe: ces ames seiches & toujours alterées, expireroient volōtiers dās vne cuue de maluoisie, & les Sauuages dans vne marmite pleine de viandes; ceux-là ne parlent que de boire, & ceux-cy que de manger. C'est faire vne espee d'affront à vn Sauuage, de refuser les morceaux qu'il presente. Vn certain voyant que i'auois remercié mon hōste, qui me

en l'année 1634.

II5

presentoit à manger, me dit, tu ne l'aime
pas, puis que tu l'es conduits: le luy dis
que nostre coustume n'estoit pas de mā-
ger à toutes heures, que neantmoins ie
prendrois ce qu'il me donneroit, pour-
ueu qu'il ne m'en donnast guieres sou-
uent. Ils se mirēt tous à rire, & vne vieille
me dit, que si ie voulois estre aimé de
leur nation, il falloit que ie mangeasse
beaucoup. Quand vous les traittez biē,
ils témoignent le contentement qu'ils
prennent en vostre festin par ces paro-
les, *tapoué nimii son*, en verité ie mange:
comme si leur souuerain contentement
estoit en cette action: & à la fin du ban-
quet, ils diront pour action de graces, *ta-
poué nikhis poun*, veritablemēt ie suis saoul;
c'est à dire, tu m'as bien traité, j'en ay
asques à creuer; j'ay desia me semble re-
marqué cecy. Ils croient que c'est bestie-
rie & stupidité de refuser le plus grād cō-
tentement qu'ils puissent auoir en leur
paradis, qui est le ventre. Je m'écrierois
colōtiers, ô iuste iugement de Dieu, que
le peuple qui met sa dernière fin à māger
oit tousiours affamé, & ne soit point re-
ueu que comme les chiens, car leurs fe-
ins les plus splendides ne sont pour

ainsi dire, que les os & les reliefs des tables d'Europe; La premiere action qu'ils font le matin à leur resueil, c'est d'estendre le bras à leur escuelle d'escorce gaignie de chair, & puis de manger. Au commencement que ie fus avec eux, ie voulus introduire la coustume de prier Dieu deuant que de manger, & de fait ie donnois la benedictiō quand ils le vouloient faire: mais l'Apostat me dit, si vous voulez prier autant de fois qu'on mange dans la Cabane, préparés vous à dire vostre *Benedicite* plus de vingt fois auant la nuit. Ils finissent le iour comme ils commencent, ils ont encore le morceaū à la bouche, ou le calumet pour petune quand ils mettent la teste sur le cheueu pour reposer.

Les Sauvages ont tousiours esté gourmands, mais depuis la venuë des Europeans, ils sont deuenus tellement yurgnes, qu'encore qu'ils voyent bien que ces nouvelles boissōns de vin & d'eau de vie, qu'on leur apporte depeuplēt leur pays, & qu'eux mesmes s'en plaignent, ils ne scauroient s'abstenir de boire, faisant gloire de s'en yurer, & d'en yurer les autres. Il est vray qu'ils meurēt en grand

ombre, mais ie m'estonne encore com-
e ils peuuent si long temps resister, car
onnez à deux Sauuages deux & trois
outeilles d'eau de vie, ils s'asseoiront,
sans manger boirôt l'un apres l'autre,
ques à ce qu'ils les ayent vuidées. La
mpagnie de ces Messieurs est merueil-
sement loüable, de defendre la trait-
de ces boissons. Monsieur de Cham-
in fait tres sagement de tenir la main
e ces deffences soient gardées. J'ay
pris que Mōsieur le General du Plessis
a fait obseruer à Tadoussac. On m'a-
it dit que les Sauuages estoient assez
astes, ie ne parleray pas de tous, ne les
at pas tous frequentez, mais ceux que
y conuersez sont fort lubriques, & hō-
es & femmes. Dieu quel auenglemēt?
el bō-heur du peuple Chrestien: que
chastiment de ces Barbares! au lieu
e par admiratiō nous disons assés sou-
nt, **IESVS** qu'est cela! mon Dieu qui a
t cela? ces vilains & ces infames pro-
ncent les parties des-honestes de
omme & de la femme. Ils ont inces-
ment la bouche puante de ces ordu-
, & mesmes iusques aux petits enfāts,
si leur disois-je par fois, que si les

pourceaux & les chiens scauoient parler ils tiendroient leur langage. Il est vray que si l'impudique Sorcier ne fust pas venu dās la Cabane où i'estois, i'auois gainé cela sur mes gens, qu'aucun n'osoit parler des choses des-honnestes en ma presence, mais cēt impudent autorisoit les autres. Les femmes vn peu âgées te chauffent presque toutes nuës, les filles & les ieunes femmes, sont à l'exterieur tres honnestement couuertes, mais entre elles leur discours sont puants, comme des cloaques. Il faut neātmoins aduouer que si la liberré de se gorger de ces immondices estoit parmy quelques Chrestiens, cōme elle est parmy ces peuples, on verroit bien d'autres monstres d'excez qu'on ne voit pas icy; veu mesme que nonobstant les loix Diuines & humaines, la dissolution y marche plus descouuert que non pas icy. Car les yeux n'y sont point offensez. Le seul Sorcier fait en ma presence quelque action brutale, les autres battoient seulement mes oreilles, mais s'apperceuants que ie le entendois, ils en estoient honteux.

Or comme ces peuples connoissent bien cette corruption, ils prennent plu

toſt les enfans de leurs ſœurs pour héritiers, que leurs propres enfans, ou de leurs freres, reuoquans en doute la fidelité de leurs femmes, & ne pouuâts douter que ces nepueux ne ſoient tirez de leur ſang, auſſi parmy les Hurons, qui ſont plus ſales que nos Montagnais; pource qu'ils ſont mieux nourris, l'enfant d'un Capitaine ne ſuccede pas à ſon pere, mais le fils de ſa ſœur.

Le Sorcier me diſant vn iour que les femmes l'aimoient, car au dire des Sauvages, c'eſt ſon genie que de ſe faire aimer de ce ſexe. Je luy diſ que cela n'eſtoit pas beau qu'une femme aimast vn autre que ſon mary; & que ce mal eſtât parmy eux, luy meſme n'eſtoit pas aſſeuré, que ſon fils qui eſtoit là preſent, fut ſon fils. Il me repartit, tu n'as point d'eſprit: vous autres François vous n'aimez que vos propres enfans, mais nous, nous cheriſſons vniuerſellement tous les enfans de noſtre nation, ie me mis à rire, voyant qu'il philoſophoit en cheual & en mulet.

Après toutes ces belles qualitez, les Sauvages en ont encore vne autre plus onereuſe que celles dont nous auons parlé, mais non pas ſi meſchante; c'eſt

leur importunité enuers les estrangers. Il y coustume d'appeller ces côtrées là, le pays d'importunité enuers les estrangers, pource que les mouches, qui en font le symbole, & le hierogliphique, ne vous laissent reposer ny iour ny nuict: pendant quelques mois de l'Esté, elles nous assaillent avec telle furie, & si continuellement, qu'il n'y a peau qui soit à l'espreuve de leur aiguillō: tout le monde leur paye de son sang pour tribut. J'ay veu des personnes si enflées apres leurs picqueures, qu'on croyoit qu'ils perdroient les yeux, qui ne paroissoient quasi plus: or tout cela n'est rien, car enfin cette importunité se chasse avec de la fumée, que les mouches ne scauroient supporter, mais ce remede attire les Seruages: s'ils scauent l'heure de vostre dîner, ils viennent tout exprez pour auoir à manger, ils demandēt incessamment, mais avec des presses si reiterées, que vous diriez qu'ils vous tiennent tousiours à la gorge: faites leur voir quoy que ce soit, s'il est tant soit peu à leur vsage: ils vous diront l'aime tu? donne le moy.

Vn certain me disoit vn iour, qu'en son

ays on ne sçauoit point conjuguer le
erbe *do*, au present, encore moins au
preterit: les Sauuages ignorent tellemēt
ette coniugaison, qu'ils ne vous donne-
oient point la valeur d'une obole, s'ils
e croient, pour ainsi dire, retirer vne pi-
tole; ils sont ingrats au dernier point.

Nous auons icy tenu & nourry fort
ong temps nostre Sauuage malade, qui
e vint ietter entre nos bras pour mourir
Chrestien, cōme i'ay remarqué cy-des-
us: tous ces cōpatriottes estoient estō-
uez du bon traitement que nous luy
faisions, ses enfants en la consideration,
pporтерent vn peu de chair d'Elan; on
leur demanda ce qu'ils vouloient en es-
change, car les presents des Sauuages
sont des marchez: ils demanderent du
vin & de la poudre à Canon, on leur re-
part qu'on ne leur en pouuoit donner;
que s'ils vouloient autre chose que nous
eussions, on leur donneroit tres volon-
tiers, on leur donna fort bien à manger,
& pour conclusion ils remporterēt leurs
viandes, puisqu'on ne leur donnoit ce
qu'ils demandoient, menaçant qu'ils
viendroient requerir leur pere, ce qu'ils
dirent; mais le bon hōme ne voulut pas

122 *Relation de la Nouvelle France,*
nous quitter; de cét échantillon, iugez
de la piece.

Or ne pensez pas qu'ils se comportent
ainsi entr'eux, au contraire, ils sont tres
reconnoissants, tres liberaux, & nulle-
ment importuns enuers ceux de leur na-
tion. S'ils se cōportent ainsi enuers nos
François, & enuers les autres estrangers,
c'est à mon aduis que nous ne voulons
pas nous allier avec eux comme freres,
ce qu'ils souhaitteroient grandement;
mais ce seroit nous perdre en trois iours:
car ils voudroient que nous allassions
avec eux manger de leurs viures tant
qu'ils en auroient, & ils viendroiēt aussi
manger les nostres tāt qu'ils dureroiēt:
& quand il n'y en auroit plus, nous nous
metterions tous à en chercher d'autres.
Voila leur vie qu'ils passent en festins
pendāt qu'ils ont de quoy; mais comme
nous n'entendons rien à leur chasse, &
que ce procedé n'est pas loüable, on ne
veut pas leur prester l'oreille. C'est pour-
quoy ne nous tenants point comme de
leur nation, ils nous traittent à la façon
que j'ay dit. Si vnesträger quel qu'il soit
se iette de leur party, ils le traiteront
comme eux. Vn ieune Hiroquois, auquel

ils auoient donné la vie, estoit comme enfant de la maison; que si vous faites vostre mesnage à part mesprisants leurs loix, ou leurs coustumes, ils vous succeront s'ils peuuent iusques au sang Il n'y a mouche, ny guelpe, ny taon, si importun qu'un Sauuagé.

Le suistantost las de parler de leurs desordres, disons quelque chose de leur saleté, & puis finissons ce chapitre.

Ils sont sales en leurs habits, en leurs postures, en leurs demeures, & en leur manger, & cependant il n'y a aucune inciuilité parmy eux; car tout ce qui donne du contentement aux sens, passe pour honeste.

L'ay dit qu'ils sont sales en leurs demeures, l'aduenuë de leurs Cabanes est vne grange à pourceaux. Iamais ils ne balient leur maison, ils la tapissent au cōmencement de branches de pin, mais au troisieme iour ces brâches sont pleines de poil, de plumes, de cheveux, de coupeaux, de raclure de bois, & cependant ils n'ont point d'autres sieges, ny d'autres lits pour se coucher, dōt l'on peut voir de quelle saleté peuuent estre chargez leurs habits: vray est que ces or-

124 *Relation de la Nouvelle France,*
dures & saletez ne paroissent pas, tant
dessus leurs robes, que dessus les nostres.

Le Sorcier quittant nostre Cabane
pour vn temps, me demanda mon man-
teau, pource qu'il faisoit froid, disoit-il;
comme si i'eusse esté plus dispensé des
loix de l'Hiver que non pas luy: ie luy
prestay, s'en estant seruy plus d'un mois,
en fin il me le rēdit si vilain, & si sale, que
i'en estois honteux, car les flegmes & au-
tres immondices qu'il couuroient, luy
donnoient vn autre teinture. Le voyant
en cēt estat, ie le dépliay exprez deuant
luy, afin qu'il le vit; connoissant bien ce
que ie voulois dire, il me dit fort à pro-
pos, tu dis que tu veux estre Mōtagnais
& Sauvage comme nous, si cela est, ne
sois pas marry d'en porter l'habit; car
voilà comme sont faites nos robes.

Quand est de leur posture, elle suit la
douceur de leur commodité, & non
les regles de la bien-seance: les Sauua-
ges ne preferent jamais ce qui est hon-
neste à ce qui est delectable. I'ay veu sou-
uent le prerendu magicien couché tout
nud, hormis vn mechant brayer plus sa-
le qu'un torchon de cuisine, plus noir
qu'un écouillō de four, retirer vne de ses

iambes contre la cuisse, & mettre l'autre sur son genouil releué, haraguant les gens en cette posture, son auditoire n'auoit pas plus de grace.

Pour leur manger, il est tant soit peu plus net que la mangeaille que l'on donne aux animaux, & non pas encore toujours, ie ne dis rien par exaggeration, i'en ay gousté & vescu quasi six mois durant. Nous auions trois écrouélés en nostre Cabane, le fils du Sorcier qui les auoit à l'oreille d'une façon fort sale, & pleine d'horreur; son neveu qui les auoit au col, vne fille qui les auoit sous vn bras; ie ne sçay si ce sont vrayes escrouëlles, quoy qu'il en soit, ce mal est plein de pus, couuert d'une croute fort horrible à voir: ils en sont quasi tous frappez en leur ieunesse, tant pour leur saleté, que pource qu'on ne fait point de difficulté de boire & de manger avec des malades. Je les ay veu cent fois patroüiller dans la chaudiere où estoit nostre boisson commune, y laver leurs mains, y boire à pleine teste comme les bestes, reietter leurs restes là dedans; car c'est la coustume des Sauvages, y fourrer des bastons demy brulés, & pleins de cendre, y plonger de

leur vaisselle d'escorce pleine de graisses, de poil d'Orignaux, de cheueux, y puiser de l'eau avec des chaudrons noirs comme la cheminée: & après tout cela, nous beuions tous de ce broüet, noir comme de l'ambrosie. Cen'est pas tout, ils reietterent là dedās les os qu'ils ont rongé, puis vous mettent de l'eau ou de la neige dans la chaudiere, la fõt bouillir, & voila del'hipocras. Vn certain iour des souldiers venant d'estre quittés, tomberent dās nostre boisson, ils se lauerent à leur aise, on les retira sans autre ceremonie puis on beut apres eux comme si rien ne fut arriué. Je ne suis pas bien delicat si est-ce que ie n'eus point de soif tant que cette maluoisie dura.

Iamais ils ne lauent leurs mains exprés pour manger, encore moins leur chaudiere, & point du tout la viande qu'ils fõt cuire, quoy que le plus souuent (ie le dis comme ie l'ay veu cent & cent fois) elle soit toute couuerte de poil de bestes, & de cheueux de leurs testes: Je n'ay iamais beu aucun boüillon parmy eux, qu'il ne m'aye fallu jetter quantité de ces poils & de ces cheueux, & bien d'autres ordures; comme des charbons, des petits

morceaux de bois, & mesme du baston
ont ils attiré le feu, & remuent bien
souuent ce qui est dans la chaudiere: ie
esay veu par fois prédre vn tison ardét,
le mettre dās la cendre pour l'esteindre:
puis quasi sans le secoüer, le tremper dās
la chaudiere ou trempoit nostre disner.

Quand ils font secherie de la chair, ils
nous ietteront par terre tout vn costé
d'Orignac, ils le battent avec des pier-
res; ils marchent dessus, le foulent avec
leurs pieds tout sales, les poils d'hōmes
& de bestes, les plumes d'oiseaux s'ils en
ont tué, la terre & la cendre; tout cela
s'incorpore avec la viande, qu'ils font
quasi durcir comme du bois à la fumée;
puis quand ils viennent à manger de ce
boucan, tous s'en va de compagnie dans
l'estomach, car ils nont point d'eau de
respert: en vn mot ils croient que nous
auons point d'esprit de lauer nostre
viande, car vne partie de la graisse s'en
va tousiours avec l'eau.

Quand la chaudiere commence a bouil-
lir, ils recueillent l'écume fort soigneuse-
ment, & la mangent avec delices: ils m'en
resentoient avec faueur, ie la trouuois
bonne durant nostre famine, mais depuis

128 *Relation de la Nouvelle France*

venant par fois à les remercier de ce present, ils n'appelloient superbe & orgueilleux: ils chassent au rats & aux souris par plaisir, comme aux lieures, & les trouuent également bons.

Les Sauvages ne mangent pas comme nos François dās vn plat, ou autre vaisselle commune à tous ceux qui sont à table, l'vn d'entreux descend la chaudiere de dessus le feu, & fait les parts à vn chacun, presentant par fois la viande au bout d'vn baston, mais le plus souuent sans prendre ceste peine, il vous iettera vne piece de chair toute brulante, & pleine de graisse, cōme on ietteroit vn os à vn chien, disant *Nakhimitchimi*, tiens, voila ta part, voila ta nourriture; si vous estes habile homme, vous la retenés avec les mains, sinon garde que la robe ne s'en sente, où que les cendres ne seruent de sel, puisque les Sauvages n'en ont point d'autre.

Ie me suis veu bien empesché au commencement, car n'osant couper la chair qu'ils me donnoient dās mon plat d'écorce de peur de le blesser, ie ne sçauois comment en venir à bout, n'ayant point d'alfiette. En fin il se fallut faire tout à tout, deuenir Sauvages avec les Sauvages: le

iettay

Je mettray les yeux sur mon compaignon,
puis ie taschay d'estre aussi braue hom-
me que luy. Il prend sa chair à pleine
main, & vous la coupe en morceaux apres
morceaux, comme on feroit vne piece
de pain, que si la chair est vn peu dure,
ou qu'elle cede au cousteau pour estre
trop molasse; ils vous la tiennent d'vn
côté par les dents, & de l'autre avec la
main gauche, puis la main droite iouë
dessus du violon, se seruât de cousteau
pour archet: & cecy est si commun par-
my les Sauvages, qu'ils ont vn mot pro-
pre pour exprimer cette actiõ, que nous
ne pouuons expliquer qu'en plusieurs
paroles & par circumloquution. Si vous
regardez vostre cousteau, comme il n'ya
point de couteliers dans ces grâds bois,
vous estes condamnez à prendre vostre
portion à deux belles mains, & mordre
dans la chair & dans la graisse aussi bra-
vement, mais non pas si honnestement
que vous feriez dans vn quartier de pô-
le; Dieu sçait si les mains, si la bouche,
ou vne partie de la face reluisent par
suyes: le mal est que ie ne sçauois à quoy
essuyer; de porter du linge, il faudroit
à mulet, ou bien faire tous les jours la

130 *Relation de la Nouvelle France,*
lessiue: car en moins de riē tout se change en torchon de cuisine dans leurs Cabanes. Pour eux ils torchēt leurs mains leurs cheueux, qu'ils nourrissent fort longs, d'autrefois à leurs chiens: ie veī vne femme qui m'apprit vn secret, elle nettoya ses mains à ses fouliers, ie fis le mesme; ie me seruois aussi de poil d'Orignac, & de branches de pin, & notamment de bois pourry puluerisé, ce sont les essuyemains des Sauuages; on ne s'esfrotte pas si doucement comme d'une toile d'Hollande, mais peut-estre plus gayement & plus ioyeusement. C'est assez parlé de ces ordures.

Des viandes & autres mets dont mangent les Sauuages, de leur assaisonnement, & de leurs boissons.

CHAPITRE VII.

Entre les animaux terrestres il y a des Elans, qu'on appelle ordinairement icy des Originaux, des Castors que les Anglois nomment des Bieures des Caribōs, qualifiez par quelques vices des Sauvages: ils ont encore des Ours

des Blereaux, des Porcs épics, des Re-
cards, des Lieures, des Siffleurs ou Ros-
gnols, c'est vn animal plus gros qu'vn
neure; ils mangent en outre des Mar-
nes, & des Ecurieux de trois especes.

Pour les oiseaux, ils ont des Outardes,
des Oyes blâches & grises, des Canards
de plusieurs especes, des Sarcelles, des
ternaches, des Plongeurs de plusieurs
ortes; ce sont tous oiseaux de riuere,
s prennent encore des Perdrix ou de
elinottes grises, des Beccasses & Bec-
assines de quantité d'especes, des Tour-
relles, &c.

Quand au Poisson, ils prennent en vn
emps des Saulmons de diuerses sortes,
des Loups marins, des Brochets, des
Carpes, & Esturgeons de diuerses espe-
es, des Poissons blancs, des Poissons,
orez, des Barbuës, des Anguilles, des
amproyes, de L'esplanc, des Tortues
autres.

Ils mangent en outre quelques petits
ruits de la terre, des framboises, des
leuës, des fraises, des noix qui n'ont
uasi point de chair, des noisettes, des
ommes sauuages plus douces que cel-
s de France, mais beaucoup plus peti-

312 *Relation de la Nouvelle France,*

res; des cerises, dont la chair & le noyau ensemble ne sont pas plus grosses que les noyaux des Bigarreaux de France. Ils ont encore d'autres petits fruiçts Sauvages de diuerles sortes, des Lambrouches en quelques endroicts : bref tout ce qu'ils ont de fruit (ostez les fraises & les framboises qu'ils ont en quantité) ne vaut pas vne seule espece des moindres fruiçts de l'Europe.

Ils mangent en outre des racines comme des oignons de martagons rouges, vne racine, qui a goust de reglisse, vne autre que nos François appellent des chapelets, pource qu'elle est distinguée par nœuds en forme de grains, & quelques autres en petit nombre.

Quand la grande famine les presse, ils mangent des racleures ou des escorces d'un certain arbre, qu'ils nomment *Michtan*, lesquels ils fendent au Printemps pour en tirer vn suc doux comme du miel, ou cōme du sucre: à ce que m'ont dit quelques vns, mais à peines s'amusent ils à cela tant il en coule peu.

Voila les viandes & autres mets, dont se repaissent les Sauvages des contrées où nous sommes; l'obmets sans doute

plusieurs autres especes d'animaux, mais ils ne merueiennent pas maintenant en la memoire.

Outre ces viures que ce peuple tire de son pays sans cultiuer la terre, ils ont encore des farines & des bleds d'Inde; & ils troquent pour des peaux d'Orinac avec les Hurons, qui descendent jusques à Kebec, ou jusques aux trois rivières. Ils acheptēt encore du Petun de cette nation, qui quasi tous les ans en a porté en grande quantité.

De plus, ils ont de nos François de la lette, du biscuit, du pain, des pruniaux, des pois, des racines, des figues, & choses semblables. Voila de quoy se nourrit ce pauvre peuple.

Quand à leurs boissons, ils n'en font aucune ny de racines ny de fruiçts, se contentans d'eau pure, il est vray que le bouillon dans lequel ils ont cuit la viande, & vn autre bouillon qu'ils font d'os de bœuf concassez & brisez, seruent aussi de boisson. Vn certain villageois disoit de France, que s'il eust esté Roy il n'eut rien que de la gresse, les Sauvages en feroient assez souuent, voire mesme ils mangent & mordent dedans, quand

elle est figée, comme nous morderion
dans vne pomme. Quand ils ont fai
cuire vn Ours bien gras ou deux ou tro
Castors dans vne chaudiere, vous l
verriez ramasser & recueillir la gres
sur le bouillō, avec vne large cuillier d
bois, & gouster cette liqueur comm
le plus doux Parochimel qu'ils ayen
quelquesfois ils en remplissent vn grat
plat d'escorce, qui faiēt la ronde à l'en
tour des conuiez au festin, & chacun e
boit avec plaisir. D'autres ayant rama
sé cette gresse toute pure, ils iettent d
dans quantité de neige; ce qu'ils font
encore dans le bouillon gras, quand i
veulent boire vn peu froid, vous verriez
de gros morceaux de gresse figée sur
breuuage, & neantmoins ils le boient
& l'auallent comme de l'Hipocras. Vo
là à mon aduis toutes les sortes de boi
sons qui se retreuuent parmy nos Sa
uages, & dont ils m'ont faiēt gouster
Hiuer. Il a esté vn temps qu'ils auoient
horreur de nos boissons d'Europe, mais
ils se vendroient maintenant pour
auoir tant ils les aiment. Je me suis qu
si oublié de dire qu'ordinairement i
boient chaud ou tiede, ils me tançoient

par fois, me voyant boire de l'eau froide, me disants que ie serois maigre, & que cela me refroidiroit iusques dans les os.

De-plus, ils n'entremeslent point le manger & le boire comme nous, mais on distribue premierement la chair ou les autres mets, puis ayant mangé ce qu'ils veulent, on partage le bouillon, où on le met en certain endroict, & chacun y va boire qui veut.

Disons pour conclusion de ce poinct, que les Sauvages avec tant d'animaux, tant d'oiseaux & de poissons, sont quasi tousiours affamez; la raison est, que les oiseaux & les poissons sont passagers, s'en allant & retournât à certain temps, & avec cela ils ne sont pas trop grands gybboyeurs, & encore moins bons ménagers, car ce qu'ils tuent en vn iour ne void pas l'autre, excepté l'Elan & l'Anguille, dont ils font secherie quand ils en ont en grande abondance, si bien que pendant le mois de Septembre & octobre, ils vivent pour la plus part d'anguilles fresches en Novembre Decembre, & souuent en Ianuier, ils mangent leurs anguilles boucanées, & quelques Porcs

136 *Relation de la Nouvelle France,*
epics qu'ils prennent pendant les petites neiges, cōme aussi quelques Castors s'ils en trouuent. Quand les grandes neiges sont venuës ils mangent l'Orignac frais, ils le font seicher pour se nourrir le reste du temps iusques en Septembre, avec quelques oiseaux, quelques Ours & Castors qu'ils prennent au Printemps & pendant l'Esté: Or si toutes ces chasses ne donnent point (ce qui n'arrive que trop souuent pour eux) ils souffrent grandement.

De leurs festins.

CHAPITRE VIII.

IL n'y a que les chasseurs effectiuement & ceux qui l'ont esté, qui soient ordinairement conuiez aux festins, les femmes veufues y vont aussi: notamment si ce n'est pas vn festin à manger tout, les filles, les femmes mariées, & les enfans en sont quasi tousiours exclus. Ie dis quasi tousiours, car par fois on les inuite, ie leur ay veu faire des *Acoumagouchanai*, c'est à dire des festins à ne rien laisser, auxquels tout le monde se trouuoit, les

hōmes, fēmes, & petits enfans: quand ils ont grāde abondance de viures, les femmes font quelquefois des festins par entr'elles, où les hōmes ne se trouuēt point.

Leur façon d'inuiter est sans fard & sans ceremonie, quand tout est cuit & prest à manger (car on n'inuite personne au parauant) quelqu'un s'en va par les Cabanes où sont ceux qui doivent estre conuiez, ou bien mesme on leur criera ce mot du lieu où se fait le festin *khinatomigaouinaouau*, vous estes inuitez au banquet, les hommes auxquels ce mot s'adresse, respondent *ho ho*, & prenant sur l'heure mesme leur plat d'escorce & leur cueiller de bois, s'en viennent en la Cabane de celuy qui les traite. Quand tous les hommes ne sont pas inuitez, on nomme ceux qu'on veut conuier; le deffaut de ceremonies fait épargner beaucoup de paroles à ces bonnes gens. Il me semble qu'au siecle d'or on faisoit comme cela, sinon que la netteté y estoit en plus grande recommandation que parmy ces peuples.

Dans tous les festins, comme aussi dans leurs repas ordinaires, on donne à vn chacun sa part, d'où vient qu'il n'y en a

138 *Relation de la Nouvelle France*,
que deux ou trois qui ayēt les meilleurs
morceaux, car ils ne les diuisent point:
ils donneront par exemple la langue
d'un Orignac, & toutes ses appartenan-
ces à vne seule personne, la queuë & la
reste d'un Castor à vn autre; voila les
meilleures pieces, qu'ils appellent *Mas-*
canou, la part du Capitaine. Pour les boy-
aux gras de l'Orignac, qui sont leurs
grands delices, ils les font ordinaire-
ment rostir & en font goustier à tous,
comme aussi d'un autre mets, dont ils
font grand estat, c'est le gros boyau de
la beste remply de gresse, & rosty avec
vne corde qui pend & tourne deuant
le feu.

Au reste ils sont magnifiques en ces
festins, car ils ne presentent que les bon-
nes viandes les separants exprés, & don-
nant à chacun tres abondamment,
quand ils en ont.

Ils ont deux sortes de festins, les vns à
manger tout, les autres à mâger ce qu'on
voudra, remportant le reste pour en fai-
re part à leur famille. Cette derniere fa-
çon me semble loüable, car il n'y a point
d'excez, chacun prend autant qu'il luy
plaist de la portion qui luy est donnée;

voire i'oserois dire que c'est vne belle inuention pour conseruer l'amitié entr'eux, & pour se nourrir les vns les autres: car ordinairement les peres de famille ne mangent qu'une partie de leurs mets, portans le reste à leurs femmes & à leurs enfans, le mal est qu'ils font trop souvent des festins dans la famine que nous auons enduré: si mon hoste prenoit deux, trois, & quatre Castors, tout aussi tost fut-il iour, fut-il nuit on en faisoit festin à tous les Sauuages voisins, & si eux auoient pris quelque chose, ils en faisoient de mesme à mesme temps: si que sortant d'un festin vous allez à un autre, & par fois encore à un troisieme, & un quatrieme. Le leur disois qu'ils ne faisoient pas bien, & qu'il valoit mieux reseruer ces festins aux iours suiuaus, & que ce faisant nous ne serions pas tant pressés de la faim; ils se mocquoient de moy, demain (disoient-ils) nous ferons encore festin de ce que nous prendrons; ouï mais le plus souvent ils ne prenoient que du froid & du vent.

Pour leurs festins à ne rien laisser, ils sont tres blamables, & c'est neantmoins l'une de leurs grandes deuotions, car ils

140 *Relation de la Nouvelle France,*
font ces festins pour auoir bonne chasse,
il se faut bien donner de garde que les
chiens n'en goustent tant soit peu, tout
seroit perdu, leur chasse ne vaudroit rien;
Et remarquez que plus ils mangent plus
ce festin est efficace; de là vient qu'ils don-
neront à vn seul homme, ce que ie ne
voudrois pas entreprendre de manger,
auec trois bons disneurs, ils creueroient
plustost, pour ainsi dire, que de rien laisser.
Vray qu'ils se peuuent ayder les vns les
autres; quand quelqu'un n'en peut plus,
il prie son compagnon de l'assister, où bien
l'on fait passer son reste pardeuant les au-
tres qui en prennent chacun vne partie,
& apres tout cela s'il en reste on le iette au
feu; celey qui mange le plus est le plus
estimé, vous les entendez raconter leurs
proüesses de gueule, specifiants la quan-
tité & les parties de la beste qu'ils ont mā-
gé; Dieu sçait quelle musique apres le
banquet, car ces Barbares donnent toute
liberté à leur estomach & à leur ventre,
de tenir le langage qui leur plaist pour se
soulager; quand aux odeurs qu'on sent
pour lors dans leurs Cabanes, elles sont
plus fortes que l'odeur des roses, mais elles
ne sont pas si douces, vous les voyez ha-

leter & souffler comme des gens remplis iusques au gosier; & de faiët comme ils sont nuds, ie les voyois enflez iusques à la gorge, encore ont ils du courage là dedans, leur cœur retient ce qu'on luy donne, ie n'ay veu que l'estomach du Sorcier mécontent de ce qu'on luy auoit donné, quantité d'autres en approchoient de bien près, mais ils tenoient bon. l'en ay veu par fois de malades apres ces excez.

Mais venons à l'ordre qu'ils gardent en ces banquets; Ceux qu'on doit traiter estans conuiez à la façon que i'ay dit, ils s'en viennent avec leur *ouragan*, ou escuelle leur cuillier, ils entrent dans la Cabane sans ceremonie, chacun prenant sa place comme il vient, ils s'asseoient en rond à l'entour de la chaudiere qui est sur le feu, renuerfant leur plat deuant eux, leurs sieges, c'est la terre couuerte de branches de pin, il n'y a point de preface, toutes les parties d'un cercle sont aussi courbées, & aussi nobles les vnes que les autres, quelques fois l'un d'eux dira à celui qui entre, *Outaiappitou*, viens icy, sieds toy là.

Chacun ayant pris sa place & s'estant assis en forme de Guenon, retirant ses

jambes contre les cuisses, si c'est vn festin à manger tout, on ne dit mot, on chante seulement, & s'il ya quelque Sorcier ou *Manitousson*, il bat son tambour; vray qu'ils ne sont pas tousiours si religieux qu'ils ne tiennent quelque petit discours. Si le festin n'est pas à ne rien laisser, ils s'entretiennent vn peu de temps de leurs chasses, ou d'autres choses semblables, le plus souuent de gausseries.

Après quelques discours, le distributeur du festin, qui est ordinairement celui qui le fait, descend la chaudiere de dessus le feu, ou les chaudières s'il y en a plusieurs, les mettât deuant soy, & lors il fait quelque harâgue ou semet à châter, & tous les assistans avec luy; quelquefois il ne fait ny l'vn ny l'autre, mais seulement il dit les mots de l'entrée du festin. qui ne s'obmettent iamais, c'est à dire qu'il declare de quoy il est composé: par exemple il dira, hommes qui estes icy assemblez, c'est vn tel qui fait le festin, ils respondent tous du fond de l'estomac *hò-ô-ô* le festin est composé de chair de Castor, ils poussent de rechef leur aspiration *hò-ô-ô*, il y a aussi de la fa-

Une de bled d'Inde *hò-ô-ô*, respondent ils, à chaque diuersité de mets.

Pour les festins moins solempnels, ce-
luy qu'il faiet s'adressant à quelqu'un
de ses amis, ou de ses parents, il luy dira,
mon cousin, ou mon oncle, voila le Ca-
stor que j'ay pris, nous le mangerons
maintenant, & alors tout le monde dit
son *hò-ô-ô*, & voila le festin ouuert, du-
quel on ne sort point, que les mots par
lesquels on le conclud ne soient dictz.
Cela fait, le distributeur ramasse quel-
quefois la gresse de dessus la chaudiere
& la boit luy tout seul, d'autres fois il en
fait part à ses amis, quelquefois il en
remplit vn grand & profond plat qu'il se
presente à tous les conuiez comme j'ay
dit, & chacun en boit sa part; si le festin
est de pois, de farine, de bled d'Inde, ou
de choses semblables demy liquides, il
prend les *Ouragans*, ou escuelles d'un
chacun, & distribue la chaudiere, le plus
esgalement qu'il luy est possible, leurs
rendant leurs plats bien garnis, sans re-
garder par quel bout il commence; il n'y
a ny honneur ny blasme d'estre party le
premier ou le dernier. Si le festin est de
viande, il la tire avec vn baston pointu,

144 *Relation de la Nouvelle France,*

la met dans des plats d'escorce de uan
foy, puis ayant ietté les yeux sur le nom-
bre des conuiez, il l'a distribue comme il
luy plaist, donnant à chacun abondam-
ment, non pas egalelement. Car il donnera
les friants morceaux à ses confidens,
voire mesme quand il a donné à tous vne
bonne piece, commençant par ceux qui
ne sont pas de sa Cabane, il rechargera
iusques à deux & trois fois & non pas
pour les autres, personne ne s'offence de
ce procedé, car c'est la coustume.

Il presente ordinairement la chair au
bout d'un baston, nommant la piece ou
la partie de l'animal qu'il donne, en cette
façon; si c'est la teste d'un Castor, ou d'As-
ne sauuage, ou d'autre animal, il dira
Nichta Koustigouanime; Mon cousin, voila
ta teste, si c'est vne espale, il dira voila
ton espale, si ce sont des boyaux, il en
dira de mesme, d'autres fois ils disent sim-
plemēt, *Khimitchimi*, voila ton mets: mais
prenez garde qu'ils n'ont point l'equi-
que en leur langue que nous auons en la
nostre. On raconte d'un certain, lequel
rencontrant son amy, luy dit par courtoi-
sie, si i'auois quelque chose digne de
vous, ie vous inuiterois à des-jeuſner en
nostre

nostre maison, mais ie n'ay rien du tout, son valet l'entendant luy repartit à la bõne foy, excusez-moy Monsieur, vous auez vne teste de veau, cela dit en l'âge Monagnais n'a rien de ridicule, pource qu'ils n'ont point d'equiuoque en ces termes, les mots qui signifient ma teste propre & la teste d'animal qui m'est donnée estants differents.

Celuy qui fait le festin & qui le distribue ne fait iamais sa part, il se contente de voir manger les autres sans se rien retenir pour soy; neantmoins quand il y a peu de viures, si tost qu'il a tiré la viande de la chaudiere, son voisin ou son amy choisit les meilleurs morceaux par courtoisie, & les met à part; puis quand tout est distribué, il les presente au distributeur mesme, luy disant vn tel, voila ton mets, il respond comme tous les autres, *hò-ò-ò*.

Ils ont quelques ceremonies, que ie n'entēds pas bien faisant festin d'un Ours, celuy qui l'auoit tué, fit rostir ses entrailles sur des branches de pin, prononçant quelques paroles que ie n'entendis pas, il y a quelque grand mystere là dedans: de plus on luy donna l'os du cœur de l'animal, qu'il porte dans vne petite bourse matahiée, pendue à son col; faisans festin d'O-

146 *Relation de la Nouvelle France,*
rignac, celuy qui luy auoit donné le coup
mortel, & qui faisoit le festin, apres auoir
distribué la chair, ietta de la greffe dans le
feu, disant : *papeouekou, papeouekou*, i'ay desia
expliqué ce que cela veut dire.

Le festin distribué, si c'est à manger tout,
chacun mange en silence, quoy que quel-
qu'un ne laissent pas de dire vn petit mot
en passant: aux autres festins, encore qu'il
soit permis de parler ordinairement, ils
parlent fort peu, s'estonnans des François
qui causent autant & plus en table qu'en
autre temps: aussi nous appellent-ils des
Oyes babillardes. Leurs bouches sont
quasi grosses comme des œufs, & c'est le
plaisir qu'ils prennent à gouter & à fa-
uorer ce qu'ils mangent, qui leur ferme
la bouche, & non l'honnesteré; Vous pren-
driez trop de plaisir à leur voir assaillir dās
leurs grandes escuelles d'escorce, vn Ca-
stor bouilly, ou rosty, notamment quand
ils viennent de la chasse, ou de leur voir
étudier vn os: ie les ay veus tenir vn pied
d'Orignac à deux mains, par vn bout la
bouche, & les dents faisant leur deuoir
de l'autre: en sorte qu'ils me sembloient
vouloir iouer de ces longues flutes d'Al-
lemagne, sinon qu'ils alloient vn peu trop
fort, pour auoir long temps bonne halei-

ne: quand ce qu'ils mangent leur agrée, vous leur entendez dire de fois à autre, ainsi que i'ay desia remarqué, *tapoué nimiti-son*, en verité ie mange, cōme si on en doutoit. Voila le grand tesmoignage qu'ils rendent du plaisir qu'ils prennent à vostre festin; au reste ayant succé, rongé, brisé les os qui leurs escheent pour en tirer la gresse & la mouëlle, ils les rejettent dans la chaudiere pleine de bouillon qu'ils doivent boire par apres, il est vray qu'aux banquets à tout manger, ils sont deliurez de cette inciuilité, car il n'y a point d'os.

Ayans mangé les mets qu'on a presenté, on distribue le bouillon de la chaudiere, dont chacun boit selon sa soif, si c'est vn banquet de deuotion, c'est à dire, à ne rien laisser, quelquefois il faut aussi boire tout le bouillon; d'autrefois il suffit qu'on mange toute la viande, estant libre de boire ce qu'on voudra du bouillon. Quand le Maître du festin void qu'on cesse de manger, il dit les paroles qui terminent le banquet, qui sont celles-cy, ou autres semblables, *Egon Khé Khiouiecou*; or vous vous en irez, supplé, quand il vous plaira: le festin conclud, quelques vns demeurent vn peu de temps pour discourir, d'autres s'en vont aussi tost délogeans sans trompette; c'est à

148 *Relation de la Nouvelle France,*
dire, qu'ils sortent sans dire mot, par fois
ils disent, *Nikionau*, ie m'en vay, on leur
respond *Niagouté*, allez à la bonne-heure,
voilà le grand excez de leurs compliments.

De leur chassi & de leur pescherie.

CHAPITRE IX.

Commençons par l'Elan, quand il y a
peu de neiges, ils le tuent à coups de
fleches, le premier que nous mangeâmes
fut ainsi mis à mort, mais c'est vn grand ha-
zard quand ils peuuent approcher de ces
animaux à la portée de leurs arcs, car ils
sentent les Sauvages de fort loing, & cou-
rent aussi viste que les Cerfs. Quand les nei-
ges sont profondes, ils poursuivent l'Elan à
la courte, & le tuent à coups d'espées, qu'ils
emmanchent à delongs bastons pour cét
effect: ils dardent ces espées quand ils n'o-
sent ou ne peuuent aborder la beste, ils
poursuivent par fois deux & trois iours vn
de ces animaux, les neiges n'estant, ny as-
sez dures ny assez profondes d'autrefois vn
enfant les tueroit quasi, car la neige venant
à se glacer apres quelque petit dégel, ou
quelque pluye, elle blesse ces pauvres Ori-
gnaux, qui ne vont pas loing sans estre
massacrez.

On m'auoit dit que l'Elan estoit grand
cōme vn mullet d'Auuergne, il est vray qu'il
a la teste longue cōme vn mullet, mais ie le
trouue aussi gros qu'un bœuf, ie n'en ay veu
qu'un seul enuie, il estoit ieune, à peine le
bois ou les cornes luy sortoient de la teste, ie
n'ay point veu en France, ny genisse, ny
pouillon, qui approchât de sa grosseur, ny
de sa hauteur; il est haut monté comme le
Cerf, son bois est haut branchu & plat en
quelque façon, non rond comme celuy des
Certs, ie parle des bois que i'ay veu, peut-
estre y en a-il d'autre façon. Quelqu'un m'a
dit que la femelle portoit tousiours deux
petits, & tousiours mâle & femelle mes
sauuages, au contraire, disent qu'elle en por-
te tantost vn tantost deux, & qu'une seule
fois ils en ont trouué trois dans vne femel-
le, ce qui les estonna comme vn prodige.

I'ay quelque pensée qu'on pourra avec
le temps domestiquer ces animaux, qu'on
en pourra seruir pour le labourage, & pour
trouer des tranées sur la neige, ce seroit vn
grand soulagement.

Quand les Sauuages ont tué plusieurs
Elans, & passé plusieurs iours en leurs
camps, ils en font leur provision & à leur
sécurité, ils vous étendent sur des perches les deux
costez d'un grand Orignac, en ayant oité

les os: si la chair est trop épaisse, ils la leuēt par laichent, & en outre la tailladent; afin que la fumée la desseiche & la penetre par tout, lors qu'elle commence à se seicher ou boucaner, ils la battent avec des pierres, la foulent aux pieds, afin qu'il n'y demeure dedans aucun suc qui la puisse corrompre, enfin estant bien boucané, ils la plient & la mettent en paquets, voila leur prouision, le boucan est vn pauvre manger, la chair fraische de l'Elá est fort aisée à digerer, elle ne dure point dās l'estomac; voila pourquoy les Sauuages ne la font point tant cuire: Pour le goust, il me semble que la chair d'un boeuf ne cede point à la chair d'un bon Elan.

Le Castor ou le Bieure se prend en plusieurs façons. Les Sauuages disent que c'est l'animal bien aymé des François, des Anglois, & des Basques, en vn mot des Europeans; j'entendois vn iour mon hôte qui disoit en se gaussant, *Missi picoutan amiscou*, le Castor fait toutes choses parfaitement bien, il nous faict des chaudieres, des haches, des espées, des couteaux, du pain, bref il fait tout; il se mocquoit de nos Europeans qui se passionnent pour la peau de cest animal, & qui se battent à qui donnera le plus à ces Barbares, pour en auoir

iusques là que mon hôte me dit vn iour me montrant vn fort beau couteau, les Anglois n'ont point d'esprit, ils nous donnent vingts couteaux comme celuy là pour vne peau de Castor.

Au Printemps, le Castor se prend à l'at-trappe amorcée du bois dont il mange; les Sauvages sont tres-bien entendus en ces attrapes, lesquelles venant à se detendre, vne grosse pierre de bois tombe sur l'animal & l'assomme, quelquefois les chiens rencontrant le Castor hors la Cabane, le poursuient & le prennent aisement; ie n'ay point veu cette chasse, mais on m'en a parlé, & les Sauvages font grand estat d'un chié qui sēt & découure cēt animal.

Pendant l'Hiuer ils le prennent à la rets & sous la glace, voicy comment; on fend la glace en long, proche de la Cabane du Castor, on met par la fente vn rets & du bois qui sert d'amorce, ce pauvre animal venant chercher à manger s'enlace dans ces filets faicts de bonne & forte ficelle double, & encore ne faut il pas tarder à est tirer, car ils seroiēt bien tost en pieces, estât fort de l'eau par l'ouerture faite en la glace, ils l'assōment avec vn gros bastō. L'autre façon de le prendre sous la glace est plus noble, tous les Sauvages n'en ont

152 *Relation de la Nouvelle France*,
pas l'usage, mais seulement les plushabiles;
ils brisent à coups de haches la Cabane ou
maison du Castor, qui est en effect admirable,
il n'y a mouquet qui la transperce à
mon aduis, pendant l'Hiver elle est bastie
sur le bord de quelque petit fleuve, ou d'un
estang faicte à double estage, sa figure est
ronde, les materiaux dont elle est compo-
sée sont du bois & de la terre, si bien liez &
vnis par ensemble, que j'ay veu nos Sauua-
ges en plein Hiver suer pour y faire ouuer-
ture à coups de haches, l'estage d'embas est
dés ou sur le bord de l'eau, celuy d'en haut
est au dessus du fleuve, quand le froid a gla-
cé les fleuves & les estags, le Castor se tiens
retiré en l'estage d'éhaut, où il a fait sa pro-
uision de bois pour manger pendant l'Hi-
uer; il ne laisse pas neantmoins de descen-
dre de cest estage en celuy d'embas, & de
celuy d'embas il se glisse sous les glaces, par
des trous qui sont en ce bas estage, & qui
respondent sous les glaces: il sort pour boi-
re & pour chercher du bois qu'il mange, le-
quel croist sur la rive des estangs, & dans les
estangs mesme; ce bois par embas est pris
dans les glaces, le Castor le va couper par
dessus, & le porte en sa maison. Or les Sau-
uages ayans brisé cette maison, ces pauvres
animaux, qui sont par fois en grand nom-

pre sous vn mesmetoiët, s'en vont sous les
glaces, qui d'vn costé, qui d'vn autre, cher-
chans des lieux vuides & creux entre l'eau
& la glace, pour pouuoir respirer: ce que
cachans leurs ennemis, ils se vont pour-
menans sur l'estang ou sur le fleuve glacé,
portans vn long baston en main, armé d'vn
costé d'vne tranche de fer, faite comme vn
ciseau de Menuisier, & de l'autre d'vn os de
Baleine, comme ie croy; ils sondent la gla-
ce avec cest os, frappans dessus & prenans
garde si elle sonne creux, & si elle donne
quelque indice de sa concavité, alors ils
coupent la glace avec la tranche de fer, re-
gardas si l'eau n'est point agitée par le mou-
vement ou par la respiration du Castor: si
l'eau remuë, ils ont vn baillō recourbé qu'ils
fourrent dans le trou qu'ils viennent de fai-
re, s'ils sentent le Castor, ils le tuēt avec leur
grand baston, qu'ils appellent *caouikachir*,
& le tirans de l'eau, en vont faire curée tout
ussi tost, si ce n'est qu'ils ayent grande es-
perance d'en prendre d'autres: le leur de-
mandois pourquoy le Castor attendoit là
qu'on le tuast, où ira il, me disoiēt ils, sa mai-
son est rompuë, les autres endroits où il
peut respirer entre l'eau & la glace sont cas-
sez, il demeure là dans l'eau, cherchant de
l'air, cependant on l'assomme, il fort quel-

quefois par la Cabane, ou par quelque trou, mais les chiens qui sont là, & qui le sentent, & l'attendent, l'ont bien tost attrapé.

Lors qu'il y a quelque fleuve voisin, ou quelque bras d'eau conjoint à l'estang où ils sont, ils se coulēt là dedans; mais les Sauvages barrent ces fleuves quand ils les découurent, ils cassent la glace & fichent quantité de pieux les vns pres des autres, en sorte que le Castor ne peut eua-der par là. J'ay veu de grands lacs qui sa-uoient la vie aux Castors, car nos gens ne pouuans casser tous les endroiets où ils pouuoient respirer, aussi ne pouuoient ils attraper leur proye; Il y a quelquefois deux menages de Castors dans vne mesme Cabane, c'est à dire deux males & deux femelles avec leurs petits.

La femelle en porte iusques à sept, quatre, cinq, six pour l'ordinaire, ils ont quatre dents, deux embas & deux en haut merueilleusemēt atérées, les autres deux sont petites, mais celles-cy sont grandes & tranchantes, ils s'en seruent pour couper les bois de leur prouision, & les bois dont ils batissent leur demeure, ils aiguissent ces dents quand elles sont emoucées, les frottans & pressants les vnes contre

es autres, faisans vn petit bruit que l'ay
uy moy-mesme.

Le Castor a le poil fort doux, les cha-
eaux qu'on en fait en sont tesmoins, il a
es pieds fort courts & fort propres pour
ager, car ils ont vne peau continue entre
es ongles, à la façon des oyseaux de riuie-
e, ou des loups marins, sa queue est route
latte, assez languette faicte en ouale; j'en
mesuray vne d'vn gros Castor, elle auoit
vne paulme & huit doigts ou enuiron de
longueur, & quasi vne paulme de la main
n largeur, elle estoit assez épaisse, elle est
couuerte, non de poil, mais d'vne peau
noire figurée en écailles: ce ne sont pas
ourtant de vrayes écailles: on prend icy
e Castor pour vn animal amphiue, voila
pourquoy on en mange en tout temps:
na pensée est que sa gresse fonduë appro-
che plus de l'huile que de la gresse, la
chair en est fort bonne, elle m'a semblé vn
peu fade au Printemps, & non pas en Hi-
uer; Au reste si sa peau surpasse la peau du
mouton, la chair de mouton surpasse à
mon aduis celle de Castor; tant pource
qu'elle est de meilleur goust, comme aussi
que le Mouton est plus gros qu'vn Castor,
Le Porc épic se prend à l'attrape & à la
course, le chien l'ayant découuert, il est

mort s'il n'est bien près de son giste, qu'il faict sous de grandes roches, sous lesquelles s'estant retiré, il est en lieu d'assurance; car ny les hommes, ny les chiens ne se sçauroient glisser là dessous, il ne peut courre sur la neige, voila pourquoy il est bien tost assommé, & n'est guere plus gros qu'un gros cochon de lait, ses pointes ou piquerons sont blâcs, longucts & assez minces, entrelasiez & entremeslez d'un poil noir ou grisate: l'ay veu en France des armes où il y auoit des pointes de Porcs épics trois fois plus longues & dix fois plus grosses & bié plus fermes que celles des Porcs épics de ce pais cy: les Sauuages m'ont dit que vers le fleuve de Saguenay, tirât vers le Nord, ces animaux y estoient bien plus gros. Ils les brûlent comme nous faisons les pourceaux en France, puis les ayant raclez, les font bouillir ou rostir, le manger en est bon, assez dur neantmoins, notamment des vieux, car les ieunes sont tendres & delicats; mais ils n'approchent point, ny de nos Porcs Sangliers, ny de nos Porcs domestiques.

Cest animal a les pieds tortus, & les iette en dehors, ses piquerons ont cette qualité, s'ilspiquétvn chien ou quelque persône, ils entrent incessamment, s'insinuans ou glissans petit à petit, & s'en allans ressortir par

la partie opposée à leur entrée; par exemple attachans au dos de la main, ils la transpercront & sortiront par le dedans. J'ay souvent veu les chiens tous herissez de ses pointes entrées desia à demy quand leurs Maistres les retiroient. Voulant considerer le premier qu'on apporta en la Cabane où je demeurois avec les Sauvages, ie l'empoignay parla queue, & le tiray vers moy, tous ceux qui me regardoient se mirent à rire, voyans cōme ie procedois; & de faict quoy que i'eusse tasché de le prendre dextremēt, cest-ce que quantité de ces petites lances s'attacherent à mes mains, car il n'y a aiguille si pointuë, ie les retiray aussi tost, & les jettay dans le feu.

L'Ours au Printemps se prend à l'attrape; Hiuer ils le trouuēt dans des arbres creux où il se retire, passans plusieurs mois sans manger, & cependant il ne laisse pas d'estre fort gras, ils couppent l'arbre pour faire sortir la proye qu'ils assomment sur la neige, ou bien à la sortie de son giste.

Ils prennent les Lieures au lacet, ou les tuent avec leurs arcs ou matras; j'ay desia remarqué autrefois que ces animaux sont blancs pendant les neiges, & gris en autre temps, ie les trouue vn peu plus hauts & plus pattus que ceux de France. Ils tuent les

Marthes & les Escurieux en mesme façon voila les chasses d'animaux terrestres qu'il y ay veu.

Pour les oiseaux, ils en tuent quelques uns avec leurs arcs, se seruans de fleches & de Matras, mais c'est fort raremēt: depuis qu'ils ont traitté des armes à feu avec les Anglois, ils sont deuenus demy Giboyeurs, quelques uns d'entr'eux tirent assez bien; mon hôte est l'un de leurs meilleurs harquebusiers, ie luy ay veu tuer quelques Outardeaux, quelques Canards & Becassines, mais leur poudre est bien tost usée.

Quand à leur pesche, ils se seruent de rets, cōme nous qu'ils traittent des François, & des Hurons: ils ont vne façon particuliere de pescher le Saulmon, mais ne m'y estant pas trouué, ie n'en diray rien.

Pour l'Anguille, ils la peschent en deux façons avec vne nasse, où avec vn harpon. Ils font des nasses avec assez d'industrie, longues & grosses, capable de tenir cinq & six cens anguilles: la mer estant basse, ils les placent sur le sable, en quelque lieu propre & reculé, les assurant en sorte que les marées ne les emportent point: aux deux costez ils ramassent des pierres qu'ils étendent comme vne chaine ou

petite muraille de part & d'autre, afin que le poisson qui va tousiours au fond rencontrât cest obstacle, se glisse doucement vers l'emboucheure de la nasse où le conduisent ces pierres ; la mer venant à se grossir, couure la nasse, puis se rabaisant, on la va visiter: par fois on y trouue cét ou deux cêrs Anguilles d'une marée, d'autre fois trois cêt, quelquefois point du tout, quelquefois six, huit, dix, selon les vents & les temps : Quand la mer est agitée, on n prend beaucoup, quand elle est calme, peu ou point, mais alors ils ont recours à leur harpon.

Ce harpon est vn instrument, composé d'un long baston, gros de trois doigts, au bout duquel ils attachent vn fer pointu, lequel ils armēt de part & d'autre de deux petits bastons recourbés, qui se viennent quasi ioindre au bout de la pointe du fer: quand ils viennent à frapper vne anguille avec ce harpon, ils l'embrochent dans ces deux bastons adjoincts, cedans par la force du coup, & laissās entrer l'anguille; puis se reserrans d'eux mesme, car ils ne pouurent que par la secouffe du coup, ils empêchent que l'anguille embrochée ne s'efforte.

Cette pesche au harpon, ne se fait ordi-

nairement que la nuit, ils se mettēt deux Sauvages dans vn canot, l'un derriere qui le gouuerne & qui rame, & l'autre est deuant, lequel à la faueur d'un flambeau d'écorce, attaché à la prouë de son vaisseau, s'en va cherchant la proye de ses yeux, rodans doucement sur le bord de ce grand fleuve, apperceuāt vne Anguille, il lance son harpon sans le quitter, la perce comme i'ay dit, puis la iette dans son canot; il y en a tel qui en prendra trois cens en vne nuit, & bien dauantage, quelquefois fort peu. C'est chose estrange de la quantité de ce poisson qui se retrouue en cette grande riuere, és mois de Septembre & d'Octobre, & cela deuant l'habitation de nos François, dont quelques vns de ceux qui ont demeuré plusieurs années sur le pays, se sont rendus aussi experts en cēt art que les Sauvages.

On croit que cette grande abondance, prouient de quelques lacs des pays plus hauts, qui venans à se dégorger nous font present de cette manne, qui nous nourrit, non seulement tout le Carême & autres iours de poissons, mais aussi en autre tēps.

Les Sauvages font secherie de ces lōgs poissons à la fumée; estans apportez dans leurs Cabanes, ils les laissent vn peu de temps

temps égouter, puis leur couppent la
este & la queue, ils les ouurent par le
los, puis les ayans vuidées ils les tail-
lent afin que la fumée entre par tout:
es perches de leurs Cabanes en sont
toutes chargées, estans bien boucanées,
ils les accouplent & en font de gros pa-
quets, en mertans environ vne centaine
ensemble; voila leurs viures iusques à
la neige qui leur donne de l'Orignac.

Ils tuent le Loup marin à coups de ba-
ton, le surprenant lors que sortant de
l'eau, il se va éguayer sur quelques ro-
ches au Soleil, car ne pouuant courir, s'il
est tant soit peu esloigné de son element
est perdu.

C'est assez pour ce chapitre, ie ne fais
pas profession de tout dire, mais seule-
ment de remarquer vne partie des cho-
ses qui m'ont semblé de uoïr estre escri-
tes, qui vouldra auoir vne pleine co-
noissance de ces contrées, qu'il lise ce
qu'en a escrit Monsieur de Champlain,
faut il auant que ie passe outre, que ie
se deux mots de quatre animaux, que
j'ay point veu en France, ie ne sçay
les loger, si nō au bout de ce chapitre.

L'vn se nomme des Sauvages *Ouinass*.

162. *Relation de la Nouvelle France,*

cor, nos François l'appellēt le siffleur ou le Rossignol, ils luy ont donné ce nom, pource qu'encore qu'il soit de la chassé des animaux terrestres, il chante neantmoins cōme vn oiseau, ie dirois volontiers qu'il siffle comme vne Linotte bien instruite, sinon qu'il m'est aduis qu'il ne sçait qu'une chanson, c'est à dire qu'il n'a pas vne grande variété de tons, mais il dit tres-bien la leçon que la nature luy a apprise. Il est environ de la grosseur d'un Lieure, d'un poil roux; quelques vns m'ont asseuré qu'il se roule en peloton, & que comme vn Liron il dort tout l'Hiver, sans qu'on le puisse réveiller, ie n'en ay point veu quel Esté, cest animal est vn excellent manger, ny le Lieure n'en approche pas.

L'autre est vn animal basset, de la grandeur des petits chiens, ou d'un chat, ie luy donne place icy, non pour son excellence, mais pour en faire vn symbole du peché; i'en ay veu trois ou quatre, il est d'un poil noir assez beau & luisant, il porte sur son dos deux rayes routes blanches, qui se ioignās vers le col & procs. de la queue, font vne ouale qui luy dōne tres-belle grace; la queue est touffue &

bien fournie de poil, comme la queue
d'un Regnard, il la porte retroussée, com-
me un Escurieux; elle est plus blanche
que noire, vous diriez à l'œil notament
quant il marche; qu'il meriteroit estre
nommé le petit chien de Jupiter; mais il
est si puant, & iette vne odeur si empe-
tée, qu'il est indigne d'estre appellé le
chien de Pluton, il n'y a voirie si infecte;
je ne l'aurois pas creü si ie ne l'auois sen-
ty moy mesme, le cœur vous manque
quasi quand vous en approchez, on en a
ué deux dans nostre court; plusieurs
iours apres il s'étoit si mal par tout nostre
maison, qu'on n'en pouuoit supporter
l'odeur. Je croy que le peché que sentit
sainte Catherine de Sienne, deuoit estre
le mesme puanteur.

Le troisieme est un Escurieux volant,
il y en a icy de trois especes. Les uns
sont communs, & sont non si beaux que
ceux de France, les autres que nos Fran-
çois nomment Suisses, pour estre bigar-
rez sur le dos, sont tres-beaux & fort pe-
tits; les Escurieux volans sont assez
beaux, leur excellence consiste en ce
qu'ils volent; ce n'est pas qu'ils ayent des
ailes, mais ils ont vne certaine peau aux

deux costez, qu'ils replient fort proprement contre leur ventre quand ils marchent, puis l'estendent quand ils volent. Leur vol n'est pas à mon aduis de longue haleine, i'en ay veu voler vn, il se soustenoit fort bien en l'air, mon hoste me l'auoit donné; ie le voulois enuoyer à V. R. mais la mort, la deliuré d'un si lōg voiage.

Le quatrième se nomme de nos François l'oiseau mouche, pource qu'à peine est-il plus gros qu'une abeille, d'autres l'appellent l'oiseau fleur, pource qu'il se nourrit sur les fleurs, c'est à mon iugement l'une des grādes raretez de ce païs cy, & un petit prodige de la nature, Dieu me semble plus admirable en ce petit oiseau qu'en un grand animal, il bruit en volant comme une abeille; ie l'ay veu quelquefois se soustenir en l'air, becquant une fleur, son bec est longuet, son plumage me sembloit d'un verd paré; ceux qui l'appellent l'oiseau fleur diroient mieux en mon iugement, le nommant la fleur des oiseaux.

De leurs habits & de leurs ornements.

CHAPITRE X.

C'Estoit la pensée d'Aristote, que le mode auoit fait cōme trois pas, pour

arriuer à la perfection qu'il possedoit de son temps. Au premier les hommes se contentoient de la vie, ne recherchant purement & simplement que les choses necessaires & vtils pour la conseruation. Au second ils ont conjoint le delectable avec le necessaire, & la bien-seance avec la necessité. On a trouué premierement les viures, puis les affaires, & par apres on s'est couuert au cōmencement contre la rigueur du temps, & par apres on a donné de la grace & de la gentillesse aux habits, on a fait des maisons aux premiers siecles simplement pour s'en seruir, & par apres on les a fait encore pour estre veüs. Au troisieme pas les hommes d'esprit voyans que le monde iouyssoit des choses necessaires & douces pour la vie, ils se sont donnez à la contemplation des choses naturelles, & à la recherche des sciences, si bien que la grande Republique des hommes est petit à petit perfectionnée, la necessité marchant deuant, la bien-seance & la douceur venant apres, & les sciences venant le dernier rang.

Or ie veux dire que nos Sauvages Montagnais & errans, ne sont encore

qu'au premier degré des trois que ie y es de toucher, ils ne pensent qu'à viure, ils m'agent pour ne point mourir, ils se couurent pour banir le froid, non pour paroistre, la grace, la bien-seance, la connoissance des arts, les sciences naturelles, & beaucoup moins les veritez surnaturelles, n'ont point encore de logis en cét hemisphere, du moins en ces contrées. Ce peuple ne croit pas qu'il y ait autre science au monde, que de viure & de m'ager, voila toute leur Philosophie. Ils s'estonnent de ce que nous faisons cas de nos liures, puisque leur connoissance ne nous donne point de quoy bannir la faim, ils ne peuvent comprendre ce que nous demandons à Dieu en nos prieres. Demande luy, me disoient-ils, des Originaux, des Ours & des Castors, dis luy que tu en veux manger; & quand ie leur disois que cela estoit peu de chose, qu'il y auoit biē d'autres richesses à demāder, ils se rioient, que pourrois tu, me repondoient ils souhaitter de meilleur, que de manger tō saoul de ces bonnes viandes? Bref ils n'ont que la vie, encore ne l'ont-ils pas toute entiere, puisque la famine les tuē assez souuent.

Iugez maintenant qu'elle peut-estre
 la gentillesse de leurs habits, la noblesse
 & la richesse de leurs ornemens, vous
 prédriez plaisir de les voir en cōpagnie:
 pendant l'Hiuer toutes sortes d'habits
 leurs sont propres, & tout est commun
 tant aux femmes comme aux hommes;
 il n'y a point de difformité en leurs ve-
 stemens, tout est bon, pourueu qu'il soit
 biē chaud. Ils sont couuerts propremēt,
 quand ils le sont commodement, dōnez
 leur vn chaperon, vne homme le porte-
 ra aussi bien qu'une femme, il n'y a habit
 de fol dont ils ne se seruent sagement,
 s'ils s'en peuuent seruir chaudement: ils
 ne sont point comme ces Seigneurs qui
 s'attachent à vne couleur. Depuis qu'ils
 prattiquent nos Europeans, ils sont plus
 bigarrez que des Suisses. l'ay veu vne pe-
 tite fille de six ans vestuē de la casaque
 de son pere, qui estoit vn grand homme,
 il ne falut point de Tailleur pour luy
 mettre cēt habit dans sa iustesse, on le
 ramasse à l'entour du corps, & on le lie
 comme vn fagot. L'un a vn bonnet rou-
 ge, l'autre vn bōnet verd, l'autre vn gris,
 tous faits, nō à la mode de la Cour, mais
 à la mode de la commodité. L'autre au-

168 *Relation de la Nouvelle France*,
ra vn chapeau que si les bords l'empeschent, il les couppent.

Les femmes ont pour robbe vne camisolle ou vn capot, ou vne casaque, ou vne castelogne, ou quelque peau dont ils s'enueloppent, se lians en autât d'endroits qu'il est nécessaire, pour fermer les aduençës au vent? L'vn porte vn bas de cuir, l'autre de drap, pour le present ils couppent leurs vieilles couuertures ou castellongnes, pour faire des mâches & des bas de chausses. Je vous laisse à penser si cela est bien vuidé & bien tiré; en vn mot ie reïtere ce que j'ay desia dit, leur propriété est leur commodité, & comme ils ne se couurent que contre l'injure du tēps, si tost quel'air est chaud, ou qu'ils entrent dans leurs Cabanes, ils jettent leurs atours à bas, les hōmes restās tous nuds, à la reserue d'vn brayer qui leur cache ce qui ne peut estre veu sans vergongne. Pour les femmes elles quittent leur bonnet, leurs manches & bas de chausses, le reste du corps demeurant couuert. Voila l'equipage des Sauvages, pour le present qu'ils communiquent avec nos François.

Ce peuple va tousiurs teste nuë, hor-

mis dans les plus grands froids, encore y en a-il plusieurs qui ne se couurent jamais, ce qui me fait conjecturer que fort peu, se seruoient de bōnets, auant qu'ils communiquassent avec nos Europeās, aussi n'en sçauoient ils faire, ains ils les traittent tous faits, ou du moins les font tailler à nos François. Voila pour leur coiffure, qui n'est autre que leurs cheveux, tant aux hommes qu'aux femmes, & mesme aux enfans; car ils sont testés nuës dans leur maillot.

Leurs robes sont faictes de peaux d'Elans, d'Ours, & d'autres animaux. Les plus riches en leur estime sont faites des peaux d'une espece de petit animal noir, qui se trouue aux Hurons, il est de la grandeur d'un Lapin, le poil est doux & luisant, il entre bien une soixantaine de ces peaux dans une robe, ils attachent les queuës de ces animaux aux bas, pour seruir de franges, & les testes au haut pour seruir d'une espece de rebord. La figure de leur robe est quasi quarrée, les femmes les peignent, tirant des raies du haut en bas, ces raies son également distantes & larges, environ de deux pouces vous diriez du passément.

Les hommes portent leurs robes en deux façons: quand il fait vn peu chaud ils n'en s'en enuoloppent point, mais ils la portent sur vn bras, & sous l'autre, ou bien estendue sur leur dos, retenue par deux petites cordes de peaux, qu'ils lient dessus leur poitrine; ce qui n'empesche pas qu'ils ne paroissent quasi tous nuds. Quand il fait froid, ils la passent tous, hommes & femmes, sous vn bras & dessus l'épaule de l'autre, puis la croisent & s'en enuoloppent assez commodément contre le froid, mais maussadement; car s'estans liez sous la poitrine, ils la retroussent, puis ils se lient & se garrottent vers la ceinture, ou vers le milieu du corps, ce retroussement leur faisant vn gros ventre ou vne grosse pance, dans laquelle ils mettent leurs petites besongnes. J'ay veu représenter vn Carefme prenant sur vn theatre en France, on luy bastit vn ventre iustement comme en portent nos Sauvages & Sauvageesses pendant l'Hiver.

Or comme ces robes ne couurent point leurs bras, ils se font des manches de mesme peaux, & tirent dessus ces rayes dont j'ay parlé, quelque fois de l'og,

quelquefois en rond: ces manches sont
 fort larges par haut, couurant les épau-
 es, & se venans quasi ioindre derriere
 le dos, deux petites cordes les tiennent
 liées deuant & derriere, mais avec si
 peu de grace, qu'il n'y a fagot d'espine
 qui ne soit mieux troussé qu'une femme
 emmitouffée dedans ces peaux. Remar-
 quiez qu'il n'y a point de distinction, de
 habit d'un homme à celui d'une fem-
 me, sinon que la femme est tousiours
 couuverte de sa robe, & les hommes la
 quittent ou la portent à la legere, quand
 il fait chaud comme i'ay dit.

Leurs bas de chausses sont de poil
 d'Orignac passés sans poil, c'est la natu-
 re & non l'art, qui en a trouué la façon,
 ils sont tout d'une venue, suffit que le
 pied & la jambe y passent, pour estre bié
 faits, ils n'ont point l'inuention d'y met-
 tre des coins, ils sont faits comme des
 bas à botter, retenus sous le pied avec
 une petite cordelette. La cousture qui
 n'est quasi qu'un faux fil, ne se treuve pas
 derriere les jambes, mais entre-deux:
 les cousans, ils laissent passer un rebord
 de la peau mesme, qu'ils découpent en
 frange, apres laquelle ils attachent par

fois quelques matachias; ces bas sont assez longs, notamment pardeuant: car ils laissent vne piece qui passe bien haut, & qui couure vne grande partie de la cuisse, au plus haut de cette piece sont attachées de petites cordes, qu'ils lient à vne ceinture de peau, qu'ils portēt tous dessus leurs chairs.

Leurs souliers ne sont pas durs comme les nostres, aussi n'ont-ils pas l'industrie de taner le cuir; nos gands de cerf, sont d'une peau plus ferme ou du moins aussi ferme que leurs peaux d'Orignac, dont ils font leurs souliers, encore faut ils qu'ils attendent que ces peaux ayent seruy de robbes, & qu'elles soient toutes grasses, autrement leurs souliers se retireroient à la moindre approche du feu, ce qu'ils ne laissent pas de faire tous gras qu'ils soient quād on les chauffe vn peu de trop près. Au reste, ils boient l'eau comme vne éponge, si biē que les Sauvages ne s'en seruēt pas contre cēt Element, mais bien cōtre la neige & contre le froid. Ce sont les femmes qui sont cousturieres & cordonnières, il ne leur coute rien pour apprendre, ce mestier, encore moins pour auoir des

ettres de maistrise; vn enfant qui sçauoit vn peu coudre en feroit à la premiere veuë, tant il y a d'inuention.

Ils les font fort amples & fort capables, notamment l'Hiuér, pour les garantir contre le froid, ils se seruent ordinairement d'une peau de Lieure, ou d'une piece de quelque couuerture, pliée en deux & trois doubles. Ils mettent avec cela du poil d'Orignac, & puis ayans enroulé leurs pieds de ces haillons, ils haussent leurs souliers, & par fois deux paires l'une dessus l'autre, ils les lient & les arrestent sur le coudepié, avec une petite corde, qui regne tout à l'entour des coins du Soulier. Pendant les neiges nous nous seruons tous, François & Sauvages de cette sorte de chaussure, afin de pouuoir marcher sur des Raquettes; l'Hiuér passé nous reprenons nos souliers François, & eux vont pieds nuds.

Voilà non pas tout ce qui se peut dire de leurs habits & de leurs ornements, mais ce que j'en ay veu, & qui me vient pour l'heure en la pensée; j'oubliois à dire, que ceux qui peuuent auoir ou troquer des chemises de nos François, s'en seruent à la nouvelle façon: car au lieu

de les mettre comme nous par dessus
ils les mettent par dessus tous leurs ha-
bits, & comme iamaïs ils ne les essuyent
elles sont en moins de rien grasses com-
me des torchons de cuisine, c'est ce
qu'ils demandent, car l'eau, disent-ils
coule là dessus, & ne penetre pas iusqu'
leurs robes.

De la langue des Sauvages Montagnais

CHAPITRE XI.

L'Escriuy l'an passé, que leur langue
estoit tres-riche & tres pauvre; tout
pleine d'abondance & de disette; la
pauvreté paroist en mille articles. Tous
les mots de pieté, de deuotion, de vertu
tous les termes dont on se sert pour ex-
pliquer les biens de l'autre; le langage
des Theologiens, des Philosophes, de
Mathematiciens, des Medecins, en un
mot de tous les hommes doctes; toutes
les paroles qui concernent la police &
le gouvernement d'une ville, d'une Pro-
vince, d'un Empire; tout ce qui touche
la iustice, la recompense & le chastimēt
les noms d'une infinité d'arts, qui sont
en nostre Europe, d'une infinité de fleur.

arbres & de fruits, d'une infinité d'animaux de mille & mille inventions, de mille beautez & de mille richesses; tout cela ne se trouue point ny dās la pensée, ny dans la bouche des Sauvages, n'ayans ny vraye religion ny connoissance des vertus, ny police, ny gouuernement, ny royaume, ny Republique, ny sciences, ny rien de tout ce que ie viens de dire, & par consequent, toutes les paroles, tous les termes, tous les mots & tous les noms qui touche ce monde de biens & de grandeurs, doiuent estre defalquez de leur dictionnaire; voila vne grande fette. Tournons maintenant la me-
mille, & faisons voir que cette langue regorge de richesses.

Premierement ie trouue vne infinité de noms propres parmy eux, que ie ne puis expliquer en nostre françois, que par circumlocutions.

Secondement, ils ont de Verbes que nomme absolus, dont ny les Grecs, ny les Latins, ny nous, ny les langues d'Europe, dont ie ne me suis enquis, n'ont rien de semblable, par exemple ce Verbe *Nitison*, signifie absolument ie mange, sans dire quoy, car si vous determinez, la

176 *Relation de la Nouvelle France*,
chose que vous mangez, il le faut seru
d'un autre Verbe.

Tiercement, ils ont des Verbes diff
rents, pour signifier l'action enuers v
chose animée, & enuers vne chose in
animée, encore bien qu'ils conjoignent
avec les choses animées, quelques nom
bres des choses sans ame cōme le petu
les pommes, &c. donnons des exemple
Je vois vn homme, *Niouapam an irimou*,
ie vois vne pierre, *nouabatē*, ainsi en Grec
en Latin, & en François, c'est vn mesm
Verbe, pour dire ie vois vn homme, vn
pierre, & toute autre chose. Je frappe v
chiē *ni noutinau attimou*, ie frappe vn boi
ninoutinen misticu. Ce n'est pas tout: car
l'actiō se termine à plusieurs choses an
mées, il faut vn autre Verbe, ie vois d
hōmes *nouapamaoueth irinoueth*, *ninoutina*
ueth attimoueth, & ainsi de tous les autre

En quatrième lieu, ils ont des Verb
propres pour signifier l'action qui se te
mine à la personne reciproque, & d'aut
tres encore qui se terminent aux ch
ses qui luy appartiennent, & l'on ne p
se servir des Verbes enuers les autre
personnes non reciproques sans parl
improprement. Je me fais entendre le Ve

be *Nitaou*

nitaouin, signifie, ie me fers de quelque chose, *nitaouin agouniscouehon*, ie me fers d'un bonnet: que si ie viens à dire, ie me fers de son bonnet, sçauoir est du bonnet de l'homme, dont on parle, il faut changer de verbe, & dire *Nitaouionan outagoumiscouhon*: que si c'est une chose animée il faut encor changer de verbe, par exemple, ie me fers de son chien, *nitaouionan ôtaimai*, & remarquez que tous ces verbes ont leurs neufs, leurs temps, & leurs personnes, & que leurs conjugaisons sont dissimilables s'ils different de terminaisons. Ceste abondance n'est point dās les langues d'Europe, ie le sçay de quelques unes, ie le coniecture des autres.

En cinquiesme lieu, ils se seruent d'autres mots sur la terre, d'autres mots sur l'eau pour signifier la mesme chose. Voicy comment, Ie veux dire, j'arriuay hier, si c'est par terre, il faut dire *nitaouchinin outagouchi*, si c'est par eau, il faut dire *nimichagan outagouchi*: ie veux dire, j'ay esté mouillé de la pluye, ç'a esté cheminant sur terre, il faut dire *nikimiouanoutan*, si c'est faisant chemin, par eau *nikhimionanoutan*, ievay querir

178 *Relation de la Nouvelle France,*
quelque chose, si c'est par terre, il faut
dire *ninaten*, si c'est par eau *ninahen*
si c'est vne chose animée & par terre
il faut dire *ninatau*: si c'est vne chose
animée & par eau, il faut dire *ninahouau*
si c'est vne chose animée qui appartient
né à quelqu'un, il faut dire *ninahimouau*
si elle n'est pas animée *niuahimouau*
quelle variété nous n'avons en François
pour tout cela qu'un seul mot, ie vay
querir, auquel on adiouste pour distin-
ction par eau, ou par terre.

En sixiesme lieu, vn seul de nos ad-
iectifs en François se conioint avec tous
nos substantifs, par exemple, nous di-
sons le pain est froid, le petun est froid,
ce fer est froid; mais en nostre Sauvage
ces adiectifs changent selon les diuerses
especes des substantifs, *tabiscou assini*,
la pierre est froide, *tacabiscou nous-*
ponagan, mon petunoir est froid
takhiscou khichtemau, ce petun est froid
tacascouan misticou, le bois est froid, si
c'est quelque grande piece *tacascou-*
chan misticou, le bois est froid, *sicac-*
chiou attimou, ce chien a froid; voilà
vne estrange abondance.

Remarquez en passant, que tous ces

liectifs, voire mesme que tous les
oms substantifs se conjuguent comme
s verbes Latins impersonnels, par
emple, *tabiscan assini*, la pierre est
froide, *tabiscaban*, elle estoit froide,
cata tabiscan, elle sera froide, & ainsi du
ste *Noutaoui*, c'est vn nom substantif,
qui signifie mon pere, *noutaouiban*, c'e-
stoit mon pere, ou bien deffunct mon
pere, *Cata noutaoui*, il sera mon pere, si
il pouuoit se seruir de ces termes.

En septiesme lieu, ils ont vne ri-
ueuse si importune qu'elle me iette
dans la creance que ie seray pau-
vre toute ma vie en leur langue. Quand
vous cognoissez toutes les parties d'O-
raison des langues qui florissent en no-
tre Europe, & que vous sçauiez comme
il faut lier ensemble, vous sçauiez la
langue, il n'en est pas de mesme en la
langue de nos Sauvages, peuplez vo-
tre memoire de tous les mots qui signi-
fient chaque chose en particulier, ap-
prenez le nœud ou la Syntaxe qui les
lie, vous n'estes encor qu'un igno-
rant, vous pourrez bien avec cela vous
faire entendre des Sauvages, quoy que
on pas tousiours, mais vous ne les en-

180 *Relation de la Nouvelle France,*
tendez pas : la raison est , qu'outre le
noms de chaque chose en particulie
ils ont vne infinité de mots qui signi
fient plusieurs choses ensemble : si i
veux dire en François le vent pousse l
neige , suffit que j'aye cognoissance d
ces trois mots , du vent , du verbe , i
pousse , & de la neige , & que ie les sça
che conioindre , il n'en est pas de mesm
icy. Je sçay comme on dit le vent rou
tin , comme on dit il pousse vne chos
noble comme est la neige en l'estime de
Sauuages , c'est *rakbineou* , ie sçay com
me on dit la neige , c'est *couné* , que si i
veux conioindre ces trois mots *Routi
rakbineou couné* , les Sauuages ne m'en
tendront pas , que s'ils m'entendent il
se mettront à rire , pource qu'ils ne par
lent pas comme cela , se seruans de o
seul mot *prouan* , pour dire le vent pou
se ou fait voler la neige : de mesme l
verbe *nificatchia* signifie j'ay froid , c
nom *nifitai* signifie mes pieds , si ie di
nificat chin nifitai pour dire j'ay froi
aux pieds , ils pourront bien m'entendre
mais ie ne les entēdray pas quād ils dirō
Nitatagouasifin , qui est le propre mo
pour dire j'ay froid aux pieds : & ce qu

ie vne memoire, ce mot n'est parent, ny
lié, ny n'a point d'affinité en sa conso-
nance avec les deux autres, d'où prouiet
que ie les fais souuēt rire en parlant, en
oulant suiure l'œconomie de la langue
latine, ou Françoisise, ne sçachant point
es mots qui signifient plusieurs choses
ensemble ? D'icy prouient encore, que
en souuent ie ne les entends pas, quoy
qu'ils m'entendent : car ne se seruans
as des mots qui signifient vne chose
mple en particulier, mais de ceux qui
signifient beaucoup à la fois, moy ne
sachant que ces premiers, & non encor
demy, ie ne les sçauois entendre s'ils
ont de l'esprit pour varier & choisir
s mots plus communs, car alors ie taf-
ne de m'en demesler.

C'est assez pour monstrier l'abon-
ance de leur langue, si ie la sçauois par-
itement i'en parlerois avec plus d'as-
urance ; ie croy qu'ils ont d'autres ri-
chesses que ie n'ay peu encor décou-
rir iusques icy.

L'oubliais à dire que nos Monta-
nais n'ont pas tant de lettres en leur
alphabeth, que nous en auons au no-
tre, ils confondent le B. & le P. ils con-

182 *Relation de la Nouvelle France,*
fondent aussi le C. le G. & le K. c'est
dire que deux Sauvages prononçans vn
mesme mot, vous croiriez que l'vn pro-
nonce vn B. & que l'autre prononce vn
P. que l'vn dit vn C. ou vn K. & l'autre
vn G. ils n'ont point les lettres F, L, V
consonante X. Z. ils prononcent vn R
au lieu d'un L. ils diront Monsieur du
Pressi pour Monsieur du Pleffi, ils pro-
noncent vn P. au lieu d'un V. conso-
nante, Monsieur Olipier pour Monsieur
Oliuier; mais comme ils ont la langue
assez bien pendue, ils prendroient bien
tost nostre prononciation si on les in-
struisoit, notamment les enfans.

Le P. Brebeuf m'a dit que les Hu-
rons n'ont point de M. dequoy ie m'e-
stonne: car ceste lettre me semble quasi
naturelle, tant l'usage en est grand.

Que si pour conclusion de ce Cha-
pitre V. R. me demande si i'ay beau-
coup auancé dans la cognoissance de
ceste langue pendant mon hyuerne-
ment avec ces Barbares, ie luy diray in-
genuëment que non: en voicy les rai-
sons.

Premierement, le deffaut de ma me-
moire qui ne fut iamais bien excellen-

en l'année 1634. 183

e, & qui se va defeichant tous les iours.
O l'excellent homme pour ces pays icy
que le Pere Brébeuf, sa memoire tres-
chereuse, sa douceur tres-aymable, fe-
ont de grands fruiçts dedans les Hu-
ons.

Secondement, la malice du for-
ier qui defendoit par fois qu'on m'en-
seignast.

Tiercement, la perfidie del'Apo-
star, qui contre sa promesse, & nonob-
stant les offres que ie luy faisois, ne m'a
jamais voulu enseigner, voire sa dé-
loyauté est venue iusques à ce point de
ne donner exprez vn mot d'une signifi-
cation pour vn autre.

En quatriesme lieu, la famine a
esté long temps nostre hostesse, ien'o-
is quasi en sa presence interroger nos
Gauuages, leur estomach n'est pas de la
nature des tonneaux qui resonnét d'au-
tant mieux qu'ils sont vuides, il ressem-
ble au tambour, plus il est bandé mieux
il parle.

En cinquiesme lieu, mes maladies
m'ont fait quitter le soing des langues
de la terre pour penser au langage de
l'autre vie où ie pensois aller.

184 *Relation de la Nouvelle France,*

En sixiesme lieu enfin la difficulté de ceste langue qui n'est pas petite, comme on peut coniecturer de ce que j'ay dit, n'a pas esté vn petit obstacle pour empescher vne pauvre memoire commela mienne d'aller bien loing. Je iargonne neantmoins , & à force de crier ie me fais entendre.

Vn point me toucheroit viuement, n'estoit que i'estime qu'il ne faut pas marcher deuant Dieu, mais qu'il faut le suiure, & se contenter de sa propre bassesse; c'est que ie ne croy quasi pas pou- uoir iamais parler les langues des Sau- uages avec autant de liberré qu'il se- roit necessaire pour leur prescher, & ré- pondre sur le champ sans broncher, à leurs demandes & à leurs obiections, estant notamment occupé comme i'ay esté iusques à present. Vray que Dieu peut faire d'vne roche vn enfant d'A- braham. Qu'il soit beny à iamais par toutes les langues des nations de la terre.

CHAPITRE XII.

*De ce qu'il faut souffrir hyuernant avec
les Sauvages.*

E Piétete dit que celuy qui veut aller aux bains publics, se doit au préalable figurer toutes les insolences qui s'y commettent, afin que se trouuant engagé dans la risée d'un tas de canailles, qui luy laueront mieux la teste que les pieds, il ne perde rien de la gravité & de la modestie d'un homme sage. Je dirois volontiers le mesme à qui Dieu donne les pensées, & les desirs de passer les mers, pour venir chercher & instruire les Sauvages: c'est en leur faveur que ie coucheray ce Chapitre, afin qu'ayant cogneu l'ennemy qu'ils auront en teste, ils ne s'oublient pas de se munir des armes necessaires pour le combat, notamment d'un patience de fer ou de bronze, ou plustost d'une patience toute d'or, pour supporter fortement & amoureusement les grands travaux qu'il faut souffrir parmy ces peuples. Com-

186 *Relation de la Nouvelle France,*
mençons par la maison qu'ils doiuent
habiter s'il les veulent suiure.

Pour conceuoir la beauté de ceste
edifice, il en faut décrire la structure
i'en parleray avec science : car i'ay sou-
uent aydé à la dresser. Estans donc arri-
uez au lieu où nous deuions camper,
les femmes armées de haches s'en al-
loient çà & là dans ces grandes forests
coupper du bois pour la charpente de
l'hostellerie où nous voulions loger, ce
pendant les hommes en ayans designé
le plan, vuidoient la neige avec leurs ra-
quilles, ou avec des pelles qu'ils font &
portent exprez pour ce sujet : figurez
vous donc vn grand rond, ou vn quarré
dans la neige, haute de deux, de trois,
ou de quatre pieds, selon les temps, ou
les lieux où on cabane; ceste profon-
deur nous faisoit vne muraille blanche,
qui nous environnoit de tous costez,
excepté par l'endroit où on la fendoit
pour faire la porte : la charpente appor-
tée, qui consiste en quelque vingt ou
trente perches, plus ou moins, selon la
grandeur de la cabane, on la plante, non
sur la terre, mais sur le haut de la neige,
puis on iette sur ces perches qui s'ap-

prochent vn petit par en haut, deux ou trois rouleaux d'écorces cousuës ensemble, commençant par le bas, & voila la maison faite, on couure la terre, comme aussi ceste muraille de neige qui regne tout à l'entour de la cabane, de petites branches de pin, & pour dernière perfection, on attache vne méchante peau à deux perches pour seruir de porte, dont les iambages sont la neige mesme. Voyons maintenant en détail toutes les commoditez de ce beau Louure.

Vous ne sçauriez demeurer debout dans ceste maison, tant pour sa bassesse, que pour la fumée qui suffoqueroit, & par conséquent il faut estre tousiours couché ou assis sur la platte terre, c'est la posture ordinaire des Sauuages: de sortir de hors, le froid, la neige, le danger de s'égarer dans ces grâds bois, vous font rentrer plus vite que le vent, & vous tiennent en prison dans vn cachot, qui n'a ny clef ny serrure.

Ce cachot, outre la posture fâcheuse qu'il y faut tenir sur vn liêt de terre, a quatre grandes incommoditez, le froid, le chaud, la fumée & les chiens:

Pour le froid vous auez la teste à la neige, il n'y a qu'une branche de pin entre deux, bien souvent rien que vostre bonnet, les vents ont liberté d'entrer par mille endroits : car ne vous figurez pas que ces écorces soient jointes comme un papier colé sur un chassis, elles ressemblent bien souvent l'herbe à mille pertuis, sinon que leurs trous & leurs ouvertures sont un peu plus grandes, & quand il n'y auroit que l'ouverture d'en haut, qui sert de fenestre & de cheminée tout ensemble, le plus gros hyuer de France y pourroit tous les iours passer tout entier sans empressement. La nuit estant couché ie contemplois par ceste ouverture & les Estoilles & la Lune, autant à découuert que si i'eusse esté en pleine campagne.

Or cependant le froid ne m'a pas tant tourmenté que la chaleur du feu, un petit lieu, comme sont leurs cabanes, s'échauffe aisément par un bon feu, qui me rotissoit par fois & me grilloit de tous costez, à raison que la cabane estant trop estroite, ie ne sçauois comment me deffendre de son ardeur, d'aller à droite ou à gauche, vous ne sçau-

riez : car les Sauvages qui vous sont voisins occupent vos costez, de reculer en arriere, vous rencontrez ceste muraille de neige, ou les écorces de la cabane qui vous bornent, ie ne sçauois en quelle posture me mettre, de m'estendre, la place estoit si estroite que mes iambes eussent esté à moitié dans le feu ; de me tenir en ploton, & tousiours racourcy cōme ils font, ie ne pouuois pas si long temps qu'eux : mes habits ont esté tout rostis & tout bruslez. Vous me demanderez peut estre si la neige que nous auions au dos ne se fondoit point quand on faisoit bon feu : ie dis que non, que si par fois la chaleur l'amolissoit tant soit peu, le froid la durcissoit en glace. Or ie diray neantmoins que le froid ny le chaud n'ont rien de tolerable, & qu'on trouue quelque remede à ces deux maux.

Mais pour la fumée, ie vous confesse que c'est vn martyre, elle me tuoit, & me faisoit pleurer incessamment sans que i'eusse ny douleur ny tristesse dans le cœur, elle nous terrassoit par fois tousant que nous estions dans la cabane, c'est à dire qu'il falloit mettre la

190 *Relation de la Nouvelle France,*
bouche contre terre pour pouuoir respirer: car encor que les Sauvages soient accoustumez à ce tourment, si est-ce que par fois il redoubloit avec telle violence, qu'ils estoient contraincts aussi bien que moy de se coucher sur le ventre, & de manger quasi la terre pour ne point boire la fumée: i'ay quelque fois demeuré plusieurs heures en ceste situation, notamment dans les plus grands froids, & lors qu'il neigeoit: car c'estoit en ces temps là que la fumée nous assailloit avec plus de fureur, nous saisissant à la gorge, aux naseaux, & aux yeux: que ce breuuage est amer! que ceste odeur est forte! que ceste vapeur est nuisible à la veüe! i'ay creu plusieurs fois que ie m'en allois estre aueugle, les yeux me cuisoient comme feu, ils me pleuroient ou distilloient comme vn alambic, ie ne voyois plus rien que confusément, à la façon de ce bon homme, qui disoit, *video homines velut arbores ambulantes*. Je disois les Pseaumes de mon Breuiare comme ie pouuois, les sçachans à demy par cœur, i'attendois que la douleur me donnast vn peu de relasche pour reciter les leçons, & quād

Je venois à les lire elles me sembloient
écrites en lettres de feu, ou d'écarlatte,
J'ay souuent fermé mon liure n'y voyant
rien que confusion qui me blessoit la
vue.

Quelqu'un me dira que ie deuois
sortir de ce trou enfumé, & prendre
l'air, & ie luy répondray, que l'air estoit
ordinairement en ce temps-là si froid,
que les arbres qui ont la peau plus dure
que celle de l'homme, & le corps plus
solide, ne luy pouuoient resister, se fen-
dant iusques au cœur, faisans vn bruit
comme d'un mousquet en s'éclatans : ie
portoies neantmoins quelque fois de ce-
te taniere, fuyant la rage de la fumée
pour me mettre à la mercy du froid,
contre lequel ie taschois de m'armer,
m'envelopant de ma couuerture com-
me vn Irlandois, & en cet equipage assis
sur la neige, ou sur quelque arbre abba-
ndonné, ie recitois mes Heures : le mal estoit
que la neige n'auoit pas plus de pitié de
mes yeux que la fumée.

Pour les chiens que j'ay dit estre
vne des incommoditez des maisons des
sauuages, ie ne sçay si ie les dois blas-
mer: car ils m'ont rendu par fois de bons

192 *Relation de la Nouvelle France,*
seruices, vray qu'ils tiroient de moy la
mesme courtoisie qu'ils me prestoient
si bien que nous nous entr'aydions le
vns les autres, faisans l'emblesme de *ma-
tuum auxilium*, ces pauvres bestes n'
pouuans subsister à l'air, hors la cabane
se venoient coucher tantost sur mes
épaules, tantost sur mes pieds, & com-
me ie n'auois qu'une simple castalogne
pour me seruir de mattelas & de cou-
verture tout ensemble, ie n'estois pas
marry de cet abry, leurs rendans volon-
tiers vne partie de la chaleur que ie ti-
rois d'eux : il est vray que comme ils
estoyent grands & en grand nombre, ils
me pressoient par fois & m'importu-
noient si fort, qu'en me donnant vn peu
de chaleur, ils me déroboient tout mor-
sommeil, cela estoit cause que bien sou-
uent ie les chassois, en quoy il m'arriua
certaine nuit vn traict de confusion &
de risée : car vn Sauvage s'estant ietté
sur moy en dormant, moy croyant que
ce fust vn chien, rencontrant en main
vn baston, ie le frappe m'écriant, *Aché,*
Aché, qui sont les mots dont ils se ser-
uent pour chasser les chiens, mon hom-
me s'éueille bien estonné pensant que
tout

out fut perdu; mais s'estant pris garde
l'ou venoient les coups: tu n'as point
l'esprit, me dit-il, ce n'est pas vn chien,
c'est moy: à ces paroles ie ne sçay qui
est le plus estonné de nous deux, ie
quittay doucement mon baston, bien
narry de l'auoir trouué si pres de moy.

Retournons à nos chiens, ces ani-
maux estans affamez, d'autant qu'ils n'a-
uoient pas de quoy m'ager non plus que
vous, ne faisoient qu'aller & venir, ro-
uer par tout dans la cabane: or comme
n'est souuēt couché aussi bien qu'assis
dans ces maisons d'écorce, ils nous pas-
soient souuent & sur la face & sur le
entre, & si souuent, & avec telle im-
portunité, qu'estant las de crier & de les
chasser, ie me couurois quelque fois la
face, puis ie leur donnois liberté de
passer par où ils voudroient: s'il arriuoit
qu'on leur iettast vn os, aussi tost s'estoit
le courre apres à qui l'auroit, culbutans
deus ceux qu'ils rencontroient assis, s'ils
ne se tenoient bien fermes; ils m'ont
par fois renuersé & mon écuelle d'écor-
ce, & tout ce qui estoit dedans sur ma
rotane. Ie souffris quand il y suruenoit
quelque querelle parmy-eux lors que

194 *Relation de la Nouvelle France,*
nous disions : car il n'y auoit celuy qui
ne tint son plat à deux belles mains contre
la terre, qui seruoit de table, de sie-
ge & de liét, & aux hommes & au-
chiens : c'est de là que prouenoit la grã-
de incommodité que nous receuions
de ces animaux, qui portoient le nez
dans nos écuelles plustost que nous n'y
portions la main. C'est assez dit des in-
commoditez des maisons des Sauua-
ges, parlons de leurs viures.

Au commencement que ie fus avec
eux, comme ils ne saient ny leurs bouil-
lons ny leurs viandes, & que la saleté
mesme fait leur cuisine, ie ne pouuois
manger de leur salmigondies, ie me
contentois d'un peu de galette & d'un
peu d'anguille bouccanée, iusques là
que mon hôte me tançoit de ce que ie
mangeois si peu, ie m'affamay deuant
que la famine nous acceüillist, cepen-
dant nos Sauuages faisoient tous les
iours des festins, en sorte que nous nou-
vismes en peu de temps sans pain, sans
farine, & sans anguilles, & sans aucun
moyen d'estre secourus : car outre que
nous estions fort auant dans les bois, &
que nous fussions morts mille fois de-

en l'année 1634.

195

uant que d'arriuer aux demeures des
François, nous hyuernions de là le grād
fleuve qu'on ne peut trauerfer en ce
temps là pour le grand nombre de gla-
ces qu'il charie incessamment, & qui
mettroient en pieces non seulement
vne chaloupe, mais vn grand vaisseau,
pour la chasse, comme les neiges n'e-
stoient pas profondes à proportion des
autres années, ils ne pouuoient pas pren-
dre l'Elan, si bien qu'ils n'apportoient
que quelques Castors, & quelques
Porcs epics, mais en si petit nombre,
& si peu souuent, que cela seruoit plu-
tost pour ne point mourir que pour vi-
ure. Mon hoste me disoit dans ces gran-
des disettes, *Chibiné* aye l'ame dure
resiste à la faim, tu seras par fois deux
iours, quelque fois trois ou quatre sans
manger, ne te laisse point abbattre, préd
courage, quand la neige sera venue
nous mangerons : nostre Seigneur n'a
pas voulu qu'ils fussent si long temps
sans rien prendre; mais pour l'ordinaire
nous mangions vne fois en deux iours,
voire assez souuent ayans mangé vn Ca-
stor le matin, le lendemain au soir nous
mangions vn Porc epic gros comme

196 *Relation de la Nouvelle France,*
vn Cochon de lait : c'estoit peu à dix-neuf personnes que nous estions , il est vray ; mais ce peu suffisoit pour ne point mourir. Quand ie pouuois auoir vne peau d'Anguille pour ma iournée sur la fin de nos viures, ie me tenois pour bien déiuné, bien disné, & bien soupé.

Au commencement ie m'estois seruy d'une de ces peaux pour refaire vne sotane de toille que i'auois sur moy, ayāt oublié de porter des pieces, mais voyāt que la faim me pressoit si fort, ie mangeay mes pieces, & si ma sotane eust esté de mesme estoffe, ie vous répond que ie l'eusse rapportée bien courte en la maison : ie mangeois bien les vieilles peaux d'Orignac, qui sont bien plus dures que les peaux d'Anguilles, i'allois dans les bois brouter le bout des arbres & ronger les écorces plus tendres, comme ie remarqueray dans le iournal. Les Sauvages qui nous estoient voisins, souffroient encore plus que nous, quelques-uns nous venans voir, nous disoient que leurs camarades estoient morts de faim, i'en vy qui n'auoient mangé qu'une fois en cinq iours, & qui se tenoient bien heureux quand ils trouuoient de quoy

difner au bout de deux, ils estoient faits comme des squelets, n'ayans plus que la peau sur les os, nous faisions par fois de bons repas; mais pour vn bon difner, nous nous passions trois fois de souper. Vn ieune Sauvage de nostre cabane, mourant de faim, comme ie diray au Chapitre suiuant, ils me demandoient souuent si ie ne craignois point, si ie n'auois point peur de la mort, & voyans que ie me monstrois assez assurez ils s'en estonnoient, notamment en certain temps que ie les vis quasi tomber dans le desespoir. Quand ils viennent iusques-là, ils iouient pour ainsi dire à sauue qui peut, ils iettent leurs écorces, & leur bagage, ils s'abandonnent les vns les autres, & perdans le soin du public, c'est à qui trouuera de quoy viure pour soy; alors les enfans, les femmes, en vn mot ceux qui ne scauroient chasser meurent de froid & de faim, s'ils en fussent venus à ceste extremité ie serois mort des premiers.

Voila ce qu'il faut preuoir auant que de se mettre à leur suite: car encor qu'ils ne soient pas tous les ans pressez de ceste famine, ils en courent tous les

198 *Relation de la Nouvelle France,*
ans les dangers puis qu'ils n'ont point à
manger, ou fort peu, s'il n'y a beaucoup
de neige & beaucoup d'Orignaux, ce
qui n'arriue pas tousiours.

Que si vous me demandez mainte-
nant quels estoient mes sentimens dans
les afres de la mort, & d'une mort si
langoureuse comme est celle qui pro-
uient de la famine, ie vous diray que i'ay
de la peine à répondre; neantmoins afin
que ceux qui liront ce Chapitre, n'ap-
prehendent point de nous venir secou-
rir, ie puis asseurer avec verité que ce
temps de famine m'a esté vn temps d'a-
bondance. Ayant recogneu que nous
commencions à floter entre l'esperance
de la vie & la crainte de la mort, ie fis
mon conte que Dieu m'auoit condam-
né à mourir de faim pour mes pechez, &
baissant mille fois la main qui auoit mi-
nuté ma sentence, j'en attendois l'exé-
cution avec vne paix & vne ioye qu'on
peut bien sentir, mais qu'on ne peut
décrire : ie confesse qu'on souffre, &
qu'il se faut resoudre à la Croix: mais
Dieu fait gloire d'ayder vne ame quand
elle n'est plus secourüe des creatures.
Poursuiuons nostre chemin.

Après ceste famine nous eufmes
quelques bons iours, la neige qui n'e-
toit que trop haute pour auoir froid,
mais trop basse pour prendre l'Orignac,
s'estant grandement accreuë sur la fin
de Ianuier, nos Chasseurs prirent quel-
ques Orignaux, dont ils firent seiche-
rie: or soit que mon intemperance, ou
que ce boucan dur comme du bois, &
male comme les ruës fut contraire à mon
estomach, ie tombay malade au beau
commencement de Feurier, me voila
donc contraint de demeurer tousiours
couché sur la terre froide, ce n'estoit pas
pour me guerir des tranchées fort sen-
sibles qui me tourmentoient, & qui me
contraignoient de sortir à toute heure
our & nuit, m'engageant à chaque
sortie dedans les neiges iusques aux ge-
noux, & parfois quasi iusques à la cein-
ture, notamment au commencement
que nous nous estions cabanez en quel-
que endroit, ces douleurs sensibles me
durèrent enuiron huit ou dix iours,
comme aussi vn grand mal d'estomach,
& vne foiblesse de cœur qui se répan-
doit par tout le corps, ie guaray de ceste
maladie, non pas tout à fait: car ie ne fis

200 *Relation de la Nouvelle France,*
que traifner iufques à la my-Carefme
que le mal me reprit. Ie dis cecy pour
faire voir le peu de fecours qu'on doit
attendre des Sauvages quand on eft ma-
lade : eftant vn iour preffé de la foif ie
demanday vn peu d'eau, on me répon-
dit qu'il n'y en auoit point & qu'on me
donneroit de la neige fonduë fi i'en
voulois: comme ce breuuage eftoit con-
traire à mon mal, ie fis entendre à mon
hôte que i'auois veu vn lac nō pas loing
de là, & que i'en euſſe bien voulu auoir
vn peu d'eau, il fit la ſourde oreille à
cauſe que le chemin eftoit vn peu faſ-
cheux, ſi bien que non ſeulement ceſte
fois; mais encore en tous les endroits
que quelque fleuve ou quelque ruiſ-
ſeau eftoit vn peu trop eſloigné de no-
ſtre cabane, il falloir boire de ceſte nei-
ge fonduë dans vne chaudiere, dont le
cuiure eftoit moins épais que la ſaleté:
qui voudra ſçauoir l'amertume de ce
breuuage qu'il le tire d'un vaiſſeau ſor-
tant de la fumée & qu'il en gouſte.

Quant à la nourriture, ils partagent
le malade comme les autres; ſ'ils pren-
nent de la chair freſche, ils luy en don-
nent ſa part ſ'il en veut, ſ'il ne la mange,

pour lors on ne se met pas en peine de luy en garder vn petit morceau quand il voudra manger, on luy donnera de ce qu'il y aura pour lors en la cabane, c'est à dire du boucan & non pas du meilleur: car ils le reseruent pour les festins, si bien qu'un pauvre malade est contraint bien souuent de manger parmy eux, ce qui luy feroit horreur dans la santé mesme s'il estoit avec nos François. Vne ame bien alterée de la soif du Fils de Dieu, ie veux dire des souffrances, trouueroit icy dequoy se rassasier.

Il me reste encore à parler de leur conuersation, pour faire entierement cognoistre ce qu'on peut souffrir avec ce peuple. Je m'estois mis en la compagnie de mon hoste & du Renegat, à condition que nous n'hyuernerions point avec le Sorcier, que ie cognoissois pour tres-meschant homme, ils m'auoient accordé ces conditions, mais ils furent infidelles, ne gardans ny l'une ny l'autre: ils m'engagerent donc avec ce pretendu Magicien, comme ie diray cy apres; or ce miserable homme, & la fumée m'ont esté les deux plus grands tour-

202 *Relation de la Nouvelle France,*
mens que j'aye enduré parmy ces Bar-
bares : ny le froid, ny le chaud, ny l'in-
commodité des chiens, ny coucher à
l'air, ny dormir sur vn liſt de terre, ny la
poſture qu'il faut touſiours tenir dans
leurs cabanes, ſe ramaffans en peloton,
ou ſe couchans, ou ſ'affeans ſans ſiege
& ſans mattelas, ny la faim, ny la ſoiſ, ny
la pauureté & ſaleté de leur boucan, ny
la maladie, tout cela ne m'a ſemblé que
ieu à comparaiſon de la fumée & de la
malice du Sorcier, avec lequel j'ay
touſiours eſté en tres mauuiſe intelli-
gence pour les raiſons ſuiuantes.

Premierement, pource que m'ayant
inuité d'hyuerner avec luy, ie l'auois
éconduy, dequoy il ſe reſſentoit fort,
voyant que ie faiſois plus d'eſtat de mon
hoſte, ſon cadet, que de luy.

Secondement, pource que ie ne pou-
uois affouuir ſa cōuoitiſe, ie n'auois rien
qu'il ne me demandſt, il m'a fait fort
ſouuent quitter mon manteau de deſſus
mes eſpaules pour ſ'en couvrir : or ne
pouuant pas ſatisfaire à toutes ſes de-
mandes, il me voyoit de mauuais œil,
voire meſme quand ie luy euſſe donné
tout le peu que j'auois, ie n'eufſe peu ga-

gner son amitié : car nous auions bien d'autres sujets de diuorce.

En troisiésme lieu, voyant qu'il faisoit du Prophete , amusant ce peuple par mille sottises qu'il inuente à mon aduis tous les iours, ie ne laissois perdre aucune occasion de le conuaincre de niaiserie & de puerilité, mettant au iour l'impertinence de ses superstitions: or c'estoit luy arracher l'ame du corps par violence : car comme il ne sçauoit plus chasser, il fait plus que iamais du Prophete & du Magicien pour conseruer son credit, & pour auoir les bons morceaux, si bien qu'esbranlant son autorité qui se va perdant tous les iours, ie le touchois à la prunelle de l'œil, & luy rauissois les delices de son Paradis, qui sont les plaisirs de la gueule.

En quatriésme lieu, se voulant recrer à mes dépens, il me faisoit par fois escrire en sa langue des choses sales, m'assurant qu'il n'y auoit rien de mauuais, puis il me faisoit prononcer ces impudences, que ie n'entendois pas deuant les Sauvages : quelques femmes m'ayans aduertý de ceste malice, ie luy dis que ie ne salirois plus mon papier ny ma

204 *Relation de la Nouvelle France*
bouche, de ces vilaines paroles, il ne
laisa pas de me commander de lire en
la presence de toute la cabane, & de
quelques Sauvages qui estoient surue-
nus, quelque chose qu'il m'auoit dicté,
ie luy répondis que l'Apostat m'en don-
nat l'interpretation, & puis que ie lirois,
ce Renegat refusant de le faire, ie refu-
say aussi de lire, le Sorcier me le com-
mande avec empire, c'est à dire avec
de grosses paroles, ie le prie au com-
mencement avec grande douceur de
m'en dispenser: mais comme il ne vou-
loit pas estre éconduit deuant les Sau-
uages, il me presse fort & me fait presser
par mon hoste qui fit du fasché: enfin
reconnoissant que mes excuses n'auoient
plus de lieu, ie luy parle d'un accent fort
haut, & apres luy auoir reproché ses
lubricitez, ie luy adresse ces paroles,
Me voicy en ton pouuoir, tu me peux
massacrer, mais tu ne sçauois me con-
traindre de proferer des paroles impu-
diques: elles ne sont pas telles, me dit-
il, Pourquoi donc, luy dis-je, ne m'en
veut-on pas donner l'interpretation? il
sortit de ceste meslée fort vlcéré.

En cinquième lieu, voyant que mon

monste m'aymoit, il eut peur que cet amour ne le priuast de quelque friand morceau, ie taschay de luy oster ceste apprehension, témoignant publiquement que ie ne viuois pas pour manger, mais que ie mangeois pour viure, & qu'il m'apportoit peu quoy qu'on me donnast, pourueu que i'en eusse assez pour ne point mourir: il me repartit nettement, qu'il n'estoit pas de mon aduis, mais qu'il faisoit profession d'estre friand, d'aymer les bons morceaux, & qu'on l'obligeoit fort quand on luy en presentoit: or i'ajoit que mon hoste ne luy donnast aucun sujet de craindre en cet endroit, si est-ce qu'il m'attaquoit quasi en tous les repas, comme s'il eut la peur de perdre la preface, ceste apprehension augmentoit sa haine.

En sixiesme lieu, comme il voyoit que les Sauvages des autres cabanes me portoient quelque respect, cognoissant d'ailleurs que i'estois grand ennemy des impostures, & que si i'entrois dans l'esprit de ses oüailles, que ie le perdroid le fond en comble, il faisoit son possible pour me détruire, & pour me rendre ridicule en la creance de son peuple.

En septiesme lieu, adioustez à tout cecy l'auerfion que luy & tous les Sauvages de Tadoussac ont eu iusques icy des François depuis le commerce des Anglois, & coniecturez quel traitement ie peux auoir receu de ces Barbares, qui adorent ce miserable Sorcier, contre lequel le plus souuent i'auois guerre declarée. I'ay creu cent fois que ie ne sortirois iamais de ceste meslée que par les portes de la mort. Il ma traité fort indignement, il est vray, mais ie m'estonne qu'il n'a pis fait, veu qu'il est idolatre de ces superstitions, que ie combattois de toutes mes forces. De raconter par le menu toutes ses attaques, ses risées, ses gaufferies, ses mépris, ie ferois vn Liure pour vn Chapitre, suffit de dire qu'il s'attaquoit mesme par fois à Dieu pour me déplaire, & qu'il s'efforçoit de me rendre la risée des petits & des grands, me décriant dans les autres cabanes aussi bien que dans la nostre, il n'eut neantmoins iamais le credit d'animer contre moy les Sauvages nos voisins, ils baissoient la teste quand ils entendoient les benedictions qu'il me donnoit. Pour les domestiques incitez par

son exemple, & appuyez de son autorité, ils me chargoient incessamment de mille brocards, & de mille injures, ie ne suis veu en tel estat, que pour ne les aigrir, ou ne leur donner occasion de se fâcher, ie passois les iours entiers sans ouvrir la bouche. Croyez moy si ie n'ay rapporté autre fruit des Sauvages, i'ay pour le moins appris beaucoup d'injures en leur langue, ils me disoient à tout bout de champ *eca titou, eca titou nama khirinisin*, tais toy, tais toy, tu n'as point d'esprit. *Achineou*, il est orgueilleux, *Moucachtechion*, il fait du compagnon, *Iségau* il est superbe, *cou attimon* il ressemble à vn Chien, *cou maséoua* il ressemble à vn Ours, *cou ouabouchou ouichtoui* il est barbu comme vn Lieure, *attimonai ou khimau* il est Capitaine des Chiens, *cou oucoufimas ouchtigonan* il a la teste faite comme vn citrouille, *matchirinion* il est difforme, il est laid, *khichouebeon* il est yure; voila les couleurs dont ils me peignoient, & de quantité d'autres que j'obmets: le bon est qu'ils ne pensoient pas quelquesfois que ie les entendisse, & me voyans souffrir ils demeueroient confus, du moins ceux qui ne chantoient

ces airs que pour complaire au Sorcier les enfans m'estoient fort importun me faisans mille niches, m'imposans silence quand ie voulois parler. Quand mon hoste estoit au logis i'auois quelque relache, & quand le Sorcier s'absentoit i'estois dans la bonace maniant les grands & les petits quasi comme ie voulois. Voila vne bonne partie de choses qu'on doit souffrir parmy ces peuples: cecy ne doit épouuenter personne, les bons soldats s'animent à la veuë de leur sang & de leurs playes. Dieu est plus grand que nostre cœur, on ne tombe pas tousiours dans la famine, on ne rencontre pas tousiours des Sorciers, ou des iongleurs de l'humeur de celui-cy: en vn mot si nous pouuions sçauoir la langue & la reduire en preceptes il ne seroit plus de besoin de fuir ces Barbares. Pour les nations stables, d'où nous attendons le plus grand fruit, nous pouuons auoir nostre cabane à part, & par consequent nous deliurer d'vne partie de ces grandes incommoditez: mais finissons ce Chapitre, autrement ie me voy en danger d'estre aussi importun que cet imposteur que

en l'année 1634.

209

que ie recommande aux prieres de tous
eux qui liront cecy, ie coucheray au
Chapitre suiuant quelques entretiens
que i'ay eu avec luy, lors que nous
estions dans quelque tréue.

CHAPITRE XIII.

*Contenant vn Journal des choses qui
n'ont peu estre couchées sous les
Chapitres precedens.*

SI ce Chapitre estoit le premier dans
ceste relation, il donneroit quelque
lumiere à tous les suiuaus : mais ie luy
ay donné le dernier rang, pource qu'il
grossira tous les iours iusques au de-
part des vaisseaux, par le rencontre des
choses plus remarquables qui pourront
seruiuer, n'estant qu'un memoire en for-
me de Journal, de tout ce qui n'a peu
estre logé dans les Chapitres préce-
dens.

Après le depart de nos François qui
sortirent de la rade de Kebec, le 16.
Aoust de l'an passé 1633. pour tirer à
adouffac, & de là en France, cher-

210 *Relation de la Nouvelle France,*
chant l'occasion de conuerſer avec le
ſauuages, pour apprendre leur langue
ie me transportay delà le grand fleu-
de ſainct Laurens dans vne cabane de
ſueillages, & allois tous les iours
l'eſcole dans celles des ſauuages, qui
nous enuironnoient, alleché par l'eſpe-
rance que i'auois, ſinon de reduire le
Renegat à ſon deuoir, du moins de tire
de luy quelque cognoiſſance de ſa lan-
gue: ce miſerable eſtoit nouuellement
arriué de Tadouſſac, où il ſ'eſtoit moſtré
fort contraire aux François, la faim qui
preſſoit l'Apoſtat & ſes freres, les fi-
monter à Kebec pour trouuer de quoi
viure: eſtās donc occupez à leur peſche
i'eſtois fort ſouuent en leur cabane, in-
uitant par fois le Renegat de venir vn
autre fois hyuerner avec nous dans
noſtre maiſonnette, il ſ'y fuſt ayſement
accordé n'eſtoit qu'il auoit pris femme
d'vne autre nation que la ſienne, & qu'il
ne la pouuoit pas renuoyer pour lors
voyant donc qu'il ne me pouuoit pas
ſuivre, ie luy iettay quelque propos de
paſſer l'hyuer avec luy, mais ſur ce
entrefaictes vne furieuſe tempeſte nou-
uant battu en ruine certaine nuit, le

Pere de Noüe, deux de nos hommes, & moy, dans nostre cabane, ie fus saisy d'une grosse fièvre, qui me fit chercher nostre petite maisonnette pour y trouver la santé.

L'Apostat ayant veu mon inclination traicta de mon dessein avec ses freres, il en avoit trois, l'un nommé Carigonan, & surnommé des François l'Espousée, pource qu'il fait le grand comme une espousée, c'est le plus fameux forcier, ou *maritonson*, (c'est ainsi qu'ils appellent ces iongleurs) de tout le pays, c'est celuy dont j'ay fort parlé cy-dessus: l'autre se nomme Mestigoït, ieune homme âgé de quelque trentecinq ou quarante ans, braue Chasseur, & d'un bon naturel: le troisieme se nommoit Sasoufinat, c'est le plus heureux de tous: car il est maintenant au Ciel, estât mort bon Chrestien, comme ie l'ay fait voir au Chapitre second. Le forcier ayant appris du Renegat que ie voulois hyuerner avec les Sauvages, me vint voir sur la fin de ma maladie, & m'inuita de prendre sa cabane, me donnant pour raison qu'il aymoit les bons, pource qu'il estoit bon, qu'il avoit

tousiours esté bon dès sa tendre ieunesse : il me demanda si Iesus ne m'auoit parlé de la maladie qui le travailloit : viens, me disoit-il, avec moy, & tu me feras viure maintenant : ie suis en danger de mourir : or comme ie le cognoissois comme vn homme tres-impudent, ie l'éconduy le plus doucement qu'il me fut possible, & tirant à part l'Apostat, qui taschoit de m'auoir de son costé, ayant tesmoigné au Pere de Noüe quelque desir de retourner à Dieu, ie luy dy que i'hyuurnerois volontiers avec luy, & avec son frere Mestigoit, à condition que nous n'irions point dela le grand fleuve, que le forcier ne seroit point en nostre compagnie, & que luy qui entend bien la langue Françoisse m'enseigneroit : ils m'accorderent tous deux ces trois conditions, mais ils n'en tindrent pas vne.

Le iour du départ estant pris, ie leur donnay pour mon viure vne barrique de galette, que nous empruntasmes au magazin de ces Messieurs, vn sac de farine, & des espics de bled d'Inde, quelques pruneaux, & quelques na-

neaux, ils me presserent fort de porter vn peu de vin, mais ie n'y voulois point entendre, craignant qu'ils ne s'en-yurassent : toutesfois m'ayans promis qu'ils n'y toucheroient point sans ma permission, & les ayant asseuré qu'au cas qu'ils le fissent, que ie le ietterois dans la mer, ie suiuy l'inclination de ceux qui me conseillèrent d'en porter vn petit barillet; ie promis en outre à Mestigoit que ie le prenois pour mon hoste : car l'Apostat n'est pas Chasseur, & n'a aucune conduite, que ie luy ferois quelque present au retour, comme j'ay fait : c'est l'attente de ces viures qui leur fait desirer d'auoir vn François avec eux.

Ie m'embarquay donc en leur chaouppe, iustement le 18. d'Octobre, faisant profession de petit écolier, à mesine pour que j'auois autrefois fait profession de maistre de nos écoles, estât allé prendre congé de Monsieur nostre Gouverneur, il me recommanda tres particulièrement aux Sauuages, mon hoste luy reparti, si le Pere meurt ie mourray avec luy, & iamais plus on ne me reuera en ce pays icy, nos François me tesmoignoient

214 *Relation de la Nouvelle France,*
tout plein de regret de mon depart, veu
les dangers esquels on s'engage en la
suinte de ces Barbares. Les Adieu faits
de part & d'autre, nous fîmes voile en-
viron les dix heures du matin, i'estois
seul de François avec vingt Sauvages,
comptant les hommes, les femmes, & les
enfans, le vent & la marée nous favori-
fians, nous allâmes descendre au delà de
l'Isle d'Orleans dans vne autre Isle nom-
mée des Sauvages *Caonahascoumagakbe*,
ie ne sçay si la beauté du iour se respan-
doit dessus ceste Isle, mais ie la trouuay
fort agreable.

Si tost que nous eûmes mis pied à
terre, mon hôte prend vne harquebuse
qu'il a achetée des Anglois, & s'en va
chercher nostre souper: cependant les
femmes se mettent à bastir la maison où
nous deuions loger. Or l'Apostat s'estant
pris garde que tout le monde estoit oc-
cupé, s'en retourna à la chaloupe qui
estoit à l'ancre, prit le petit barillet de
vin, & en beut avec tel excez, que s'estant
enyuré comme vne souppe, il tomba de-
dans l'eau, & se pensa noyer: enfin il en
sortit apres auoir bien barboté, il s'en
vint vers le lieu où on dressoit la caba-

e, criant & hurlant comme vn demo-
 niaque, il arrache les perches, frappe sur
 les écorces de la cabane, pour tout bri-
 er: les femmes le voyant dans ces fou-
 ries s'enfuyent dans le bois, qui deçà
 qui delà, mon Sauvage que ie nomme
 ordinairement mon hôte, faisoit bouillir
 dans vn chauderon quelques oyseaux
 qu'il auoit tuez: cet yurongne suruenāt
 rompt la cramailiere, & renuerse tout
 dans les cendres: à tout cela pas vn ne
 fait mine d'estre fasché, aussi est ce fo-
 rie de se battre contre vn fol, mon hôte
 ramasse ses petits oyseaux, les va luy-
 mesme lauer à la riuere, puis de l'eau,
 & remet la chaudiere sur le feu, les
 femmes voyant que cét homme enragé
 pouroit çà & là sur le bord de l'Isle, écu-
 rant comme vn possédé, viennent viste
 prendre leurs écorces, & les emportent
 en vn lieu écarté, de peur qu'il ne les
 mette en pieces comme il auoit com-
 mencé: à peine eurent-elles le loysir de
 se rouler qu'il parut auprès d'elles tout
 forcené, & ne sçachant sur qui deschat-
 ger sa fureur: car elles disparurent in-
 continent à la faueur de la nuit qui
 commençoit à nous cacher, il s'en vint

216 *Relation de la Nouvelle France,*
par le feu qui se descouroit par sa clarté, & voulant mettre la main sur la chaudiere pour la renuerfer vne autre fois, mon hoste son frere, plus habile que luy, la prit & luy ietta au nez toute bouillante comme elle estoit, ie vous laisse à penser quelle contenance tenoit ce pauvre homme, se voyant pris à la chaude, iamais il ne fut si bien laué, il changea de peau en la face, & en tout l'estomach, pleust à Dieu que son ame eust changé aussi bien que son corps: il redouble ses hurlemens, arrache le reste des perches, qui estoient encor debout: mon hoste m'a dit depuis qu'il demandoit vne hache pour me tuer, ie ne sçay s'il la demanda en effect, car ie n'entendois pas son langage, mais ie sçay bien que me presentant à luy pour l'arrester il me dit, parlant François, Retirez-vous, ce n'est pas à vous à qui i'en veux, laissez-moy faire, puis me tirant par la sotane, Allons, disoit-ile, embarquons-nous dans vn canot, retournons en vostre maison, vous ne cognoissez pas ces gens cy, ce qu'ils en font, c'est pour le ventre, ils ne se soucient pas de vous, mais de vos viures,

à cela ie répondois tout bas à part moy,
in vino veritas.

La nuit s'auançant bien fort ie me retiray dedans le bois pour fuir l'importunité de cet yurongne, & pour prendre quelque repos : comme ie faisois mes prieres aupres d'un arbre, la femme qui faisoit le ménage de mon hoste me vint trouuer, & ramassant quelques feüilles d'arbres tombées, me dit; couche toy là, & ne fais point de bruit, puis m'ayant ietté vne écorce pour me couvrir, elle se retira : voila donc mon premier giste à l'enseigne de la Lune qui me découvroit de tous costez, me voila passé Cheualier dès le premier iour de mon entrée en ceste Academie, la pluye suruenant vn peu auant minuit, me donna quelque apprehension d'estre mouillé, mais elle ne dura pas long temps : le lendemain matin ie trouuay que mon lit, quoy qu'on ne l'eut point remué depuis la creation du monde, n'estoit point si dure qu'il m'empeschat de dormir.

Le iour suiuant ie voulu ietter le bailliet & le reste du vin dans la riuiera, comme ie leurs auois dit que ie ferois,

218 *Relation de la Nouvelle France,*

au cas qu'on en abusast, mon hôte me saisissant par le milieu du corps, s'écria *eca toute, eca toute*, ne fais pas cela, ne fais pas cela, ne vois tu pas que *Petricrich* (c'est ainsi qu'ils nomment le Renegat par derision) n'a point d'esprit, que c'est vn chien, ie te promets qu'on ne touchera plus au barillet que tu ne sois present: ie m'arrestay avec resolution d'en faire largesse, afin de me deliurer de la crainte qu'un peu de vin ne nous fit boire beaucoup d'eau: car s'ils se fussent enyurez pendant que nous faisons voile, c'estoit pour nous perdre.

Nous voulions sortir le matin de ceste Isle; mais la marée se retirant plus tost que nous ne pensions, nostre Chaloupe s'échoüa: si bien qu'il fallut attendre la marée du soir, en laquelle nous nous embarquasmes, & voguans à la faueur de la Lune aussi bien que du vent, nous abordasmes vne autre Isle nommée *Ca ouapascounagate*. Comme nous arriuasmes sur la minuit, nos gens ne prirent pas la peine de nous bastir vne maison, si bien que nous couchasmes au mesme liêt, & logeasmes à la mesme enseigne que la nuit prece-

ente, abriez des arbres & du ciel.

Le lendemain nous quittasmes ceste
le pour entrer dans vne autre appel-
e *Cachibarionachcate*, nous la pourrions
ommer l'Isle aux Oyes blanches, car
y en vis plus de mille en vne bande.

Le iour d'apres nous la voulions quit-
ter, mais nous fusmes contraints pour
mauvais temps de relascher au bout
de ceste mesme Isle, elle est deserte
comme tout le pays, c'est à dire qu'elle
a des habitans qu'en passant, ce peu-
le n'ayant point de demeure assurée:
elle est bordée de rochers si gros, si
hauts, & si entrecoupez & peuplée
tantmoins de Cedres & de Pins si pro-
prement, qu'un Peintre tiendrait à fa-
veur d'en auoir la veüe pour tirer l'idée
d'un desert affreux pour ses precipices,
et tres agreable pour la varieté de
quantité d'arbres qu'on diroit auoir
esté plantez par la main de l'art plustost
que de la Nature. Comme elle est entre-
saillée de bayes pleines de vases, il s'y re-
trouue si grande quantité de gibier & de
plusieurs especes que ie n'ay point veu
en France, qu'il le faut quasi voir pour
le croire.

210 *Relation de la' Nouvelle France*

Sortans de ceste Isle au gibier nous nauigeasmes tout le iour & vinsmes descendre sur la nuit dans vne petite Islette nommé *Atisaoucanich etagoukhi*, c'est à dire lieu où se trouue la teinture, ie me doute que nos gens luy donnerent ce nom, pource qu'ils y trouuerent de petites racines rouges, dont ils se seruent pour teindre leurs *Matachias*. J'appellerois volontiers ce lieu l'Islette mal-heureuse : car nous y souffrismes beaucoup huit iours durant que les tempestes nous y retindrent prisonniers. Il estoit nuit quand nous l'abordasmes, la pluye & les vents nous attaquoyent, & ce pendant à peine peut-on trouuer cinq ou six perches pour seruir de poutres à nostre bastiment, qui fut si petit, si estroit, & si decouuert, & par vn temps si fascheux, voulant eiter vne incommodité on tomboit dans deux autres, il se falloir racourcir, ou se rouler en herisson, sur peine de se brusler la moitié du corps pour nostre souper, & pour nostre disner tout ensemble : car nous n'auions point mangé depuis le matin, mon hoste fit ietter à chacun vn morceau de la galette que ie luy auois

lonnée, m'aduertissant que nous mangerions sans boire, car l'eau de ce grand leuue commence en ce lieu d'estre sa-
lée, le lendemain nous recueillismes de l'eau de pluye, tombée dans des roches fort sales, & la beusmes avec autant de plaisir qu'on boit le vin d'Aï en France.

Ils auoient laissé nostre Chaloupe à l'anchre dans vn grand courant de marée, ie les aduerty qu'elle n'estoit pas bien, & qu'il la falloit mettre à l'abry derriere l'Islette; mais comme nous l'attendions qu'un bon vent pour partir, ils n'en tindrent conte. La nuit la tempeste redoublant, on eust dit que les vents deuoient deraciner nostre Isle-
e, mon hoste se doutant de ce qui arri-
ua éueille l'Apostat, & le presse de le venir ayder à sauuer nostre Chaloupe, qui s'alloit perdre: or soit que ce misérable fust paresseux, ou qu'il eust peur des ondes, iamais il ne se voulut leuer, donnant pour toute réponse, qu'il estoit las: dans ce retardement les vents rom-
pent l'amare, ou la corde de l'anchre, & en vn instant font disparoistre nostre Chaloupe, mon hoste voyant ce beau

222 *Relation de la Nouvelle France,*
ménage, me vint dire *Nicanus*, mon bien-
aymé, la Chaloupe est perduë, les vent
qui l'ont enleuëe la briseront contre les
roches qui nous enuironnent de tous
costez. Qui n'eust entré en verue con-
tre ce Renegat, dont la negligence
nous iettoit dans des peines inexplica-
bles, veu qu'il y auoit quantité de pa-
quets dans nostre bagage, & beaucoup
d'enfans à porter. Mon hôte cepen-
dant, tout barbare & tout sauuage qu'il
est, ne se troubla point à cet accident
ains craignant que cela ne m'attristast,
il me dit, *Nicanus*, mon bien-aymé, n'es-
tu point fasché de ceste perte, qui nous
causera de grands trauaux? ie n'en suis
pas bien ayse, luy repartis-je, ne t'en
attriste point, me fit-il: car la fascherie
ameine la tristesse, & la tristesse ameine
la maladie, *Petrictich* n'a point d'esprit,
s'il m'eust voulu secourir ce malheur ne
fust point suruenü, voyla tous les repro-
ches qu'on luy fit. Veritablement cela
me confond, que l'interest de la santé
arreste la cholere, & la fascherie d'un
Barbare, & que la loy de Dieu, que son
bon plaisir, que l'espoir de ses grandes
recompenses, que la crainte de ses

chastimens, que nostre propre paix & consolation ne puisse seruir de bride à l'impatience & à la cholere d'un Chretien.

Au malheur fusdit en suruint vn autre, nous auions outre la Chaloupe vn petit Canot d'écorce, la marée se grossissant plus qu'à l'ordinaire par le soufflé des vents nous le déroba, nous voila prisonniers plus que iamais, ie ne vis ny armes ny plaintes, non pas mesme parmy les femmes, sur le dos desquelles ce desastre tomboit plus particulièrement, à raison qu'elles sont comme les bestes de voiture, portant ordinairement le bagage des Sauvages, au contraire tout le monde se mit à rire.

Le iour venu, car ce fut la nuit que la tempeste commit ce larcin, nous couvrismes tous sur les riués du fleuve, pour apprendre par nos yeux des nouuelles de nostre pauvre Chaloupe, & de nostre Canot, nous vismes l'un & l'autre échouéz fort loing de nous, la Chaloupe parmy des roches, & le Canot au bord du bois de la terre continente, chacun pensoit que tout estoit en pieces: si tost que la mer se fut retirée les

224 *Relation de la Nouvelle France,*

vns courent vers la Chaloupe, les autres vers le Canot, chose estrange; rien ne se trouua endommagé, i'en demeuray tout estonné: car de cent vaisseaux fussent-ils d'un bois aussi dur que le bronze, à peine s'en sauueroit-il pas vn dans ces grands coups de vent & sur des roches.

Pendant que les vents nous tenoient prisonniers dans ceste malheureuse Islete, vne partie de nos gens s'en allerent visiter quelques Sauvages qui estoient à cinq ou six lieues de nous, si bien qu'il ne resta que les femmes & les enfans, & *Lhироquois* dans nostre cabane. La nuit vne femme estant sortie s'en reuint toute effarée criant quelle auoit ouï le *Manitou*, ou le diable, voila l'alarme dans nostre camp, tout le monde remply de peur garde vn profond silence, Je demanday d'où procedoit ceste épouuente: car ie n'auois pas entendu ce qu'auoit dit ceste femme, *eca titou, eca titou*, me dit on, *Manitou*, tais-toy, tais-toy, c'est le diable: ie me mis à rire, & me leuant en pied ie sors de la cabane, & pour les asseurer i'appelle en leur langage le *Manitou*, criant tout haut que ie ne le

ne le craignois pas, & qu'il n'oseroit venir où j'estois : puis ayant fait quelques tours dans nostre Islete, ie rentray, & leur dis, ne craignez point, le diable ne vous fera aucun mal tant que ie seray avec vous, il craint ceux qui croient en Dieu, si vous y voulez croire il s'enfuira de vous. Eux bien estonnez, me demandent si ie ne le craignois point, ie repars pour les deliurer de leur peur, que ie n'en craignois pas vne centaine, ils se mirent tous à rire, se rassurans petit à petit: or voyant qu'ils auoient ietté de l'anguille dans le feu i'en demanday la raison, tais-toy, me firent-ils, nous donnons à manger au diable afin qu'il ne nous fasse point de mal.

Mon hoste à son retour ayant sceu ceste histoire, me remercia fort de ce que j'auois rassuré tous ses gens, me demandant si en effet ie n'auois point de peur du *Manitou*, ou du diable, & si ie le cognoissois bien, que pour eux qu'ils le craignoient plus que la foudre; Ie luy répondis, que s'il vouloit croire, & obéir à celuy qui a tout fait, que le *Manitou* n'auroit nul pouuoir sur luy: pour nous qu'estans assistez de celuy que

226 *Relation de la Nouvelle France,*
nous adorions, le diable auoit plus de
peur de nous, que nous n'auions de luy;
il s'estonna, & me dit qu'il eust bien
voulu que i'eusse eu cognoissance de sa
langue: car figurez vous que nous nous
faisions entendre l'un l'autre plus par
les yeux, & par les mains, que par la
bouche.

Ie dressay quelques prieres en leur
langue, avec l'ayde de l'Apostat: or
comme le Sorcier n'estoit pas encore
venu, ie les recitois le matin, & auant
nos repas, eux-mesmes m'en faisans sou-
uenir, & prenans plaisir à les ouir pro-
noncer; si ce miserable Magicien ne
fust point venu avec nous ces Barbares
auroient pris grand plaisir de m'écou-
ter: mon hoste me faisoit mille que-
stions, me demandant pourquoy nous
mourrions, où alloient nos ames, si la nuit
estoit vniuerselle par tout le monde, &
choses semblables, se monstrant fort at-
tentif à mes réponses. Changeons de
discours.

Ie remarquay en ce lieu cy, que les
ieunes femmes ne mangent point dans
le plat de leurs marys; j'en demanday la
raison, le Renegat me dit que les ieunes

nes filles à marier, & les femmes qui n'auoient point encore d'enfans, n'auoient rien en maniement, & qu'on leur faisoit leur part comme aux enfans, de là vient que sa femme mesme me dit vn iour, Dis à mon mary qu'il me donne bien à manger : mais ne luy dis pas que ie t'ay prié de luy dire.

Pendant certaine nuit, tout le monde estant dans vn profond sommeil, ie me mis à entretenir ce pauvre miserable Renegat, ie luy fis voir qu'estant en nostre maison, rien de tout ce que nous auions ne luy manquoit, qu'il y pouuoit passer sa vie doucement, & qu'en quittant Dieu il s'estoit ietté dans vne vie de beste, qui enfin abboutiroit à l'enfer, s'il n'ouuroit les yeux, que l'éternité estoit bien longue, & que d'estre à iamais compaignon des diables, c'estoit vn long terme. Le voy bien, me fit-il, que ie ne fais pas bien ; mais mon malheur est que ie n'ay pas l'esprit assez fort pour demeurer ferme dans vne resolution, ie croy tout ce qu'on me dit, quand j'ay esté avec les Anglois, ie me suis laissé aller à leurs discours ; quand ie suis avec les Sauvages ie fais comme eux ;

228 *Relation de la Nouvelle France,*
quand ie suis avec vous ie tiens vostre
creance pour veritable, pleut à Dieu que
ie fusse mort quand i'estois malade en
France, ie serois maintenant sauué, tant
que i'auray des parens ie ne feray iamais
rien qui vaille : car quand ie veux de-
meurer avec vous, mes freres me disent
que ie pouriray demeurant tousiours en
vn endroit, cela est cause que ie quitte
tout pour les suiure. Je luy apportay tou-
tes les raisons, & luy fis toutes les offres
que ie peus pour l'affermir: mais son fre-
re le Sorcier qui sera bien tost avec nous
renuier sera tous mes desseins, car il ma-
nie comme il veut ce pauvre Apostat.

Le trentiesme iour d'Octobre nous
sortismes de ceste malheureuse Islete,
& vinsmes aborder sur la nuit dans vne
autre Isle qui porte vn nom quasi aussi
grand comme elle est, car elle n'a pas
demy lieuë de tour, & voicy comme nos
Sauuages me dirët qu'elle se nommoit
Ca paco cachtechickhi chachagen achiganikhi
Ca pakhiraouananionikhi, ie croy qu'ils
forgent ces noms sur le champ, ceste
Isle n'est quasi qu'un grand rocher af-
freux, comme elle n'a point de fontaine
d'eau douce nous fusmes contrains de

boire des eauës de pluyes fort sales que nous ramassions dans des fondrieres, & sur des roches; on ietra le voile de nostre chalouppe sur des perches quand nous y arriuasmes, & nous nous mismes à l'abry là deffous, nostre liët estoit blanc & verd, c'est à dire qu'il y auoit si peu de branches de pin deffous nous, que nous touchions la neige en plusieurs endroits, laquelle auoit commencé depuis trois iours à couvrir la terre d'un habit blanc.

Nous trouuasmes en ce lieu la cabane d'un Sauvage, que nostre hoste cherchoit, nommé *Ekhennabamate*, il apprit de luy que son frere le Sorcier estoit passé depuis peu, & qu'ayant eu le vent contraire, il n'estoit pas loing, il n'attendit pas qu'il fut iour tout à fait pour le suiure, son Canot poussé par trois rameurs alloit comme le vent: bref le beau premier iour de Nouembre dedié à la memoire de tous les Saints, il nous ramena ce Demon, j'entends ce Sorcier. Je fus bien estonné quand ie le vis: car ie ne l'attendois pas, me figurant que mon hoste estoit allé à la chasse, fut-il ainsi, & que ceste miserable proye

230 *Relation de la Nouvelle France,*
luy eust eschappé des mains.

Si tost qu'il fut arriué ce n'estoient plus que festins dans nos cabanes, nous n'auions plus que fort peu de viures de reste, ces Barbares les mangeoient avec autant de paix & d'assurance, comme si les animaux qu'ils deuoient chasser eussent esté renfermez dans vne estable.

Mon hoste faisant vn iour festin à son tour, les conuiez me firent signe que ie haranguasse en leur langue, ils auoient enuie de rire: car ie prononce le Sauvage comme vn Alemant prononce le François, leur voulant donner ce contentement, ie me mis à discourir, & eux à s'éclatter de rire: eux bien aises de gauffer, & moy bien ioyeux d'apprendre à parler: Je leur dis pour conclusion, que i'estois vn enfant, & que les enfans faisoient rire leurs peres par leur begayement: mais qu'au reste ie deviendrois grand dans quelques années, & qu'alors sçachant leur langue ie leur ferois voir qu'eux-mesmes sont enfans en plusieurs choses, ignorans de belles veritez, dont ie leur parlerois, & sur l'heure mesme ie leur demaday si la Lune estoit

aussi hautemēt logée que les Estoilles, si elle estoit en mesme Ciel, où alloit le Soleil quād il nous quittoit, quelle figure auoit la terre, (si ie sçauois leur langue en perfection ie leur proposerois tousiours quelque verité naturelle deuant que de parler des points de nostre créance: car i'ay remarqué que ces curiositez les rendent attentifs) pour ne m'éloigner de mon discours, l'un d'eux prenant la parole apres m'auoir ingenuement confessé qu'ils ne pouuoient répondre à ces questions, me dit; mais comment pourrois-tu toy mesme cognoistre ces choses, puis que nous les ignorons? ie tiray aussi tost vn petit cadran que i'auois dans ma poche, ie l'ouure, & luy mettant en main, ie luy dis; nous voyla dans la nuit profonde, le Soleil ne nous paroist plus, dis moy maintenāt enuifageant ce que ie te presente, en quelle part du monde il est; designe moy le lieu où il se doit demain leuer, où il se doit coucher, où il sera en son midy, marque moy les endroits du Ciel, où il ne va iamais: mon homme répondit des yeux me regardant sans dire mot: ie prens le cadran & luy fais

232 *Relation de la Nouvelle France,*
voir en peu de mots tout ce que ie venois de proposer, adioustant en suite; hé bien comment se peut-il faire que ie cognoisse ces choses, & que vous les ignoriez? i'ay bien d'autres veritez plus grandes à vous dire quand ie sçauray parler. Tu as de l'esprit, me dirent-ils, tu sçauras bien tost nostre langue, ils se sont trompez.

Ce que i'escriis dans ce iournal n'a point d'autre suite, que la suite du temps, voila pourquoy ie passeray souuent du coq à l'asne, comme on dit, c'est à dire que quittant vne remarque ie passeray à vne autre qui ne luy a point de rapport, le temps seul seruant de liaison à mon discours.

Comme l'arc & la fleche semble des armes inuentées par la Nature, puis que toutes les Nations de la terre en ont trouué l'vsage, de mesme vous diriez qu'il y a de certains petits ieux que les enfans trouuent sans qu'on leur enseigne; les petits Sauvages iouent à se cacher aussi bien que les petits François, ils font quantité d'autres traits d'enfance, que i'ay remarqué en nostre Europe, entre autres i'ay veu les petits Parisiens

ietter vne balle d'arquebuse en l'air, & la receuoir avec vn baston vn petit creusé, les petits Sauuages montagnards font le mesme, se seruans d'un petit faisceau de branches de Pin, qu'ils reçoient ou picquent en l'air avec vn baston pointu: les petits Hiroquois ont le mesme passe-temps iettans vn osselet percé qu'ils enlassent en l'air dans vn autre petit os: vn ieune homme de ceste nation me le dit, voyant ioüer les enfans montagnards.

Mō Sauuage & le Sorcier son frere, ayāt appris qu'il y auoit quātité de Mōtagnais es enuirōs du lieu où ils vouloiēt hyuerner, prirent resolution de passer du costé du Nord, craignans que nous ne nous affamassions les vns les autres: les voyla donc resolués d'aller où m'auoit promis mon hoste & le Renegat; mais à peine auions nous fait trois lieuës sur le grand fleuve pour le trauffer, que nous rencontrasmes quatre canots qui nous ramenèrent au Sud, disans que la chafse n'estoit pas bonne du costé du Nord, si bien que ie fus contraint de demeurer avec le sorcier, & d'hyuerner au delà de la grande riuere, quoy que ie peusse

234 *Relation de la Nouvelle France,*
alleguer au contraire. Je voyois bien les
dangers dans lesquels ils me iettoient,
mais ie ne voyois point d'autre remede
que de se confier en Dieu, & le laisser
faire.

Si tost que les nouveaux Sauvages
venus dans ces quatre canots eurent
mis pied à terre, mon hoste leur fit vn
bâquet d'anguilles boucanées, car nous
n'auions déjà plus de pain. A peine ces
conuiés furent-ils de retour en leur ca-
bane, qu'ils dresserent vn festin de pois
qu'ils auoient acheté passans à Kebec,
mais afin que vous voyez les excez de
ce peuple, au sortir de ce banquet, on
vint à vn troisieme, que le forcier auoit
preparé, composé d'anguilles, & de la
farine que i'auois donnée à mon hoste:
cet homme me pressa fort d'estre de la
partie, il auoit fait faire vn retransche-
mēt dans nostre cabane avec des peaux,
& des couuertes, tous les conuiez en-
trèrent là dedans, on me donna ma part
dans vne petite écuelle, mais comme ie
n'estois pas encor tout à fait accoustu-
mé à manger de leur bouillies si sales &
si fades, apres en auoir gousté i'en voulu
donner le reste à la parète de mon hoste,

aussi tost on me dit *khita*, *khita*, mange tout, mange tout, *acoumagouchan*, c'est vn festin à tout manger, ie me mis à rire, & leur dis qu'ils ioüioient à se faire creuer, veu qu'ayans desia esté à deux festins, ils en faisoient vn troisieme à ne rien laisser, mon hoste m'entendant me dit, que dis tu *Nicanis*? le dis que ie ne scaurois tout manger, donne moy, ce fit-il, ton écuelle ie t'ayderay, luy ayant présenté il auala tout ce qui estoit dedans en deux tours de gueule, tirant vne langue longue de la main pour la lecher au fond & par tout, afin qu'il n'y restast rien.

Quand ils furent saouls quasi iusqu'à creuer, le Sorcier prit son tambour & inuita tout le monde à chanter, celuy là chantoit le mieux qui heurloit le plus fort, à la fin de leur tintamarre les voyans d'une humeur assez gaye, ie leur demanday permission de parler, cela m'estant accordé, ie commençay à leur declarer l'affection que ie leur portois, vous voyez, disois ie, de quel amour ie suis porté en vostre endroit, j'ay non seulement quitté mon pays, qui est beau, & bien agreable pour venir dans vos

236 *Relation de la Nouvelle France,*
neiges & dans vos grands bois; mais en-
core ie m'esloigne de la petite maison
que nous auons en vos terres pour vous
suiure & pour apprendre vostre langue.
Ie vous chery plus que mes freres puis
que ie les ay quittez pour vostre amour,
c'est celuy qui a tout fait qui me donne
ceste affection enuers vous, c'est luy qui
creé le premier homme d'où nous som-
mes tous issus, voyla pourquoy n'ayans
qu'un mesme pere nous sommes tous
freres, & nous deuons tous recognoistre
vn mesme Seigneur & vn mesme Capi-
taine, nous deuons tous croire en luy, &
obeir à ses volonte, Le Sorcier m'arre-
stant dit tout haut, quand ie le verray, ie
croiray en luy, autrement non, le moyen
de croire en celuy qu'on ne void pas? Ie
luy répondis, quand tu me dis que ton
pere, ou l'un de tes amis a tenu quelque
discours, ie croy ce qu'il a dit, me figu-
rant qu'il n'est point menteur, & ce pen-
dant ie n'ay iamais veu ton pere: de plus
tu crois qu'il y a vn *Manitou* & tu ne l'as
pas veu. Tu crois qu'il y a des *Khichi-*
couakhi, ou des Genies du iour, & tu ne
les a pas veus: d'autres les ont veus, me
dit-il, Tu ne me sçauois dire, luy re-

party-ie, ny quand, ny comment, ny en
quelle façon, ou en quel endroit on les
a veus, & moy ie te puis dire commēt se
nommoient ceux qui ont veu le Fils de
Dieu en terre, quand il l'ont veu, & en
quel lieu, ce qu'ils ont fait, & en quels
pays ils ont esté. Ton Dieu, me fit-il,
n'est point venu en nostre pays, voila
pourquoy nous ne croyons point en luy,
fais que ie le voye, & ie croiray en luy.
Escoute moy & tu le verras, luy repli-
quay-ie, Nous auons deux sortes de
veuë, la veuë des yeux du corps, & la
veuë des yeux de l'ame, ce que tu vois
des yeux de l'ame peut estre aussi cer-
tain que ce que tu vois des yeux du
corps: Non, dit-il, ie ne vois rien sinon
des yeux du corps, ce n'est est, dormant,
mais tu n'approuue pas nos songes.
Escoute moy iusqu'au bout, luy fis-ie,
Quand tu passe deuant vne cabane de-
laissée, que tu vois encor toutes les per-
ches en rond, que n'as-tu pis l'aire de la ca-
bane tapissée de branches de Pin, quand
tu vois le foyer qui fume encore, n'est-
il pas vray que tu cognois asseurément,
& que tu vois bien qu'il y a eu là des
Sauuages? & que ces perches & tout le

238 *Relation de la Nouvelle France,*
reste que vous laissez quand vous decabanez, ne se sont point rassemblées par cas fortuit? ouy, me dit-il, or ie dis le mesme quand tu vois la beauté & la grandeur de ce monde, que le Soleil tourne incessamment sans s'arrester, que les saisons retournent en leur temps, & que tous les Astres gardent si bien leur ordre, tu vois bien que les hommes n'ont point fait ces merueilles, & qu'ils ne les gouvernent pas, il faut donc qu'il y ait quelqu'un plus noble que les hommes qui ait basti & qui gouverne ceste grande maison: or c'est celuy là que nous appellons Dieu, qui void tout, & que nous ne voyons pas maintenant; mais nous le verrons apres la mort, & nous serons bien-heureux à iamais avec luy si nous l'aymons & si nous luy obeissons. Tu ne sçais ce que tu dis, me re-part-il, apprends à parler & nous entendrons.

Là dessus le P^{re} Apostat de déduire mes raisons & de les expliquer en Sauvage: car j'en voyois de fort attentifs: mais ce miserable Renegat, craignant de déplaire à son frere, ne voulut iamais ouvrir la bouche. Je le prie,

ie le coniure avec toute douceur, en fin
ie redouble ma voix, & le menace de la
part de Dieu, luy protestant qu'il seroit
responsable de l'ame de la femme de son
frere le Sorcier, laquelle ie voyois fort
malade, & pour laquelle i'estois entré
en discours, esperant que si les Sauvages
goustoient mes raisons, qu'ils me per-
mettroient aisément de l'instruire; ce
cœur de bronze ne lechit iamais, ny à
mes prieres, ny à mes menaces, Je prie
Dieu qu'il luy fasse misericorde, mon
hoste me voyant parler d'un accent as-
sez haut, me dit, *Nicanis* ne te fasche
point, avec le temps tu parleras comme
nous, & tu nous enseigneras ce que tu
sçais, nous te presterons l'oreille plus
volontiers qu'à cet opiniastre qui n'a
point d'esprit, auquel nous n'auons nul-
le creance, voila les eloges qu'il donnoit
à ce Renegat. Je luy repliquay, si ceste
femme se portoit bien ie serois consolé,
mais elle est pour mourir dans peu de
iours, & son ame faute de cognoistre
Dieu sera perduë, que si ton frere me
vouloit prester sa parole ie l'instruirois
en peu de temps, sa réponse fut que ie le
laissasse, & que ie sçauois bien que c'e-

estoit vn Bourdaut, pour conclusion on
dit les mots qui terminent le festin, &
chacun se retira, moy bien dolent de
voir ceste ame se perdre en ma presence
sans la pouuoir secourir: car le Sorcier
ayant commencé à leuer le masque &
l'Apostat à m'éconduire en sa cōsidera-
tion, toutes les esperances que ie pou-
uois auoir d'ayder ceste femme malade
d'instruire les autres commencerent à
s'éuanoïir, j'ay souuent souhaitté qu'un
Saint fust en ma place pour operer en
Saint, les petites ames crient beaucoup
& font peu, il se faut contenter de la
basseſſe: poursuiuons nostre voyage.

Le douziesme de Nouembre nous
commençâmes en fin d'entrer dedans
les terres, laissant nos Chaloupes &
nos Canots, & quelqu'autre bagage
dans l'Isle au grand nom, de laquelle
nous sortîmes de mer basse, trauersans
vne prairie qui la separe du continent:
iusques icy nous auons fait chemin dans
le pays des poissons, tousiours sur les
eauës, ou dans les Isles, doreſnauant
nous allons entrer dans le Royaume des
bestes sauages, ie veux dire de beau-
coup plus d'estéduë que toute la Frâce.

Les

Les Sauvages passent l'hyuer dedans ces bois, courans çà & là, pour y chercher leur vie; au commencement des neiges ils cherchent le Castor dans des petits fleuves, & le Porc-espics dans les terres, quand la neige est profonde ils chassent à l'Orignac & au Caribou, comme j'ay dit.

Nous auons fait dans ces grands bois, depuis le 12. Nouembre de l'an 1633. que nous y entraismes, iusques au 22. d'Auril de ceste année 1634. que nous retournaismes aux riués du grand fleuve de saint Laurens, vingt-trois stations, tantost dans des vallées fort profondes, puis sur des montagnes fort releuées; quelque fois en plat pays, & tousiours dans la neige: ces forests où j'ay esté sont peuplées de diuerses especes d'arbres, notamment de Pins, de Cedres, & de Sapins. Nous auons trauersé quantité de torrens d'eau, quelques fleuves, plusieurs beaux lacs & estangs marchans sur la glace; mais descendons en particulier & disons deux mots de chaque station, la crainte que j'ay d'estre long me fera retrancher quantité de choses que j'ay iugé assez legeres,

242 *Relation de la Nouvelle France*
quoy qu'elles puissent donner quelque
iour à ces memoires.

A nostre entrée dans les terres nous
estions trois cabanes de compagnie, il y
auoit dixneuf personnes en la nostre, il
y en auoit seize en la cabane du Sauua-
ge nommé Ekhennabamate, & dix dans
la cabanne des nouueaux venus. Je ne
conte point les Sauuages qui estoient à
quelques lieuës de nous, nous faisons
en tout quarante cinq personnes, qui
deuions estre nourris de ce qu'il plairoit
à la sainte Prouidence du bon Dieu de
nous enuoyer; car nos prouisions ti-
roient par tout à la fin.

Voicy l'ordre que nous gardions
leuans le camp, battans la campa-
gne, & dressans nos tentes & nos pa-
uillons. Quand nos gens remarquoient
qu'il n'y auoit plus de chasse à quelques
trois ou quatre lieuës à l'entour de nous,
vn Sauuage qui cognoissoit mieux le
chemin du lieu où nous allions, crioit à
pleine teste, en vn beau matin hors de la
cabane, Escoutez hommes ie m'en vais
marquer le chemin pour decabaner de-
main au point du iour, il prenoit vne
hache & marquoit quelques arbres qui

nous guidoient; on ne marque le chemin qu'au commencement de l'hyuer: car quand tous les fleuves & les torrens sont glacez & que la neige est haute on ne prend pas ceste peine.

Quand il y a beaucoup de pacquets, ce qui arriue lors qu'ils ont tué grand nombre d'Eslans, les femmes en vont porter vne partie iusqu'au lieu où l'on doit camper le iour suiuant; quand la neige est haute, ils font des traînières de bois qui se fend, & qui se leue comme par uicilles assez minces & fort longues, ces traînières sont fort estroites à raisõ qu'elles se doiuent tirer entre vne infinité d'arbres fort pressez en quelques endroits, mais en recompense elles sont fort longues. Voyant vn iour celle de mon hôte dressée contre vn arbre, à peine peus ie atteindre au milieu estendant le bras autant qu'il me fut possible. Ils lient leur bagage là dessus, & avec une corde qui leur vient passer sur l'estomach, ils traînent sur la neige ces chariots sans roues.

Pour ne m'éloigner dauantage de mon chemin, si tost qu'il est iour chacun se prepare pour déloger, on commence

244 *Relation de la Nouvelle France,*
par le desieuner s'il y a dequoy ; car par
foison part sans desieuner, on poursuit
sans dîner & on se couche sans souper
chacun fait son paquet le mieux qu'il
peut, les femmes battent la cabane pour
faire tomber la glace & la neige de des-
sus les écorces qu'elles roulent en fais-
ceaux, le bagage estant plié ils iettent
sur leur dos ou sur leurs reins de longs
fardeaux qu'ils supportent avec vn
corde, qui passe sur leur front, sous la-
quelle ils mettent vn morceau d'écorce
de peur de se blesser ; tout le monde
chargé on monte à cheual sur des ra-
quettes qu'on se lie aux pieds afin de ne
point enfoncer dans la neige, cela fait
on marche en campagne & en monta-
gnes, faisant passer deuant les petits en-
fans qui partent bien tost & n'arriuent
par fois que bien tard, ces pauvres pe-
tits ont leur paquet, ou leur traîneau
pour s'accoustumer de bonne heure à la
fatigue, & tasche-on de leur donner de
l'emulation à qui portera ou traînera
dauantage, de vous depeindre la diffi-
culté des chemins, ie n'ay ny plume ny
pinceau qui le puisse faire, il faut auoir
veu cét obiect pour le cognoistre, &

auoir gousté de ceste viande pour en
sçauoir le goust, nous ne faisions que
monter & descendre, il nous falloit sou-
uent baisser à demy corps pour passer
soubz des arbres quasi tombez, & mon-
ter sur d'autres couchez par terre, dont
les branches nous faisoient quelques
fois tomber assez doucement, mais
toufiours froidement, car c'estoit sur la
neige. S'il arriuoit quelque dégel, ô
Dieu quelle peine! il me sembloit que
ie marchois sur vn chemin de verre qui
se cassoit à tous coups soubz mes pieds:
la neige congelée venant à s'amollir
tomboit & s'enfonçoit par esquarres ou
grandes pieces, & nous en auions bien
souuent iusques aux genoux, quelque-
fois iusqu'à la ceinture, que s'il y auoit
de la peine à tomber, il y en auoit encor
plus à se retirer: car nos raquettes se
chargeoient de neiges & se rendoient si
pesantes, que quand vous veniez à les
retirer il vous sembloit qu'on vous tiroit
les iambes pour vous démembler. L'en
ay veu qui glissoient tellement soubz
des fouches enseuelies soubz la neige,
quine pouuoient tirer ny iambes ny ra-
quettes sans secours: or figurez vous

246 *Relation de la Nouvelle France,*
maintenant vne personne chargée com-
me vn mulet, & iugez si la vie des Sau-
uages est douce.

En France dans la difficulté des voya-
ges encor trouue-on quelques villages
pour se rafraischir, & pour se fortifier;
mais les hostelleries que nous rencon-
trions, & où nous beuuiions, n'estoient
que des ruisseaux, encor falloit-il rom-
pre la glace pour en tirer de l'eau; il est
vray que nous ne faisons pas de lon-
gues traites, aussi nous eust-il esté tout à
fait impossible.

Estans arriuez au lieu où nous de-
uions camper, les femmes alloient cou-
per les perches pour dresser la cabane,
les hommes vuidoient la neige, comme
ie l'ay plus amplement déduit au Cha-
pitre precedent: or il falloit traual-
ler à ce bastiment, ou bien trembler de
froid trois grosses heures sur la neige en
attendant qu'il fut fait, ie mettois par-
fois la main à l'œuvre pour m'échauffer,
mais i'estois pour l'ordinaire tellement
glacé que le feu seul me pouuoit dége-
ler; les Sauvages en estoient estonnez:
car ils suioient sous le traual, leur té-
moignant quelquefois que i'auois grâd

froid, ils me disoient, donne tes mains que nous voyons si tu dis vray, & les trouuans toutes glacées, touchez de compassion ils me donnoient leurs mains échauffées, & prenoient les miennes toutes froides: iusque là que mō hôte apres auoir expérimenté cecy plusieurs fois, me dit *Nicanus* n'hyuerne plus avec les Sauvages, car ils te tuëront; il vouloit dire, comme ie pense, que ie rōberoïs malade & que ne pouuant estre traîné avec le bagage, qu'on me feroit mourir, ie me mis à rire, & luy reparty qu'il me vouloit épouuenter.

La cabane estant faite, ou sur la nuit, ou vn peu deuant, on parloit de disner & de souper tout ensemble: car sortant le matin apres auoir mangé vn petit morceau, il falloit auoir patience qu'on fut arriué & que l'hostellerie fust faite pour y loger, & pour y manger, mais le pis estoit que ce iour là nos gens n'allans point ordinairement à la chasse, c'estoit pour nous vn iour de ieusne aussi bien qu'vn iour de trauail. C'est trop retarder venons à nostre station.

Nous quittasmes les riuës du grand fleuue le 12. de Nouembre, comme i'ay

248 *Relation de la Nouvelle France,*
desia dit, & vinsmes cabaner pres d'un
torrent, faisans chemin à la façon que ie
viens de dire, chacun portant son far-
deau. Tous les Sauvages se mocquoient
de moy de ce que ie n'estois pas bon
cheual de male, me contentant de por-
ter mon manteau qui estoit assez pe-
sant, vn petit sac où ie mettois mes me-
nuës necessitez & leurs gaufferies, qui
ne me pesoient pas tant que mon corps,
voila ma charge: mon hoste & l'Apo-
stat portoient sur des bastons croisez en
forme de brancard la femme du Sor-
cier qui estoit fort malade, ils la met-
toient sur la neige en attendant que la
cabane fut faite, où elle passoit plus de
trois heures sans feu, & sans iamais se
plaindre & sans monstrier aucun signe
d'impatience, ie me mettois plus en pei-
ne d'elle qu'elle mesme: car ie criois
souuent qu'on fit faire pour le moins vn
peu de feu aupres d'elle, mais la réponse
estoit qu'elle se chaufferoit la cabane
estant faite: ces barbares sont faits à ces
souffrances, ils s'attendent bien que s'ils
tombent malades qu'on les traittera à
mesme monnoye. Nous seiournasmes
trois iours en ceste station, pendant les-

quels voicy vne partie des choses que j'ay marqué dans mon memoire.

C'est icy que les Sauvages consultèrent les genies du iour, en la façon que j'ay couché au Chapitre quatriesme: or comme ie m'estois ris de ceste superstition, & qu'à toutes les occasions qui se rencontroient, ie faisois voir que les mysteres du Sorcier n estoient que ieux d'enfans, m'efforçant de luy raurir ses ouïailles pour les rendre avec le temps à celuy qui les a rachetées au prix de son sang, cet homme forcené fit le iour d'apres ceste consulte, que ie vay décrire.

Mō hôte ayāt inuité au festin tous les Sauvages nos voisins, comme ils estoïent desia venus, & assis à l'entour du feu & de la chaudiere, attendans l'ouverture du banquet, voila que le Sorcier qui estoit couché vis à vis de moy se leue tout à coup, n'ayant point encor parlé depuis la venuë des conuiez, il paroist tout furieux, se iettant sur vne des perches de la cabane pour l'arracher, il la rompt en deux pieces, il roule les yeux en la teste, regardant çà & là comme vn homme hors de foy, puis enuifageant les

250 *Relation de la Nouvelle France,*
assistans, il leur dit *Irniticon nama Niti-*
rinisin, ô hommes j'ay perdu l'esprit, ie
ne sçay où ie suis, esloignez de moy les
haches & les espées, car ie suis hors du
sens. A ces paroles tous les Sauvages
baissent les yeux en terre, & ie les leue
au ciel, d'où j'attendois secours, me fi-
gurant que cét homme faisoit l'enragé
pour se vanger de moy, en m'ostant la
vie, ou du moins pour m'épouuenter,
afin de me reprocher par apres que mon
Dieu me manquoit au besoin, & de pu-
blier parmy les siens, qu'ayant si souuent
témoigné que ie ne craignois pas leur
Manitou, qui les fait trembler, ie pal-
lissais deuant vn homme. Tant s'en faut
que la peur qui dans les dangers d'une
mort naturelle me faisoit quelquefois
rentrer dans moy-mesme, me saisit
pour lors, qu'au contraire j'envisageois
ce forcené avec autant d'assurance
que si j'eusse eu vne armée à mes costez,
me representant que le Dieu que j'ado-
rois pouuoit lier les bras aux fols & aux
enragez aussi bien qu'aux demons :
qu'au reste sra Majesté me vouloit ou-
vrir les portes de la mort, par les mains
d'un homme qui faisoit l'endiablé, que

sa Prouidence estoit tousiours aymable. Ce Thrason redoublant ces fougues fit mille actions de fol, d'ensorcelé, de demoniaque, tantost il crioit à pleine teste, puis il demeuroid tout court comme épouuanté : il faisoit mine de pleurer, puis il s'éclattoit de rire comme vn diable follet ; il chantoit sans regles ny sans mesures, il sifloit comme vn serpent, il hurloit comme vn loup, ou comme vn chien, il faisoit du hibou & du chathuan, tournant les yeux tout effarez dedans sa teste, prenant mille postures, faisant tousiours semblant de chercher quelque chose pour la lancer, j'attendois à tous coups qu'il arrachast quelque perche pour m'en assommer, ou qu'il se iettast sur moy, ie ne laissay pas neantmoins pour luy monstrier que ie ne m'estonnois pas de ses diableries, de faire toutes mes actions à l'ordinaire de lire, d'écrire, de faire mes petites prieres, & l'heure de mon sommeil estant venuë ie me couchay & reposay aussi paisiblement dans son sabbat comme j'eusse fait dans vn profond silence, j'estois déjà aussi accoustumé de m'endormir à ses cris, & à ses bruits de

252 *Relation de la Nouvelle France,*
tambour, qu'un enfant aux chansons de
sa nourrisse.

Le lendemain au soir à mesme heure il sembla vouloir entrer dans les mesmes fougues, & donner vne autrefois l'alarme au camp, disant qu'il perdoit l'esprit, le voyant desia demy fol, il me vint vne pensée qu'il pourroit estre travaillé de quelque fièvre chaude, ie l'aborde & luy prens le bras pour luy toucher l'artere, il me regarde affreusement, faisant de l'estonné, comme si ie luy eusse apporté des nouvelles de l'autre monde, il roule les yeux çà & là comme vn insensé: luy ayant touché le poulx & le front ie le trouuay frais comme vn poisson, & aussi éloigné de la fièvre comme i'estois de France, cela me confirma dans mon opinion qu'il faisoit de l'enragé pour m'estonner, & pour tirer à compassion tous ses gens qui dans nostre disette luy donnoient ce qu'ils pouuoient auoir de meilleur.

Le 20. du mesme mois de Nouembre ne se trouuans plus de Castors, ny de Porcs-espics en nostre quartier, nous tirasmes pays, & ce fut nostre deuxiesme station, on porta la femme du Sorcier

sur vn brancart, & la mit-on, comme
i'ay desia dit, dessus la neige en atten-
dant que nostre palais fût dressé, ce pen-
dant ie m'approchay d'elle luy témoi-
gnant beaucoup de compassion : il y
auoit desia quelques iours que ie tas-
chois de gagner son affection, afin qu'elle
me prestast plus volontiers l'oreille,
cognoissant bien qu'elle ne pouuoit pas
viure long-temps, car elle estoit comme
vne squelette, n'ayant quasi plus la for-
ce de parler, quand elle appelloit quel-
qu'un la nuit, ie me leuois moy mesme,
& l'éueillois, ie luy faisois du feu, ie luy
demandois ce dont elle auoit besoin,
elle me cōmandoit de petites choses, ettes,
comme de fermer les portes ou boucher
quelque trou de la cabane qui l'incōmo-
doit, apres ces menus discours & offices
de charité, ie l'aborday, & luy demāday
si elle ne vouloit pas bien croire en celuy
qui a tout fait, & que son ame apres sa
mort seroit bien-heureuse. Au commen-
cement elle me répondit qu'elle n'auoit
point veu Dieu, & que ie luy fisse voir,
autrement qu'elle ne pouuoit croire en
luy, elle auoit tiré ceste réponse de la
bouche de s^o mary, le luy repartis qu'elle

254 *Relation de la Nouvelle France,*
le croyoit plusieurs choses qu'elle ne voyoit pas, & qu'au reste son ame seroit brulée pour vne eternité si elle n'obeïssoit à celuy qui a tout fait; elle s'adoucit petit à petit, & me témoigna qu'elle luy vouloit obeïr, ie n'osois l'entretenir long temps, mais seulement par reprises, ceux qui me voyoient me crians que ie la laissasse.

Sur le soir estās tous dās nostre nouvelle cabane, ie m'approchay d'elle, l'appellant par son nom, iamaïs elle ne me voulut parler en la presence des autres, ie priay le Sorcier de luy dire qu'elle me répondist, & de m'ayder à l'instruire, luy representant qu'il ne pouuoit arriuer que du bien de ceste action, il me répond non plus que la malade, ie m'adresse à l'Apostat le pressant avec de tres humbles prieres de me prester sa parole, point de réposé; ie retourne à la malade, ie l'appelle, ie luy parle, ie luy demande si elle ne vouloit pas aller au Ciel, à tout cela pas vn mot: Je sollicite de rechef le Sorcier son mary, ie luy promets vne chemise & du petun, pourueu qu'il dise à sa femme qu'elle m'écoute, comment veux-tu, me dit-il, que nous

croyõs en ton Dieu ne l'ayãs iamais veu:
ie t'ay desia respondu à cela, luy fis-je, il
n'est pas temps de disputer, cette ame se
va perdre pour vn iamais si tu n'en as pi-
tié: Tu vois bien que celuy qui a faißt le
Ciel pour toy, te veut donner de plus
grands biens, que d'aller manger des es-
corces en vn village qui ne fut iamais,
mais aussi te punira il seuerement si tu ne
crois en luy, & si tu ne luy obeis. Ne pou-
uant tirer aucune raison de ce miserable
homme, ie pressay encor vne fois la ma-
lade, mon hoste me l'entendant nommer
par son nom me tança, tais toy me dit-il,
ne la nomme point, elle est desia morte,
son ame n'est plus dans son corps. C'est
vne grande verité que personne ne va à
IESVS-CHRIST que son pere ne luy
tende la main, c'est vn grád present que
la foy, quãd ces pauures Barbares voyët
qu'un pauvre malade ne parle plus, ou
qu'il tombe en syncope, ou en quelque
phrenesie, ils disent que son esprit n'est
plus dans son corps, si le malade retour-
ne en son bon sens, c'est l'esprit qui est de
retour: en fin quand il est mort il n'en
faut plus parler, ny le nommer en aucu-
ne façon: pour conclurre ce point, il

256 *Relation de la Nouvelle France,*
me fallust retirer sans rien faire.

Ont tint conseil en ce lieu de ce qu'on deuoit faire pour trouuer à manger, nous estions desia reduits à telle extremité que ie faisois vn bon repas d'vne peau d'anguille boucannée, que ie iettois aux chiens quelques iours auparauant. Deux choses me toucherent ici le cœur: jetant vne fois vn os, ou vne arreste d'anguille aux chiens, vn petit garçon fut plus habile que le chien, il se jetta sur l'os & le rongea & mangea: vne autre fois vn enfant ayant demandé à manger, comme on luy eust respōdu qu'il n'y en auoit point, ce pauvre petit s'en prit à ses yeux, les larmes rouloient sur sa face grosses comme des pois, & ses souspirs & ses sanglots me touchoient de compassion, encor taschoit il de se cacher: c'est vne leçon qu'on fait aux enfans de se monstrier courageux dans la famine.

Le 28. du mesme mois, nous decampasmes pour la troisieme fois, il neigcoit fort, mais la necessité nous pressant le mauuais temps ne peut nous arrester. Ie fus bien estonné en cette troisieme demeure que ie ne vis point apporter la malade, ie n'osois demander ce qu'elle estoit

estoit deuenüe, car ils ne veulent pas qu'on parle des morts : sur le soir i'accostay le Renegar, ie luy demanday parlant François où estoit ceste pauvre femme, s'il ne l'auoit point tuée, voyant qu'elle s'en alloit mourir, cōme il auoit autrefois assommé à coups de bastons vne pauvre fille qui tiroit à la mort, ainsi que luy mesme l'auoit raconté à nos François. Non, dit-il, ie ne l'ay pas tuée : qui donc, luy fis-je, est-ce le ieune Hi-roquois ? Nenny, me répond-il, car il est party de grand matin : c'est donc mon hôte, ou le Sorcier son mary ; car elle parloit encor quand ie suis sorty ce matin de la cabane, il baissa la teste, m'aduoüât tacitement que l'un des deux l'auoit mise à mort : vn vieillard m'a ceneâ-moins dit depuis, qu'elle mourut de sa mort naturelle vn peu apres que ie fus party, ie m'en rapporte à ce qui en est, quoy que s'en soit ayant refusé de reconnoistre le Fils de Dieu pour son Pasteur pendant sa vie, il n'est que trop probable qu'il ne l'a pas recognüe pour vne de ses oüailles apres sa mort.

I'ay remarqué iusques icy de trois sortes de medecines naturelles parmy les

258 *Relation de la Nouvelle France,*
Sauvages, l'une c'est leur suërie, dont j'ay
parlé cy-dessus, l'autre consiste à se tail-
lader legerement la partie du corps qui
leur fait mal, la mettant toute en sang
qu'ils font sortir de ces decoupeures en
assez grande abondance, ils se seruirent
vne fois de mon canif pour taillader la
tête d'un enfant de dix iours. La troisieme
de ces medecines est composée de
racleure d'écorces interieures de bou-
leau, du moins cet arbre me sembloit
tel, ils font bouillir ces racleures dans
de l'eau, qu'ils boient par apres pour se
faire vomir, ils m'ont souuent voulu
donner ceste potion pendant que j'es-
tois malade, mais ie ne la iugeois pas à
mon vsage.

Le iour de saint François Xavier,
nostre pretendu Magicien ayant sur le
soir battu son tambour, & bien hurlé à
l'ordinaire, car il ne manquoit point de
nous donner ceste aubade toutes les
nuits à nostre premier sommeil, voyant
que tout le monde estoit endormy, &
approuuant que ce pauvre homme fai-
soit son deuoir pour sa guarison. L'en-
uoy en disant avec luy, ie commen-
çay par un témoignage de grand amour

en son endroit, & par des loüanges que ie luy iettay comme vne amorce pour le prendre dans les filets de la verité. Ie luy fis entendre que si vn esprit capable des choses grandes comme le sien cognoissoit Dieu, que tous les Sauuages induis par son exemple le voudroient aussi cognoistre, aussi tost il prit l'essor, & se mit à declarer la puissance, l'autorité & le credit qu'il a sur l'esprit de ses compatriotes, il dit que dés sa ieunesse les Sauuages luy donnerent le nom de *Khimouchouminau*, c'est à dire nostre ayeul & nostre maistre, que tout passe par ses aduis, & que chacun suit ses conseils, ie l'aydois à se loüer le mieux que ie pouuois : car il est vray qu'il a de belles parties pour vn Sauuage : enfin ie luy dis que ie m'estonnois qu'un homme de iugement ne peut recognoistre le peu de rapport qu'il y a entre ce tintamare & la santé. Quand tu as bien crié & bien battu ton tambour, que fait ce bruit sinon de t'estourdir la teste, pas vn Sauuage n'est malade, qu'on ne luy batte les oreilles de ce tambour, afin qu'il ne meure point, en as-tu veu de dispenscz de la mort ; ie te veux faire

vne proposition : Escoute moy patiemment , luy dis- ie, bas ton tambour dix iours durant, chante & fais chanter les autres tant que tu voudras, fais tout ce qui sera en ton possible pour recouurer ta santé, si tu n'en guaris dans ce temps-là, confesse que ton tintamare, que tes hurlemens, & que tes chansons ne te sçauroient remettre en santé, abstiens toy dix autres iours de toutes ces superstitions, quitte ton tambour, & tous ces bruits dereglez, demande au Dieu que i'adore, qu'il te donne sa cognoissance, pense & crois que ton ame doit passer à vne autre vie que celle-cy, efforce toy d'aymer son bien cōme tu ayme le bien de ton corps, & quand tu auras passé ces dix autres derniers iours en ceste façon, ie me retireray trois iours durant en oraison dans vne petite cabane qu'on fera plus auant dans le bois, là ie prieray mon Dieu qu'il te donne la santé du corps & de l'ame, toy seul me viendras voir au temps que ie diray, & tu feras de tout ton cœur les prieres que ie t'enseignera; promettant à Dieu que s'il luy plaist de te rendre la santé, tu appelleras tous les Sauvages de ce lieu, & en

leur presence tu brusleras ton tambour, & toutes les autres badineries dont tu te sers pour les amasser, que tu leur diras que le Dieu des Chrestiens est le vray Dieu, qu'ils croyēt en luy, & qu'ils luy obeissent, si tu promets cecy veritablement & de cœur, i'espere que tu seras deliuré de ta maladie, car mon Dieu est tout puissant.

Or comme cēt homme est tres desireux de recouurer sa santé, il ouurit les oreilles, & me dit, ton discours est fort bon, i'accepte les conditions que tu me donne; mais commence le premier, retire toy en oraison, & dis à ton Dieu qu'il me guarisse, car c'est par là qu'il faut commencer, & puis ie feray tout ce que tu m'as prescrit: ie ne cōmenceray point, luy reparty-ie, car si tu estois guaray, pendant que ie prierois tu attribuerois ta santé à ton tambour, que tu n'aurois pas quitté; & non pas au Dieu que i'adore, lequel seul te peut guarir; non, me dit-il, ie ne croiray pas que ce soit la vienne de mon tambour, i'ay chanté & fait tout ce que ie sçauois, & n'ay peu sauuer la vie à pas vn; moy-mesme estāt malade ie fais iouier pour me guarir tous

262 *Relation de la Nouvelle France,*
les ressorts de mon art, & me voila plus
mal que iamais; i'ay employé toutes
mes inuentions pour sauuer la vie à mes
enfans, notamment au dernier qui est
mort depuis peu, & pour conseruer ma
femme qui vient de trespasser, tout ce-
la ne m'a point reüssi, & partant si tu me
guaris, ie n'attribueray point ma santé
à mon rambour, ny à mes chansons. Ie
luy répondis que ie ne pouuois pas le
guarir; mais que mon Dieu pouuoit
tout, qu'au reste il ne falloit point faire
de marché avec luy, ny luy prescrire
des conditions comme il faisoit, disant
qu'il me guarisse premierement, & puis
ie croiray en luy: dispose toy, luy fil ie,
de ton costé, & sa bonté ne te manque-
ra pas, que s'il ne te donne la santé du
corps, il te donnera la santé de l'ame qui
est incomparablement plus à priser. Ne
me parle point de l'ame, me repart il,
c'est de quoy ie ne me soucie pas: voila
(me montrant sa chair) ce que i'ayme,
c'est le corps que ie cheris, pour l'ame
ie ne la voy point, en arriue ce qui pour-
ra. As tu de l'esprit, luy fil ie? tu parle
comme les bestes, les chiens n'ayment
que les corps; celuy qui a fait le Soleil

pour t'éclairer, n'a il rien préparé de plus grand à ton ame, qu'à l'ame d'un chien? Si tu n'ayme que ton corps tu perdras le corps & l'ame, si vne beste pouuoit parler elle ne parleroit que de son corps & de sa chair, n'as-tu rien par dessus les bestes qui sont faites pour te seruir? n'ayme-tu que la chair & le sang? ton ame est-elle l'ame d'un chien que tu la traite avec un tel mépris? peut estre que tu dis vray, me répond-il, & qu'il y a quelque chose de bon en l'autre vie: mais nous autres en ce pays-cy n'en sçauons rien, que si tu me rends la santé ie feray ce que tu voudras. Ce pauvre miserable ne peut iamais releuer sa pensée plus haut que la terre: ne voyant donc aucune disposition en cet esprit superbe, qui croyoit pouuoir obliger Dieu, s'il croyoit en luy, ie le quittay pour lors, & me retiray pour reposer, car il estoit bien auant dans la nuit.

Le 3. de Decembre nous cōmençasmes nostre quatriesme station, ayans délogé sans trompette, mais non pas sans tambour: car le Sorcier n'oubloit iamais le sien, nous plantasmes nostre camp proche d'un fleuve large & rapi-

264 *Relation de la Nouvelle France,*
de, mais peu profond, ils le nomment
Capititchiouetz, il se va dégorger dans
le grand fleuve de saint Laurens, quasi
vis à vis de Tadoussac, nos Sauvages
n'ayans point icy de viandes pour faire
des festins, ils faisoient des banquets de
fumée, s'inuitans les vns les autres, dans
leurs cabanes, & faisans la ronde à vn
petit plat de terre remply de Tabac,
chacun en prenoit vn cornetée qu'il re-
duisoit en fumée, remettant la main au
plats'il vouloit petuner dauantage: l'af-
fection qu'ils portent à ceste herbe est
au delà de toute creance, ils s'endormēt
le cabanet en la bouche, ils se leuent par
fois la nuit pour petuner, ils s'arrestent
souuent en chemin pour le mesme su-
jet, c'est la premiere action qu'ils font
rentrant dans leurs cabanes: ie leur ay
battu le fusil pour les faire petuner en
ramants dans vn canot, ie leur ay veu
souuent manger le baston de leur calu-
met, n'ayans plus de petun, ie leur ay
veuracler & pulueriser vn calumet de
bois pour petuner, disons avec com-
passion qu'ils passent leur vie dans la fu-
mée, & qu'ils tombent à la mort dans le
feu.

I'auois porté du petun avec moy, non pour mō vsage, car ie n'en prends point, i'en donnay largement selon que i'en auois à plusieurs Sauvages; m'en reseruant vne partie pour tirer de l'Apostat quelque mot de sa langue; car il ne m'eust pas dit vne parole qu'en le payât de ceste monnoye, quand nos gens eurent consommé ce que ie leur auois donné, & ce qu'ils auoient en leur particulier, ie n'auois plus de paix, le Sorcier me pressoit avec vne importunité si audacieuse, que ie ne le pouuois souffrir, tous les autres sembloient me vouloir manger, quand ie leur en refusois: i'auois beau leur dire qu'ils n'auoient point de consideration, que ie leur en auois plus donné trois fois que ie ne m'estois reserué; vous voyez, leur disois-ie, que i'ayme vostre langue, & qu'il faut que ie l'achepte avec cét argent, que s'il me manque on ne m'enseignera pas vn mot, vous voyez que s'il me faut vn verre d'eau, il faut que i'en aille chercher bien loing, ou que ie dōne vn bout de petun à vn enfant pour m'en aller que tir; vous me dites que le petun rassasie, si la famine qui nous presse cōtinuë, i'en

266 *Relation de la Nouvelle France,*
veux faire l'experience, laissez moy ce
peu que i'ay de reserue, il me fut im-
possible de resister à leur importunité,
il fallut tirer iusques au bout, ce ne fut
pas sans estonnement de voir des per-
sonnes si passionnées pour de la fumée.
Le sixiesme du mesme mois, nous délo-
geasmes pour la cinquiesme fois, il m'ar-
riua vne disgrace au départ, au lieu de
prēdre le vray chemin, ie me iettay dans
vn autre que nos chasseurs auoient fort
battu, ie vay donc fort loing sans pren-
dre garde que ie me perdois, ayant fait
vne longue traite, ie m'apperceu que
mon chemin se diuisoit en cinq ou six
autres, qui tiroient qui deçà, qui delà,
me voila demeuré tout court, il y auoit
vn petit enfant qui m'auoit suiuy, ie ne
l'osois quitter, car aussi-tost il se mettoit
à pleurer, i'enfilay tantost l'vn, tantost
l'autre de ces sentiers, & voyant qu'ils
tournoient çà & là, & qu'ils n'estoient
marquez que d'vne sorte de raquette, ie
concluds que ces chemins ne con-
duisoient point au lieu où mes Sau-
uages alloient cabaner, ie ne sçauois
que faire du petit garçon: car s'estant
apperceu de nostre erreur il ne m'osoit

perdre de veüe sans se pasmer ; d'ailleurs n'ayant qu'enuiron six ans il ne me pouuoit pas suiure, car ie doublois mes pas : ie m'aduisay de luy laisser mon manteau, pour marque que ie retournerois, si ie trouuois nostre vray chemin, luy faisant signe qu'il m'attendist, car nous ne nous attendions pas l'vn l'autre: ie iettay donc mon manteau sur la neige, & m'en reuay sur mes brisées criant de temps en temps pour me faire entendre de nos gens, si tant est que le bon chemin ne fust pas loing de moy; ie crie, j'appelle dans ces grands bois, personne ne répond, tout est dans vn profond silence, les arbres mesme ne faisoient aucun bruit, car il ne faisoit point de vent: le froid estoit si violent que ie m'attendois infailliblement de mourir la nuit au cas qu'il me la fallust passer sur la neige, n'ayant ny hache ny fusil pour faire du feu; ie vay, ie viens, ie tourne de tous costez, ie ne trouue rien qui ne m'égare dauantage: la derniere chose que l'homme quitte c'est l'esperance, ie la tenois tousiours par vn petit bout, me figurant à toute heure que j'allois trouuer mon chemin; mais enfin apres

268 *Relation de la Nouvelle France,*
auoir bien tourné, voyant que les créa-
tures ne me pouuoient donner aucun
secours, ie m'arrestay pour preséter mes
petites prieres au Createur dont ie
voyois ces grands bois tout remplis
aussi bien que le reste du monde: il me
vint vne pensée que ie n'estois pas per-
du, puis que Dieu scauoit bien où i'e-
stois, & ruminant ceste verité en mon
esprit, ie tire doucement vers le fleuve
que i'auois trauersé au sortir de la caba-
ne, ie crie, l'appelle de rechef, tout le
monde estoit desia bien loing; ie com-
mençois desia à laisser cheoir de mes
mains le petit filet de l'esperance que
i'auois tenu iusques alors, quand i'adui-
say quelques vestiges de raquette der-
riere des broussailles, ie m'y transpor-
te, *& vidi vestigia virorum, & mulierum &*
infantium, en vn mot ie trouue ce que
i'auois cherché fort long-temps, au
commencement ie n'estois pas assuré
que c'estoit là vn bon chemin, voila
pourquoy ie me diligentay de le reco-
gnostre: estant desia bien auancé ie
trouue l'Apostat qui nous venoit cher-
cher, il me demanda où estoit ce petit
enfant, ie luy repars que ie l'auois laissé

aupres de mon manteau : j'ay, me dit-il, trouué vostre manteau & l'ay reporté à la nouvelle cabane; mais ie n'ay point veu l'enfant : me voila bien estonné, de l'aller chercher, c'estoit me perdre vne autre fois; ie prie l'Apostat d'y aller, il fit la sourde oreille, ie tire droit à la cabane pour en donner aduis, où enfin j'arriuay tout brisé & tout moulu pour la difficulté & pour la longueur des chemins que j'auois fait sans trouuer hostellerie que des ruisseaux glacez : si tost que les Sauvages me virent ils me demandent où estoit le petit garçon, crians que ie l'auois perdu, ie leur raconte l'histoire, les asscurants que ie luy auois laissé tout exprez mon manteau pour l'aller retrouver, mais ayant quitté ce lieu là, ie ne sçauois où l'aller chercher, veu mesmement que ie n'en pouuois plus, n'ayant point mangé depuis le grand matin, & deux ou trois bouchées de boucan tant seulement, on me donna pour reconfort vn peu d'eau glacée, que ie fis chauffer dans vn chaudron fort sale, ce fut tout mon souper : car nos chasseurs n'ayans rien pris il fallut ieusner ce iour là.

270 *Relation de la Nouvelle France,*

Pour l'enfant, deux femmes m'ayans ouy depeindre l'endroit où ie l'auois laissé, coniecturant où il auoit tiré, l'allèrent chercher, & le trouuerent. Il ne faut pas s'estonner si vn François se perd quelquesfois dans ces forests, i'ay veu de nos plus habiles Sauuages s'y esgarer plus d'un iour entier.

Le 20. de Decembre, quoy que les Sauuages ne se mettent pas ordinairement en chemin pendant le mauuais temps, si fallut-il decabanner durant la pluye, & desloger à petit bruit sans desieuner, la fin nous faisoit marcher, mais le mal est, qu'elle nous suiuiot par tout où nous allions; car nous ne trouuions par tout, ou fort peu, ou point de chasse: En ceste station, qui fut la sixiesme, le Renegat me vint dire que les Sauuages estoient fort espouuantez, & mon hoste m'abordant tout pensif, me demanda si ie ne sçauois point quelque remede à leur mal-heur, il n'y a pas, me disoit-il, assez de neige pour tuer l'Orignac, des Castors, & des Porcs espics, nous n'en trouuons quasi point, que ferons nous: ne sais tu point ce qui nous doit arriuer? ne sens tu point dans toy-mesme ce qu'il

faut faire ? Je luy voulus dire que nostre Dieu estoit tres-bon , & tres-puissant, qu'il falloit que nous eussions recours à sa misericorde, mais cōme ie ne parlois pas bien, ie priay l'Apostat de me seruir de truchement; ce miserable est possédé d'un diable muet , iamaïs il ne voulut parler.

Le 24. Decembre, veille de la naissance de nostre Sauueur, nous decampasmes pour la septiesme fois, nous partismes sans manger, nous cheminâmes vn assez long temps; nous trauaillâmes à faire nostre maison, & pour nostre souper N.S. nous donna vn Porc-espic gros comme vn cochon de lait, & vn lieure, c'estoit peu pour dix-huict ou vingt personnes que nous estions, il est vray, mais la sainte Vierge & son glorieux Espoux saint Ioseph, ne furent pas si bien traitez à mesme iour dans l'estable de Bethleem.

Le lendemain iour de resiouyissance parmy les Chrestiens, pour l'enfant nouveau né, fust pour nous vn iour de ieunesse, on ne me donna rien du tout à manger; la faim qui fait sortir le loup du bois, m'y fit entrer plus auant, pour chercher

272 *Relation de la Nouvelle France,*
des petits bouts d'arbres que ie m'ageois
avec delices, des femmes ayant ietté aux
chiens par mesgarde ou autrement, quel-
ques rongneures de peaux dont on faic
les cordes des raquettes, ie les ramassay,
& en fis vn bon disner, quoy que les
chiens mesmes, quand ils auoient tant
soit peu à manger, n'en voulussent pas
gouster : l'ay souuent mangé, notam-
ment ce mois cy, des raclures d'escor-
ces, des rongneures de peaux, & autres
choses semblables, & cependant ie ne
m'en suis point trouué mal.

Le mesme iour de Noël ie m'en allay
sur le soir visiter nos voisins, nous n'e-
stions plus que deux cabanes, celle du
Sauuage Ekheneabamate auoit tiré
d'vn autre costé depuis cinq ou six
iours, à raison qu'il n'y auoit pas assez de
chasse pour nourrir tout le monde, ie
trouuay deux ieunes chasseurs tout tri-
stes, pour n'auoir rien pris ce iour là, ny le
precedent, ils estoient comme tous les
autres maigres & defaits, taciturnes &
fort pensifs, comme gens qui ne pou-
uoient mourir qu'à regret, cela me tou-
cha le cœur, apres leur auoir dit quelque
parole de consolation, & donné quel-
que

que esperance de chose meilleure, ie me retiray en ma cabane pour prier Dieu, l'Apostat me demâda quel iour il estoit? il est aujourd'huy la feste de Noël, luy respondis-je; Il fut vn peu touché, & se tournant vers le Sorcier, il luy dit, qu'à tel iour estoit né le Fils de Dieu que nous adorions nommé IESVS : Remarquant en luy quelque estonnement, ie luy dis que Dieu vsoit ordinairement de largesse en ces bons iours, & que si nous auions recours à luy qu'il nous assisteroit infailliblement ; à cela point de parole, mais aussi point de contrariété : prenant donc l'occasion au poil, ie le priay de me tourner en sa langue deux petites Oraisons, dont i'en dirois l'une, & les Sauvages l'autre. Esperant que nous serions secourus, l'extremité où nous estions reduits luy fit accorder que de bônd, que de volée ce que ie demandois. Je composay sur l'heure deux petites prieres, qu'il me tourna en Sauvage, me promettant en outre qu'il me seruiroit d'interprete si i'assemblois les Sauvages, me voila fort content. Je recommandel'affaire à N. S. & le lendemain matin ie dresse vn petit Oratoire, ie pends aux

274 *Relation de la Nouvelle France,*
perches de la cabane vne seruiette que
i'auois portée, sur laquelle i'attachay vn
petit Crucifix & vn Reliquaire, que
deux personnes fort Religieuses m'ont
enuoyé: ie tire encore quelque Image
de mon Breuiare, cela fait ie fais ap-
peller tous les Sauvages de nos deux ca-
banes, & ie leur fais entendre tant par
mon begayemēt, que par la bouche d'vn
Renegat, que la crainte de mourir de
faim faisoit parler, qu'il ne tiendrait qu'à
eux qu'ils ne fussent secourus, ie leur dis
que nostre Dieu est la bonté mesme, que
rien ne luy estoit impossible, qu'encore
bien qu'on l'eust mesprisé, que si neant-
moins on croyoit, & si on esperoit en luy
d'vn bon cœur, qu'il se montreroit fa-
uorable: Or comme ces pauures gens
n'auoient plus d'esperance en leurs arcs,
ny en leurs flesches, ils me tesmoignerēt
vn grand contentement de ce que ie les
auois assemblez, m'assurant qu'ils fe-
roient tout ce que ie leur commande-
rois; ie prens mon papier & leur lis l'O-
raison que ie desirois qu'ils fissent, leur
demandant s'ils estoient contens d'ad-
dresser au Dieu que i'adorois ces paroles
de tout leur cœur, & sans feintise; ils me

respondent tous *nimiroueritenan*, *nimiro-
ueritenan*, nous en sommes cõtens, nous
en sômes contens. Je me mets le premier
à genoux, & eux tous avec moy, iettans
les yeux sur nostre petit Oratoire, le
seul Sorcier demouroit assis, mais luy
ayant demandé s'il n'envouloit pas estre
aussi bien que les autres, il fit comme il
me voyoit faire, nous estions testes nuës,
ioignans tous les mains & les esleuans
vers le Ciel, ie commençay donc à faire
ceste Oraison tout haut en leur langue.

Mon Seigneur qui auez tout fait, qui
voyez tout, & qui cognoissiez tout, fai-
tes nous misericorde. O I E S V S, fils
du Tout-puissant, qui auez pris chair
humaine pour nous, qui estes né pour
nous d'une Vierge, qui estes mort pour
nous, qui estes resuscité & monté au
Ciel pour nous, vous auez promis que
l'on demandoit quelque chose en vostre
nom que vous l'accorderiez : ie vous
supplie de tout mon cœur de donner la
nourriture à ce pauvre peuple, qui veut
croire en vous, & qui vous veut obeïr,
ce peuple vous promet entierement
que si vous le secourez qu'il croira par-
faitement en vous, & qu'il vous obeïra

276 *Relation de la Nouvelle France,*
de tout son cœur, Mon Seigneur, exau-
cez ma priere, ie vous presente ma vie
pour ce peuple tres content de mourir
à ce qu'ils vivent, & qu'ils vous cognois-
sent. Ainsi soit-il.

A ces paroles de mourir pour eux que
ie proferois pour gagner leur affection,
quoy qu'en effect ie le disois de bon
cœur, mon hoste m'arresta & me dit; re-
tranche ces paroles, car nous t'aymons
tous, & ne desirons pas que tu meure:
ie vous veux témoigner, leur repartif-
ie, que ie vous ayme, & que ie donne-
rois volontiers ma vie pour vostre sa-
lut, tant c'est chose grande que d'estre
sauué. Apres que i'eus faict ceste Orai-
son, chacun d'eux à mains iointes, teste
nuë, & les genoux en terre, comme i'ay
remarqué, profera la suiuate, que ie
prononçois deuant-eux fort posément.

Grand Seigneur qui auez fait le ciel
& la terre, vous sçauiez tout, vous pou-
uez tout, ie vous promets de tout mon
cœur (ie ne sçauois vous mentir) ie
vous promets entierement, que s'il vous
plaist nous donner nostre nourriture,
que ie vous obeiray cordialement, que
ie croiray assurement en vous, ie vous

promets sans feintise, que ie feray tout ce qu'on me dira deuoir estre fait pour vostre amour, aydez nous, vous le pouvez faire, ie feray assurement ce qu'on m'enseignera deuoir estre fait pour l'amour de vous, ie le promets sans feintise, ie ne ments pas, ie ne scaurois vous mentir, aydez nous à croire en vous parfaitement, puis que vous estes mort pour nous. Ainsi soit il.

Ils firent tous ceste priere, & l'Apostat & le Sorcier aussi bien que les autres, c'est à Dieu de iuger de leurs cœurs, ie leur dis apres cela qu'ils s'en allassent à la chasse avec confiance, ce qu'ils firent, la plus part témoignans par leur visage & par leurs paroles qu'ils auoient pris plaisir en ceste action; mais auant que d'en voir le succez couchons en leur langue ces deux Oraisons, afin qu'on voye l'œconomie de leurs paroles, & leur façon de s'énoncer.

Noukhimame missi ca khichitaien missi,
Mon Capitaine tout qui as fait tout,
khesteritamen missi, ouibatamen chaoueri-
qui sçais tout, qui vois, aye pitié
minan. Iesus oucouchichai missi ca nitaouitâe
de nous, Iesus Fils tout qui a fait

278 *Relation de la Nouvelle France,*
Niran ca outchi, arichirinicaſouien, niran
de nous qui à cauſe es fait hōme de nous
ca outchi, iriniouien iſcouechich, niran ca
qui à cauſe es né d'une fille de nous, qui
outchi nipiē, niran ca outchi ouaſcoukbi,
à cauſe es mort de no^o, qui à cauſe au ciel
itoutaien; egou khifitaie, mitichenicaſſouiniki,
es allé ainſi tu diſois en mon nom
khégoueia netou tamagaouian niga chaoueri-
quelque choſe ſi ie ſuis requis i'ẽ auraypi-
kan, khitaia mibitin naſpich ou mitchimi,
tié, ie te prie entierement la nourriture
a richiriniou miri, ca ouitapouetaſc,
à ce peuple dōne qui veux croire en toy,
ca ouipamitaſc, arichiriniou khiticoū
qui te veux obeyr, ce peuple te dit
naſpich, ouitchibien khigatapouetatin
entierement, ſi tu m'ayde ie te croyray
naſpich, kbiga pamtatim naſpich, Nou-
parfaitemēt ie t'obeĩray entieremēt mon
khimame chaoueritamitaouitou ouĩ
Capitaine aye pitié de ce que ie diſ, ſi tu
michoutchi nipouſin, iterimien
veux en contrechāge ma mort penſer
ouirouan mag iriniouiſonan, egou inouſin.
quant à eux qu'ils viuent, ainſi ſoit-il.

Voicy celle qu'ils prononcerent.

en l'année 1634.

279

Khicheoukhiman ca *khichitaien* ouascon,
Grand Capitaine qui as fait le Ciel
mag asti, *missi khikhisteriten*, *missi kbi-*
& la Terre tout tu sçais toute chose, tu
picoutan, *khilitin naspich*, tanté
fais bien ie te dis entierement comment
bona oukhiran? *khilitin naspich*, oui mi-
pourrois-je mêtir? ie te dis sãs feintise si
riatchi nimitchiminan, *ochitau*
tu no⁹ veuxdōner nostre nourriture tout
tapoué khiga pamutatin, *ochitau*,
expres asseurement ie t'obeiray tout ex-
tapoué khiga tapouetatin, *khilitin*
pres, en verité ie te croiray, ie te le dis
naspich, *niga tin missi kbè eitigaouané*;
entieremêt, ie feray tout ce qu'ō me dira
khir khe, *outchi khian*, *ouitchihinan*,
de toy à cause ie le feray ayde nous
khiga kbi outchi binan, *naspich niga*
tu nous peux ayder absolument ie feray
tin missi, *kbè eitigaouané khir khe*, *outchi*
tout ce qu'on me dira de toy à cause
khian, *Khilitin naspich*, *nama*
ie le feray ie te le dis sans feintise, ie ne
nikhirassin, *nama khinita khirassin*,
mens pas, ie ne te sçaurois mentir,
ouitchihinan khigai tapouetatinan nas-
ayde nous affin que nous te croyons par-

280 *Relation de la Nouvelle France,*
pich ; ouitchibinan mag missi irinious-
faictemēt, ayde nous puis de tous les hō-
khi ouetchi nipouané. Egon inoufin.
mes à cause tu es mort, ainsi soit il.

Nos chasseurs ayans fait leurs prieres s'en allerent, qui deça qui delà chercher de quoy manger, mon hôte & deux ieunes hommes s'en vont voir vne cabane de Castors, qu'ils auoient voulu quitter desesperans d'y rien prendre, il en prit trois pour sa part : l'estant allé voir apres midy, ie luy en vis prendre vn de mes yeux, ses compagnons en prirent aussi ie ne sçay pas combien, le Sorcier estant allé ce iour là a la chasse avec vn sien ieune neveu, prit vn Porc epic, & découurit la piste d'un Orignac qui fut depuis tué à coup de fleches, contre l'attente de tous tant qu'ils estoient, n'y ayant que fort peu de neige, vn ieune Hiroquois, dont ie parleray cy apres, tua aussi vn fort beau Porc-epic ; bref chacun prit quelque chose, il n'y eut que l'Apostat qui reuint les mains vuides, le soir mon hôte apportant trois Castors, comme il rentroit dans la cabane ie luy tendis la main, il s'en vint tout ioyeux vers moy recognoissant le

secours de Dieu, & demandant ce qu'il deuoit faire, ie luy dits *Nicanis*, mon bien aymé, il faut remercier Dieu qui nous a assisté; voila bien dequoy, dit l'Apostat, nous n'eussions pas laissé de trouuer cela sans l'ayde de Dieu. A ces paroles ie ne sçais quels mouuemens ne sentit mon cœur, mais si ce traistre m'eust donné vn coup de poignard, il ne m'eust pas plus attristé, il ne falloit que ces paroles pour tout perdre, mon hôte ne laissa point de me dire qu'il feroit ce que ie voudrois, & il se fust mis en deuoir, si le Sorcier ne se fust point ietté à la trauerse: car l'Apostat n'a point d'autorité parmy les Sauvages, ie voulu attendre le festin qu'on deuoit faire, où tous les Sauvages se deuoient trouuer; afin qu'ayant deuant leurs yeux les presens que nostre Seigneur leur auoit fait, ils fussent mieux disposez à recognostre son assistance; mais comme ie vins à leur vouloir parler, le Renegat fasché de ce que luy seul n'auoit rien pris, non seulement ne me voulut pas ayder, ains au contraire il m'imposa silence me commandant tout nettement de me taire; non feray pas luy dis-je, si vous estes

ingrat les autres ne le feront pas, le Sorcier voyant qu'on estoit assez disposé à m'écouter ; croyant que si on me prestoit l'oreille il perdrait autant de son credit, me dit d'une façon arrogante, tais-toy, tu n'as point d'esprit, il n'est pas temps de parler, mais de manger; ie luy voulu demander s'il auoit des yeux, s'il ne voyoit pas manifestement le seruice de Dieu, mais il ne me voulut pas écouter ; les autres qui estoient dans vn profond silence, voyans que le Sorcier m'estoit contraire, n'oserent pas m'inuiter à parler : si bien que celuy qui faisoit le festin se mit à le distribuer, & les autres à manger ; voila mes pourceux qui deuorent le gland sans regarder celuy qui leur abbat, c'est à qui se réioüira dauantage, ils estoient remplis de contentement & moy de tristesse, si fallut-il bien se remettre à la volonté de Dieu, l'heure de ce peuple n'est pas encore venue.

Cecy se passa le Lundy, le Mercredy suiuant mon hoste & vn ieune chasseur tuerent à coups de fleches l'Originac dont ils auoient veu les traces, ils en virent d'autres depuis, mais comme

il y auoit fort peu de neige ils n'en peurent iamais approcher à la portée de leurs arcs, si tost qu'ils eurent ceste proye ils la mirent en pieces, en apportant vne bonne partie dans nos cabannes, & enfeuelissans le reste sous la neige; voila tout le monde en ioye, on fait vn grand banquet où iefus inuité, voyant les grandes pieces de chair qu'on donnoit à vn chacun, ie demanday à l'Apostat si c'estoit vn festin à mâger tout, & m'ayant dit qu'ouy, il est impossible, luy reparty-ie, que ie mange tout ce qu'on m'a donné, si faut-il bien, me répondit-il, que vous le mangiez, les autres sont assez empeschez à manger leur part, il faut que vous mangiez la vostre: ie luy fais entédre que Dieu deffendoit ces excez, & que ie ne le cōmettrois point y allast-il de la vie, ce mechant blasphemateur pour animer les autres contre moy, leur dit que Dieu estoit fasché de ce qu'ils auoient à manger: Je ne dis pas cela, luy repliquay-ie en Sauvage, mais bien qu'il deffend de manger avec excez, le Sorcier me repart, ie n'ay iamais plus grand bien sinon quand ie suis saoul. Or comme ie ne pouuois venir à

284 *Relation de la Nouvelle France,*
bout de ma portion, i'inuite vn Sauua-
ge mon voisin d'en prendre vne partie,
luy donnant du petun en recompense
de ce qu'il mangeoit pour moy, i'en iette
vne autre partie secrettement aux
chiens, les Sauvages s'en estans doutez
par la querelle qui suruint entre ces ani-
maux, se mirent à crier contre moy, di-
sans que ie cõtaminois leur festin, qu'ils
ne prendroient plus rien, & que nous
mourrions de faim, les femmes & les
ensans ayans sceu cela, me regardoient
par apres comme vn tres-meschant
homme, me reprochant avec dedain
que ie les ferois mourir, & veritable-
ment si Dieu ne nous eust donné rien
de long-temps, i'estois en danger d'e-
stre mis à mort pour auoir commis vn
tel sacrilege: voila iusques où s'estend
leur superstition, pour obuier à cét in-
conuenient: les autres fois on me fit ma
part plus petite, & encore me dit on
que ie n'en mâgeasse sinon que ce que ie
voudrois, qu'eux mangeroient le reste,
mais sur tout que ie me donnasse bien
de garde de rien ietter aux chiens.

Le trentiesme du mesme mois de De-
cembre, nous decabanasmes, faisant

chemin nous passasmes sur deux beaux lacs tout glacez; nous tirions vers l'endroit où estoit la cache de nostre Orignac, qui ne dura guere en ceste huitiesme demeure.

Le Sorcier me demanda si en verité j'aymois l'autre vie que ie luy auois figuré remplie de tous biens, ayant répondu que ie l'aymois en effect; & moy, dit-il, ie la haï: car il faut mourir pour y aller, & c'est dequoy ie n'ay point d'enueie, que si j'auois la pensée & la creance que ceste vie est miserable, & que l'autre est pleine de delices, ie me tuërois moy-mesme pour me deliurer de l'une, & iouir de l'autre: Je luy repars que Dieu nous defendoit de nous tuer, ny de tuer autrui; & que si nous nous faisons mourir nous descendrions dans la vie de malheur, pour auoir contreuenue, à ses commandemens: Hé bien, dit il, ne te tuë point toy-mesme, mais moy ie te tuëray pour te faire plaisir, afin que tu ailles au Ciel, & que tu iouisses des plaisirs que tu dis: Je me soufris, luy repliquant que ie ne pouuois pas consentir qu'on m'ostast la vie sans pecher; Je vois bien, me fit-il, en se mo-

286 *Relation de la Nouvelle France,*
quant que tu n'as pas encore enuie de
mourir non plus que moy, non pas re-
pliquay-ie en cooperant à ma mort.

En ce mesme temps nos chasseurs
ayans poursuiuy vn Orignac, & ne
l'ayans peu prendre, l'Apostat se mit à
blasphemer, disant aux Sauvages, le
Dieu qui est marry quand nous man-
geons, est maintenant bien ayse de ce
que nous n'auons pas dequoy disner: &
voyant vne autre fois qu'on apportoit
quelques Porcs-espics, Dieu, disoit-il,
se va fâcher de ce que nous nous saou-
lerons. O langue impie que tu seras
chastié! esprit brutal que tu seras con-
fus, si Dieu ne te fait misericorde! que
les Anges & les saintes Ames redou-
blent autant de fois leur Cantique
d'honneur & des loüanges, que cét
athée le blasphemera; ce pauvre mise-
rable ne laisse pas par fois d'auoir quel-
ques craintes de l'enfer, qu'il tasche
d'étouffer tant qu'il peut, comme ie le
menaçois vn iour de ces tourmens, peut
estre, me fit-il, que nous autres n'auons
point d'ame, ou que nos ames ne
sont pas faites comme les vostres,
ou qu'elles ne vont point en mesme

endroit: qui est iamais venu de ce pays là pour nous en dire des nouuelles? ie luy reparty qu'õ ne pouuoit voir le Ciel sans cognoistre qu'il y a vn Dieu, qu'on ne peut conceuoir qu'il y a vn Dieu, sans conceuoir qu'il 'est iuste, & par consequent qu'il rend à vn chacun selon ses œuures, d'où s'ensuiuent de grandes recompenses, ou de grands chastimens: cela est bon, repliqua-il, pour vous autres que Dieu assiste, mais il n'a point soin de nous: car quoy qu'il fasse, nous ne laisserons pas de mourir de faim, ou de trouuer de la chaste; iamais cét esprit hebeté ne peut conceuoir que Dieu gouerne la grande famille du monde, avec plus de cognoissance & plus de soin qu'un Roy ne gouerne son Royaume, & vn pere de famille sa maison; ie serois trop long de rapporter tout ce que ie luy dis sur ses blasphemés & sur ses resueries.

Le quatriesme de Ianuier de ceste année mil six cens trente quatre, nous alâmes faire nostre habitation depuis nostre depart des riués du grand fleuve cherchant tousiours à viure. l'obietay en cét endroit au Sorcier qu'il n'estoit

288 *Relation de la Nouvelle France,*
pas bon Prophete, car il m'auoit asseu-
ré les deux dernieres fois que nous
auions decabané, qu'il neigeroit abon-
damment aussi tost que nous aurions
changé de demeure, ce qui se trouua
faux, j'ay rapportay cety à mon hoste
pour luy oster, vne partie de la creance
qu'il a en cét homme qu'il adore, il me
répondit que le Sorcier ne m'auoit pas
asseuré qu'il neigeroit, mais qu'il en
auoit seulement quelque pensée; non,
dis-je, il m'a assuré qu'il voyoit venir la
neige, & qu'elle tomberoit aussi-tost
que nous aurions cabané, *Khikhirassin*,
me fit-il, tu as menty, si tost que vous
leur dites quelque chose qu'ils ne veu-
lent point accorder, ils vous payent de
ceste monnoye.

La veille des Rois, mon hoste me dit
qu'il auoit fait vn songe qui luy don-
noit bien de l'apprehension; j'ay veu,
dit il, en dormant que nous estions re-
duits en la derniere extremité de la
faim, & celuy que tu nous dis qui a tout
fait, m'a assuré que tu tomberas dans
vne telle langueur, que ne pouuant plus
mettre vn pied deuant l'autre tu mour-
ras seul delaisé au milieu des bois, ie
crains

crains que mon songe ne soit que trop
 veritable : car nous voila autant que ia-
 mais dans la necessité faute de neige :
 j'euy quelque pensée que ce songeur me
 pouuoit bien iouer quelque mauuais
 traict, & m'abandonner tout seul pour
 faire du Prophete ; voila pourquoy ie
 me seruy de ses armes, opposant *altare*
contra altare, songe contre songe : & moy,
 luy dis-je, j'ay songé tout le contraire,
 car j'ay veu dans mon sommeil deux
 Orignaux, dont l'un estoit desia tué, &
 l'autre encore viuant, bon, dit le Sor-
 cier, voila qui va bien, aye esperance, tu
 raconte de bonnes nouuelles, en effect
 j'auois fait ce songe quelques iours au-
 parauant, hé bien, dis-je à mon hoste,
 lequel de nos deux songes sera trouué
 veritable, tu dis que nous mourrons de
 faim, & moy ie dis que non, il se mit à
 rire. Alors ie luy dis que les songes n'e-
 toient que des mensonges, & que ie ne
 n'appuyois point là dessus, que mon es-
 perance estoit en celuy qui a tout fait,
 que ie craignois neantmoins qu'il ne
 nous chastiait, veu qu'aussi tost qu'ils
 uoient à manger, ils se gaussoient de

290 *Relation de la Nouvelle France,*
luy, notamment l'Apostat, il n'a point
d'esprit, dirent-ils, ne prends pas garde
à luy.

Le iour que les trois Rois adorerent
nostre Seigneur, nous receusmes trois
mauuaises nouvelles; La premiere, que
le ieune Hyroquois estât allé à la chas-
se le iour precedent n'estoit point re-
tourné, & comme on sçauoit bien que
la faim l'ayant affoibly il ne se pouuoit
pas beaucoup éloigner, on creut qu'il
estoit mort, ou demeuré en quelque en-
droit si debile pour n'auoir dequoy
manger, que la faim & le froid le tuë-
roient, en effect il n'a plus paru depuis,
quelques vns ont pensé qu'il pourroit
bien s'estre efforcé de retourner en son
pays; mais que la plus part asseurent
qu'il est mort en quelque endroit sur la
neige, c'estoit l'un des trois prisonniers
à Tadoussac, dont i'ay parlé és premie-
res lettres que i'ay enuoyé de ce païs-
cy, ses deux compatriotes furent execu-
tez à mort avec des cruautéz nomp-
pareilles, pour luy comme il estoit ieune
on luy sauua la vie à la requeste du sieur
Emery de Can, que nous priasmes d'in-

terceder pour luy, ce pauvre ieune homme s'en souuenoit fort bien, il auoit grande enuie de demeurer en nostre maison; mais le Sorcier à qui il appartenoit ne le voulut iamais donner ny vendre.

La seconde mauuaise nouuelle nous fut apportée par vn ieune Sauuage qui venoit d'un autre cartier, lequel nous dit qu'un Sauuage d'une autre cabane plus esloignée estoit mort de disette, que ses gens estoient fort épouuentez ne trouuans pas de quoy viure, & nous voyant dans la mesme necessité, cela l'estonnoit encore dauantage. La troiesime fut que nos gens decouurirent la piste de plusieurs Sauuages qui nous estoient plus voisins que nous ne pensions, car ils venoient chasser iusques sur nos marches, enleuans nostre proye & nostre vie tout ensemble: ces trois nouuelles abbatirent grandement nos Sauuages, l'alarme estoit par tout, on ne marchoit plus que la teste baissée, ie ne sçay comme i'estois fait, mais ils me paroissoiēt tous fort maigres, fort pensifs, & fort mornes, si l'Apostat m'eust voulu

292 *Relation de la Nouvelle France,*
ayder à porter & à gagner le Sorcier, c'estoit bien le temps ; mais son diable muet luy lioit sa langue.

Il faut que ie remarque en ce lieu le peu d'estime que font de luy les Sauvages, il est tombé dans vne grande confusion voulant éviter vn petit reproche, il a quitté les Chrestiens & le Christianisme, ne pouuât souffrir quelques brocards des Sauvages, qui se gaussoient par fois de luy de ce qu'il estoit Sédentaire, & non vagabond comme eux, & maintenât il est leur iouët & leur fallot, il est esclaué du Sorcier, deuant lequel il n'oseroit branler, ses freres & les autres Sauvages m'ont dit souuent qu'il n'auoit point d'esprit, que c'estoit vn busart, qu'il ressembloit à vn chien, qu'il mourroit de faim si on ne le nourrissoit, qu'il s'égaroit dans les bois comme vn European, les femmes en font leur entretien, si quelque enfant pleuroit n'ayant pas de quoy manger, elles luy disoient, tais-toy, tais-toy, ne pleure point, *Petrichrich*, c'est ainsi qu'on le nomme par mocquerie, rapportera vn Castor, & tu mangeras ; quand elles

l'entendoient reuenir, allez voir, disoient
elles aux enfans, s'il n'a point tué vne
Orignac se gaussant de luy comme d'un
mauuais chasseur, qui est vn grand blas-
me parmy les Sauvages : car ces gens là
ne scauroient trouuer ou retenir des
femmes, l'Apostat en a desia eu qua-
tre ou cinq à la faueur de ses freres, tou-
tes l'ont quitté, celle qu'il auoit cét
hyuer me disoit qu'elle le quitteroit au
Prin-temps, & si elle eust esté de ce pais,
elle l'auroit quitté dès lors ; j'apprends
qu'en effect elle l'a quitté.

Certain iour nos chasseurs estans
tous dehors, il se tint vn conseil des
femmes dans nostre cabane : or comme
elles ne croyoient pas que ie les peusse
entendre, elles parloient tout haut, &
tout librement, déchirant en pieces ce
mauure Apostat, l'occasion estoit que
le iour precedent il n'auoit rien rappor-
té à sa femme d'un festin où il auoit esté
nuité, & qui n'estoit pas à tout man-
ger, ô le gourmand, disoient-elles, qui
ne donne point à manger à sa femme !
encore s'il pouuoit tuer quelque cho-
se, il n'a point d'esprit, il mange tout

294 *Relation de la Nouvelle France,*
comme vn chien: il y eut vne grande
rumeur entre les femmes sur ce sujet:
car comme elles ne vont point ordinairement
aux festins, elles seroient bien affligées,
si leurs marys perdoient la bonne coustume
qu'ils ont de rapporter leurs restes à leurs
familles, le Renegat suruenant pendant que
cés femmes le depeignoient, elles sceurent
fort bien dissimuler leur ieu, luy témoignant
vn aussi bon visage qu'à l'ordinaire, voire
mesme celle qui en disoit plus de mal, luy
donna vn bout de petun, qui estoit pour lors
vn grand present.

Le neufiesme de Ianuier, vn Sauvage
nous venant visiter nous dit, qu'un homme
& vne femme du lieu dont il venoit estoient
morts de faim, & que plusieurs n'en pouuoient
plus, le pauvre homme ieusna le iour de sa
venue aussi bien que nous, pource qu'il n'y
auoit rien à manger, encore fallut-il attendre
iusques au lendemain à dix heures de nuit,
que mon hôte rapporta deux Castors qui nous
firent grand bien.

Le iour ſuiuant nos gens tuerent le ſecond Orignac, ce qui cauſa par tout vne grande ioye, il eſt vray qu'elle fut vn peu troublée par l'arriuée d'un Sauuage, & de deux ou trois femmes, & d'un enfant que la famine alloit bien toſt égorger, ſ'ils n'euffent fait rencontre de noſtre cabane, ils eſtoient fort hideux, l'homme particulierement plus que les femmes, dont l'une auoit accouché depuis dix iours dans les neiges, & dans la famine, ayant paſſé pluſieurs iours ſans manger.

Mais admirez ſ'il vous plaist l'amour que ces barbares ſe portent les vns aux autres, on ne demanda point à ces nouueaux hoſtes pourquoy ils venoient ſur nos limites, ſ'ils ne ſçauoient pas bien que nous eſtions en auſſi grand danger qu'eux, qu'ils nous venoient oſter le morceau de la bouche; ains au contraire on les receut, non de paroles, mais d'effect, ſans courtoisie exterieure, car les Sauuages n'en ont point, mais non pas ſans charité: on leur ietta de grandes pieces de l'Orignac nouuellement tué,

296 *Relation de la Nouvelle France,*
sans leur dire autre parole, *mitifoukou*
mangez, aussi leur eust on fait grand
tort d'appliquer pour lors leurs bou-
ches à autre vſage : pendant qu'ils
mangeoient on prepara vn festin, au-
quel ils furent traictez à grand plat,
ie vous en répons : car la portion
qu'on leur donna à chacun, sortoit
beaucoup hors de leurs *ouragans* qui
sont tres capables.

Le seiziesme du mesme mois nous
battismes la campagne, & ne pouuans
arriuer au lieu où nous pretendions,
nous ne fismes que gister dans vne ho-
stelerie que nous dressasmes à la haste,
& le lendemain nous poursuiuismes no-
stre chemin passans sur vne monta-
gne si haute, qu'encore que nous ne
montassions point iusques au sommet,
qui me paroissoit armé d'horribles ro-
chers, neantmoins le Sorcier me dit,
que si le Ciel obscurcy d'vn broüillard
eust esté serain nous eussions veu à
mesme tēps Kebec & Tadoussac, esloi-
gnez l'vn de l'autre de quarante lieues
pour le moins, ie voyois au dessous de
moy avec horreur des precipices, qui me

faisoient trembler, j'apperceuois des montagnes au milieu de quelques plaines qui me paroissoient comme des petites tours, ou plustost comme de petits chasteaux, quoy qu'en effect elles fussent fort grandes & fort hautes: figurez vous quelle peine ont ces barbares de traîsner si haut leur bagage, j'aurois de la peine à monter, j'en trouuois encore plus à descendre: car quoy que ie m'esloignasse des precipices, neantmoins la pente estoit si roide, qu'il estoit fort aisé de rouler à bas, & de s'aller fendre la teste contre vn arbre.

Le vingt neufiesme nous acheuames de descendre ceste montagne portant nostre maison sur la pente d'une autre où nous allasmes: voila le terme de nostre pelerinage, nous commencerons d'oresnauant à tourner bride & à tirer vers l'Isle où nous auons laissé nostre Chaloupe, nous vismes icy les sources de deux petits fleuves, qui se vont rendre dans vn fleuve aussi grand au dire de nos Sauuages, que le fleuve de S. Laurens, ils l'appellent *Queraonachticou*.

298 *Relation de la Nouvelle France,*

Ceste douzième demeure nous a deliuré de la famine , car les neiges se trouuant hautes assez pour arrester les grandes iambes del'Elan , nous eusmes dequoy manger. Au commencement ce n'estoient que festins & que danses, mais cela ne dura pas, car on se mit bien-tost à faire seicherie passant de la famine dans la bonne nourriture, ie me portay bien : mais passant de la chair fraische au boucan ie tombay malade, & ne recouray point entierement la santé que trois semaines apres mon retour en nostre petite maisonnette. Il est vray que depuis le commencement de Feurier iusques en Aupil nous eusmes tousiours dequoy manger , mais d'un boucan si dur & si sale & en si petite quantité, horsmis quelques iours d'abondance qui se passoient en festins que nos Sauuages contoient ces derniers, mois aussi bien que les precedens entre les mois & les hyuers de leurs famines. Ils me disoient que pour estre traicté mediocrement & sans patir, il nous falloit vn Elan gros comme vn bœuf en deux iours , tant à raison du

nombre que nous estions, comme aussi qu'on mange beaucoup de chair quand on n'a ny pain ny autre chose pour faire durer la viande, adioustez qu'ils sont grands disneurs, & que la chair d'Elan ne demeure pas long-temps dans l'estomach.

Je me suis oublié de dire ailleurs que les Sauvages content les années par les hyuers, pour dire quel aage as-tu, ils disent combien d'hyuers as-tu passé? ils content aussi par les nuits comme nous faisons par les iours, au lieu que nous disons, il est arriué depuis trois iours, ils disent depuis trois nuits.

Le cinquiesme de Feurier nous quitrasmes nostre douziesme demeure pour aller faire la treiziesme, ie me trouuois fort mal, le Sorcier me tuoit avec ses cris, ses hurlemens, & son tambour, il me reprochoit incessamment que ie faisois l'orgueilleux, & que le *Manitou* m'auoit fait malade aussi bien que les autres. Ce n'est pas, luy disois-je, le *Manitou* ou le diable qui m'a causé ceste maladie, mais la mauuaise nourriture qui m'a gasté l'estomach, & les

300 *Relation de la Nouvelle France,*
autres traualx qui m'ont debilité, tout
cela ne le contentoit point, il ne lais-
soit pas de m'attaquer, notamment en
la presence des Sauvages, disant que ie
m'estois mocqué du *Manitou*, & qu'il
s'estoit vangé de moy comme d'un su-
perbe. Vn iour comme il me faisoit ces
reproches ie me leue en mon seant, ie
luy dis, afin que tu sçache que ce n'est
point ton *Manitou* qui cause les ma-
ladies & qui tuë les hommes, escoute
comme ie luy parleray, ie m'escrie en
leur langue grossissant ma voix, appro-
che *Manitou*, vien demon, massacre
moy si tu as le pouuoir, ie te deffie, ie
me mocque de toy, ie ne te crains point,
tu n'as point de pouuoir sur ceux qui
croient & qui ayment Dieu, viens &
me tuë si tu as les mains libres, tu as
plus de peur de moy que ie n'ay de toy,
le Sorcier fut espouuenté, & me dit
pourquoy l'appelle tu? puis que tu ne le
crains pas, c'est signe que tu l'appelle
afin qu'il te tuë, non pas luy dis-je, mais
ie l'appelle afin que tu ayes cognoissan-
ce qu'il n'a point de puissance sur ceux
qui adorent le vray Dieu, & pour te fai-

re voir qu'il n'est pas la seule cause des maladies comme tu crois.

Le neufiesme du mesme mois de Feurier nous battismes la campagne, le Sorcier nonobstant ma maladie me vouloit faire porter du bagage à toute force, mais mon hoste eust pitié de moy, voire mesme m'ayant rencontré en chemin que ie n'en pouuois quasi plus, il prit de son bon gré ce que ie portois, & le mit sur sa traïsne.

Le quatorziesme & quinziesme nous fismes de longues traictes pour aller planter nostre cabane proche de deux petits Orignaux que mon hoste auoit tué: faisant chemin on reconneust la piste d'un troisieme, mon hoste fit arrester le camp pour l'aller descouurir: i'estois en l'arriere garde de nostre armée, c'est à dire que ie venois doucement derriere les autres quand tout à coup ie vis paroistre cét Elan qui couroit droit à moy, & mon hoste apres, qui luy donnoit la chasse, la neige estoit fort haute, voila pourquoy il ne fit qu'enuiron cinq cens pas deuant que d'estre mis à mort, nous cabanames aupres & en fismes eürée.

L'Apostat continuant icy ses blasphemés, me demandoit deuant ses frères pour les animer contre Dieu, pourquoy ie priois celuy qui n'entendoit ny ne voyoit rien, ie le repris fort vertement & luy imposay silence.

Le sixiesme iour de Mars nous changeasmes de demeure, le Sorcier, le Renegat, & deux ieunes chasseurs tirerent deuant nous droit aux riués du grand fleuve, l'occasion de cette separation fut que mon hoste braue chasseur ayant descouvert quatre Orignaux, & quantité de cabanes de Castors, ne pouuant luy seul en mesme temps chasser en tant d'endroits fort separez, le Sorcier mena ces ieunes chasseurs pour courre les Orignaux, & luy demeura pour les Castors: cette separation me fit du bien & du mal. Du bien, pource que ie fus deliuré du Sorcier, ie n'ay point de paroles pour declarer l'importunité de ce meschant homme. Du mal, pource que mon hoste ne prenant point d'Orignaux nous ne mangions que du boucan qui m'estoit fort contraire, que s'il prenoit des Castors on en faisoit seiche-

rie, excepté des petits que nous mangions, les plus beaux & les meilleurs estoient reseruez pour les festins qu'ils deuoient faire au Printemps, au lieu où ils s'estoient donnez le rendez-vous.

Le treiziesme du mesme mois nous fismes nostre dix-huictiesme demeure proche d'un fleuve dont les eaux me sembloient sucrées apres la saleté des neiges fonduës que nous beuions es stations precedentes dans un chauderon gras & enfumé, ie commençay à ressentir en ce lieu l'incommodité du coucher sur la terre bien froide pendant l'hyuer & fort humide au Printemps, car le costé droit sur lequel ie reposois s'estourdit tellement par la froidure qu'il n'auoit quasi plus de sentiment: or craignant de ne remporter que la moitié de moy-mesme dans nostre petite maison, l'autre demeurante paralytique, ie promis vne chemise & vne petite robbe à un enfant pour un meschât bout de peau d'Orignac que sa mere me donna, ceste peau non passée estoit bien aussi dure que la terre, mais non pas si humide,

304 *Relation de la Nouvelle France,*
i'en fis mon liët qui se trouua si courti
que la terre qui auoit iusques alors pris
possession de tout mon corps en retint
encore la moitié.

Depus le depart du Sorcier, mon
hoste prenoit plaisir à me faire des que-
stions, notamment des choses naturel-
les, il me demanda vn iour comme la
terre estoit faite, & m'apportant vne
écorce & vn charbon, il me la fit dé-
crire, ie luy despeins donc les deux
Hemispheres, & apres luy auoir tracé
l'Europe, l'Asie, & l'Afrique, ie vins à
nostre Amerique, luy monstrant com-
me elle est vne grande Isle, ie luy d'écri-
uy la coste de l'Acadie, la grande Isle
de Terre-neufue, l'entrée & golfe de
nostre grand fleuve de saint Laurens,
les peuples qui habitent ses riuës, le
lieu où nous estions pour lors, ie montay
iusques aux Algonquains, aux Hiro-
quois, aux Hurons, à la nation neu-
tre, &c. luy designant les endroits plus
& moins peuplez, ie passay à la Floride,
au Perou, au Brasil, &c. luy parlant en
mon jargon de ces contrées le mieux
qu'il m'estoit possible, il m'interrogea
plus

plus particulièrement des païs dont il a connoissance , puis m'ayans escouté fort patiemment, il s'escria prononçant vne de leurs grandes admirations *Amo-nitatinanionikhi* ! Ceste robbe noire dit vray ! parlant à vn vieillard qui me regardoit, puis se tournant deuers moy il me dit, *nicanis*, mon bien aymé tu nous donne en verité de l'admiration , car nous connoissons la plus part de ces terres & de ces peuples , & tu les a descrit comme ils sont, i'insiste là dessus, comme tu vois que ie dis vray parlant de ton pays , aussi dois-tu croire que ie ne ments pas parlant des autres , ie le croy ainsi, me repartit-il, ie poursuy ma pointe, comme ie suis veritable en parlant des choses de la terre, aussi tu dois te persuader que ie ne voudrois pas mentir quand ie te parle des choses du Ciel, & partant tu dois croire ce que ie t'ay dit de l'autre vie: il s'arresta vn peu de temps tout court , puis ayant vn peu pensé à part soy , le te croiray , dit-il quand tu sçauras bien parler , nous auons maintenant trop de peine à nous faire entendre.

Il m'a fait mille autres questions, du Soleil, de la rondeur de la terre, des Antipodes, de la France, & fort souvent il me parloit de nostre bon Roy, il admiroit quand ie luy disois que la France estoit remplie de Capitaines, & que le Roy estoit le Capitaine de tous les Capitaines, il me prioit de le mener en France pour le voir, & qu'il luy feroit des presens, ie me mis à rire luy disant que toutes leurs richesses n'estoient que pauureté à comparaisson des grandeurs du Roy, le veux dire, me fit-il, que ie feray des presens à ceux de sa suite, pour luy ie me contenteray de le voir, il racontoit par apres aux autres ce qu'il m'auoit ouy dire. Il me demanda vne autrefois s'il y auoit de grands faultz dans la mer, c'est à dire des cheutes d'eau, il y en a beaucoup dans les fleuves de ce pais cy, vous verrez vne belle riuiera coulant fort doucement tomber tout à coup dans vn lit plus bas, les terres ne s'abbaissant pas également, mais comme par degrez en certains endroits, nous voyons vn de ces sauts proche de Kebec nommé le saut de

Montmorency , c'est vne riuere qui vient des terres , & qui se precipite de fort haut dans le grand fleuve de saint Laurens , les riuies qui le bornent estans fort releuées en cet endroit : Or quelques Sauvages croyoient que la mer a de ces cheutes d'eau dans lesquelles se perdent quantité de nauires ie luy ostay cet erreur , ces inegalitez ne se retrou- uans point dans l'Ocean.

Le vingt-troisiesme de Mars nous repassames le fleuve *Capititetchioneth*, que nous auions passé le troisieme de Decembre.

Le trentiesme du mesme mois, nous vinsmes cabaner sur vn fort beau lac, en ayant passé vn autre plus petit en nostre chemin, ils estoient encore auant glacez qu'au milieu de l'hyuer, mon hoste me consoloit icy me voyant fort foible & fort abbattu, ne t'attriste point, me disoit-il, si tu t'attriste tu seras encore plus malade, si ta maladie augmente tu mourras, considere que voicy vn beau pays, ayme-le, si tu l'aimes, tu t'y plairas, si tu t'y plais tu te resioüiras, si tu te resioüis tu guariras, ie

308 *Relation de la Nouvelle France,*
prenoïs plaisir d'entendre le discours de
ce pauvre barbare.

Le premier iour d'Auril nous quitrâmes ce beau lac & tirâmes à grande erre vers nostre rendez vous, nous passâmes la nuit dans vn meschant trou enfumé & dés le matin continuâmes nostre chemin faisant plus en ces deux iournées que nous n'auions faict en cinq, Dieu nous fauorisa d'vn beau temps : car il gela bien fort, & l'air fut serain, s'il eust fait vn degel comme les iours precedens, & que nous eussions enfoncé dans la neige, comme quelques fois il nous est arriué, ou il m'eust fallu traïfner, ou ie fusse demeuré en chemin tant i'estois mal. Il est bien vray que la nature a plus de force qu'elle ne s'en fait accroire, ie l'experimentay en ceste iournée en laquelle i'estois si foible, que m'asseyant de temps en temps sur la neige pour me reposer, tous les membres me trembloient, non pas de froid, mais par vne debilité qui me cauçoit vne sueur au front. Or comme i'estois alteré voulant puiser de l'eau dans vn torrent

que nous rencontraſmes, la glace que ie caſſois avec mon baſton tomba deſſous moy, & fit vn grand eſcarre: quand ie me vis avec mes raquettes aux pieds ſur ceſte glace flottante ſur vne eau fort rapide, ie ſautay pluſtoſt ſur le bord du torrent, que ie n'eü conſulté ſi ie le deuois faire, & la nature qui ſuoit de foibleſſe trouua aſſez de force pour ſortir de ceſte grande eau n'en voulant pas tant boire à la fois, ie n'eus que la peur d'vn peril qui fut pluſtoſt eſuité que reconnu.

Le danger paſſé ie pourſuiuis mon chemin aſſez lentement, auſſi ne pouuois-ie pas eſtre bien fort, car outre la maladie qui ne m'auoit point quitté parfaitement depuis le dernier iour de Ianuier, ie ne mangeois ces derniers iours que trois bouchées de boucan le matin, & cheminois quaſi tout le reſte du iour ſans autre rafraichiffement qu'vn peu d'eau quand i'en pouuois rencontrer. Enfin i'arriuy apres les autres ſur les riuies du grand fleuve, & trois iours apres no;

310 *Relation de la Nouvelle France,*
estre arriuée, sçauoir est le quatriesme
du mesme mois d'Auril nous fismes
nostre vingt-troisiesme station allant
planter nostre cabane dans l'Isle où
nous auions laissé nostre Chaloupe,
nous y fumes tres mal logez : car ou-
tre que le Sorcier s'estoit remis avec
nous, nous estions si remplis de fu-
mée que nous n'en pouuions plus,
d'ailleurs le grand fleuve estant icy sa-
lé, & l'Isle n'ayant aucune fontai-
ne nous ne beuuiens que des eaux de
neige, ou de pluye encore tres sa-
le. Je ne fis pas long sejour en ce lieu,
mon hoste voyant que ie ne guerissois
point, prit resolution de me remener en
nostre maisonnette, le Sorcier l'en vou-
lut detourner, mais ie rompis ses me-
nées, l'obmets mille particularitez pour
tirer à la fin.

Le cinquiesme du mois d'Auril,
mon hoste, l'Apostat, & moy, nous
embarquasmes dans vn petit canot
pour tirer à Kebec sur le grand fleu-
ue, apres auoir pris congé de tous les
Sauuages : or comme il faisoit encore
froid nous ne fumes pas loin que

nous trouuâmes vne petite glace formée pendant la nuit, qui seruoit de superficie aux eaux, voyant qu'elle s'estendoit fort loing, nous donnons dedans, l'Apostat qui estoit deuant, la brisant avec son auiron : or soit qu'elle fut trop trenchante, ou l'écorce de nostre gondole trop foible, il se fit vne ouuerture qui donna entrée à l'eau dans nostre canot & à la crainte dans nostre cœur, nous voilà aussi tost tous trois en action, mes deux Sauvages de ramer, & moy de ietter l'eau, nous tirons à force de rames dans vne île que nous rencontraâmes fort à propos, & mettant pied à terre les Sauvages empoignent leur canot, le tirent de l'eau, le renuersent, battent leur fusil, font du feu, recousent l'escorce fendue, y appliquent de leur bray, qui est vne espece d'encens qui decoule des arbres, remettent le canot à l'eau, nous nous rembarquons & continuons nostre chemin : ie leur dy voyant ce peril que s'ils croyoient rencontrer souuent de ces glaces tran-

312 *Relation de la Nouvelle France,*
chantes, qu'il valloit mieux retourner
d'où nous estions partis, & attendre
que le temps fut plus chaud, il est vray
me fit mon hoste que nous auons pen-
sé perir, si l'ouuerture eust esté vn peu
plus grande c'estoit fait de nous, pour-
fuiuons neantmoins nostre chemin
ces petites glaces ne m'estonnent pas.
Sur les trois heures du soir nous ap-
perceusmes deuant nous vn banc de
glaces espouuentables qui nous bou-
choit le chemin, s'estendant au tra-
uers de ce fleuve à plus de quatre
lieuës loin: nous fusmes vn peu eston-
nez, mes gens ne laissent pas pour-
tant de les aborder ayant remarqué
vne petite esclaircie, ils se glissent là
dedans faisant tournoyer nostre peti-
te gondole, tantost d'vn costé & puis
tantost de l'autre pour gagner touf-
jours pais, en fin nous trouuasmes ces
glaces si fort serrées qu'il fut impossi-
ble d'auancer ny de reculer, car le
mouuement de l'eau nous enferma de
toutes parts, au milieu de ces glaces
s'il y fut suruenu vn vent vn peu vio-
lent nous estions froissez & brisez &

nous & nostre canot comme le grain entre les deux pierres du moulin, car figurez-vous que ces glaces sont plus grandes & plus espaisſes que les meules & la tremuë tout ensemble, mes Sauvages nous voyant si empressez sautent de glaces en glaces comme vn ecririeux d'arbres en arbres, & les repoussant avec leurs auirons font passage au canot dans lequel i'estois tout seul plus prest de mourir par les eaux que de maladie, nous combattismes en cette sorte iusques à cinq heures du soir que nous prîmes terre: ces barbares sont tres habiles en ces rencontres, ils me demandoient par fois dans la plus grande presse des glaces si ie ne craignois point, veritablement la nature n'ayme point à iouïr à ce jeu là, & leurs sauts de glaces en glaces me sembloient des sauts perilleux & pour eux & pour moy, veu mesmes que leur pere, à ce qu'ils me disoient, s'est autrefois noyé en semblable occasion. Il est vray que Dieu dont la bonté est par tout aymable, se trouue aussi bien dessus les eaux

314 *Relation de la Nouvelle France,*
& parmy les glaces que dessus la terre,
nous eschappasmes encore de ce dan-
ger qui ne leur sembla pas si grand que
le premier.

Arriuez que nous fusmes à terre no-
stre maison fut de nous coucher au
pied d'un arbre, nous mangeasmes un
peu de boucan, beusmes un peu d'eau
de neige fonduë, ie fis mes petites prie-
res & me couchay aupres d'un bon feu
qui contrequarra la gelée & le froid de
la nuit.

Le lendemain nous nous embarquas-
mes de bonne heure, la marée qui nous
auoit amené ces armées de glaces les
porta la nuit d'un autre costé, nous
fismes donc quelque chemin deliurés
de cette importunité, mais le vent s'a-
nimant & nostre petite gondole, com-
mençant à dancer sur les vagues nous
nous iettasmes incontinent à terre.
J'auois prié mes gens de prendre avec
eux des escorces pour nous faire la
nuit vne cabane & des viures pour
quelques iours n'estant pas asseurez
du retardement que le mauuais temps
nous pourroit apporter, ils ne firent

ny l'un ny l'autre , si bien qu'il fallut
coucher à l'air , & manger en qua-
tre iours les viures d'une iournée , ils
s'attendoient d'aller à la chasse , mais
les neiges se fondans ils ne pou-
uoient courre , le temps faisant mi-
ne de s'appaiser nous nous rembar-
quâmes , mais à peine auions nous
faict trois lieuës que le vent se ren-
forçant nous va ietter dans des gla-
ces que la marée nous ramenoit , &
nous d'enfiler viste un petit ruisseau ,
de sauter tous trois sur ces grandes
glaces qui estoient aux bords , & de
gagner la terre , nos Sauvages por-
tant sur les espaules nostre nauire d'é-
corce.

Nous voila donc logez à une poin-
te de terre exposée à tous vents, nous
mettons nostre canot derriere nous
pour nous abrier , & comme nous
craignons la pluye ou la neige mon
hoste iette une meschante peau sur
des perches , & voila nostre maison
faicte. Les vents furent si violens tou-
te la nuit qu'ils nous penserent en-
leuer nostre canot , le lendemain la

316 *Relation de la Nouvelle France,*
tempeste continuant dessus l'eau, mes
gens n'ayant dequoy manger vont à
la chasse par vn tres mauuais temps,
le Renegat ne prit rien, mon hoste
rapporta vn perdreau qui nous seruit
de deieusner, de disner, & de soup-
per, vray que i'auois mangé quelques
fueilles de fraisiere, que la terre nou-
uellement descouuerte de neige en
quelques endroits me donna, nous
passasmes donc cette iournée sans
faire chemin, la nuit les tempestes,
les foudres de vent, & le froid nous
assaillirent avec telle furie qu'il fallut
ceder à la force, nous estions cou-
chez à platte terre, car ils n'auoient
pas pris la peine de la couvrir de
branches de pin, nous nous leuaf-
mes tout glassez pour entrer dans le
bois & emprunter des arbres l'abry
contre le vent & le couuert contre
le Ciel, nous fismes vn bon feu, &
nous nous endormismes sur la terre
encore toute humide pour auoir ser-
uy de liêt à la neige peut-estre la nuit
precedente, Dieu soit beny sa prou-
dence est adorable, nous mettions ce

iour & ceste nuit dans le catalogue des iours & des nuits mal-heureux, & ce nous fut vn temps de bon-heur, car si ces tempestes & ces vents ne nous eussent tenus prisonniers sur terre pendant qu'ils escartotent les glaces les poussant à val la riuere, elles se fussent reserrées au trauers des Isles où nous deuions passer, & nous eussent faict mourir de trop boire ecrasant nostre canot, ou de trop peu manger, nous arrestans dans quelque Isle deserte. Bref si nous fussions eschappez c'eust esté à grand peine, de plus i'estois si debile & si malade quand ie m'embarquay, que si i'eusse preueu les trauaux du chemin i'aurois creu deuoir mourir cent fois, & neantmoins Nostre Seigneur commença à me fortifier dans ces difficultez, en sorte que i'ayday mes Sauuages à ramer notamment sur la fin de nostre voyage.

Le iour qui suiuit ces tempestes paroissant encor animé de vents, mon hôte & l'Apostat s'en allerent à la chasse, vne heure apres leur depart le

318 *Relation de la Nouvelle France,*
Soleil paroist beau , l'air serein, les
vents s'appaissent, les vagues cessent,
la mer se calme, en vn mot il abonit
pour parler en matelot, me voila bien
en peine de vouloir suiure mes Sau-
uages à la trace pour les appeller,
c'estoit mettre vne tortuë apres des
leuriers, ie iette les yeux au Ciel com-
me au lieu de refuge, les abbaissant
vers la terre ie vy mes gens courre
comme des cerfs sur l'orée du bois, ti-
rans vers moy, aussi-tost ie me leue
portant nostre petit bagage vers la
riuiera, mon hoste arriuant *eco, eco, pou-
sitau, poustitau, viste, viste,* embarquons
nous, embarquons nous, plustost fait
qu'il n'est dit, le vent & la marée
nous fauorisent, nous allons à rames
& à voile, nostre petit vaisseau d'es-
corce fendant les ondes d'vne vites-
se incomparable, nous arriuasmes
en fin sur les dix heures du soir à la
pointe de la grande Isle d'Orleans,
il n'y auoit plus que deux lieuës ius-
ques à nostre petite maison, mes gens
n'auoient point mangé tout le iour,
ie leur donne courage, nous nous

efforçons de passer outre , mais le courant de la marée qui descendoit encor estant fort rapide , il fallut attendre le flot pour trauerser la grande riuere , nous entraîmes cependant dans vne anse de terre , & nous nous endormîmes sur le sable apres d'vn bon feu que nous allumâmes.

Sur la minuit le flot retournant nous nous embarquâmes , la Lune nous éclairant , le vent & la marée nous faisoient voler , mon hôte n'ayant pas voulu tirer du costé que ie luy dis , nous pensâmes nous perdre dans le port , car comme nous vinsmes pour entrer dans nostre petite riuere nous la trouuâmes encore toute glacée , nous voulûmes approcher du riuage , mais le vent y auoit rangé vn grand banc de glace , qui se choquoient les vnes les autres nous menaçoient de mort si nous les abordions , si bien qu'il fallut tourner bride , mettre le cap au vent & se roidir contre la marée , c'est icy que ie vy les vaillances de mon hôte , il s'e-

320 *Relation de la Nouvelle France*,
 estoit mis deuant comme au lieu le
 plus important dans les grands pe-
 rils , ie le voyois au trauers de l'ob-
 scurité de la nuit qui nous donnoit
 de l'horreur & augmentoit nostre
 danger , bander ses nerfs , se roidir
 contre la mort , tenir nostre petit
 canot en estat dans des vagues capa-
 bles d'engloutir vn grand vaisseau ,
 ie luy crie *Nicanis ouabichtigoneiakhi*
 ouabichtigoneiakhi , mon bien-aymé à
 Kebec , à Kebec , tirons là. Quand
 nous vismes à doubler le saut au Ma-
 telot , c'est le detour de nostre riuie-
 re dans le grand fleuve, vous l'eus-
 siez veu ceder à vne vague , en cou-
 per vne autre par le milieu , éuiter
 vne glace , en repousser vne autre ,
 combattre incessamment contre vn
 furieux vent de Nordest qu'il auoit en
 teste.

Ayans éuité ce danger nous voulu-
 mes aborder la terre, mais vne armée de
 glaces animée par la fureur des vents
 nous en deffendoit l'entrée : nous allôs
 donc iusques deuant le fort costoyant
 le riuage , cherchant dans les tenebres

vn petit iour ou vne petite eclaircie
parmy ces glaces; mon hôte ayant ap-
perceu vn rerin ou detour qui est au bas
du fort, où les glaces ne branloient point
pour estre à l'abry du vent, en detourne
auec son auiron trois ou quatre furieu-
ses qu'il rencontre; & vous iettelà de-
dans, il saute viste hors du Canot, crai-
gnant le retour des glaces, criant *Capa-
tan*, desembarquons nous; le mal estoit
que les glaces estoient si hautes & si
épaisses sur le riuage, qu'à peine y pou-
uois-je atteindre auec les mains; ie ne
sçauois à quoy m'aggraffer pour sortir
du Canot, & monter sur ces riuages gla-
cées; ie prends mon hôte par le pied
d'vne main, & de l'autre vn coing de
glace que ie rencontre, & ie me iette en
saueté, vn auec les deux autres, vn
lourdaut deuiant habille homme en ces
occasions: estant sorty du Canot, ils
l'enleuent par les deux bouts, & le met-
tent en lieu d'assurance: cela fait nous
nous regardons tous trois, & mon hôte
reprenant son haleine, me dit, *nicanis kbe-
gat nipiaco*, mon grand amy, nous auons
pensé mourir; il auoit encore horreur,
de la grandeur du peril. Il est vray que

324 *Relation de la Nouvelle France,*

s'il n'eust eu des bras de Geant (il est hōme grand & puissant & d'une industrie non commune, ny aux François ny aux Sauvages,) ou vne vague nous eust englouty, ou le vent nous eust renuersé, ou vne glace nous eust escrasé, disons plustost que si Dieu n'eust esté nostre Nocher, les ondes qui battent les riués de nostre demeure auroient esté nostre sepulchre. De verité quiconque habite parmy ces peuples, peut bien dire avec le Roy Prophete, *anima mea in manibus meis semper*: depuis peu vn de nos François s'est noyé en semblable occasion, & encore moindre, car il ny auoit plus de glaces.

Estant échappé de tant de perils, nous trauersâmes nostre riuere sur la glace, qui n'estoit point encore partie; & sur les trois heures apres minuit, le Dimanche de Pasques fleurie 9. d'Auril, ie r'entray dans nostre petite maisonnette, Dieu sçait avec quelle ioye de part & d'autre, ie trouuay la maison remplie de paix & de benediction, tout le monde en bonne santé par la grace de nostre Seigneur. Monsieur le Gouverneur sçachant mon retour, m'enuoya

deux des principaux de nos François pour ſçauoir de ma ſanté, ſon affection nous eſt tres ſenſible; l'un des chefs de l'ancienne famille du pays accourut auſſi pour ſe reſioüyr de mon retour, ils auoient connu par le peu de neige qu'il y a eu cét Hiuer, moins rigoureux que les autres, que les Sauuages & moy par conſequent eſtions preſſez de la faim; c'eſt ce qui en reſioüit quelques-uns iuſques aux larmes, me voyant reſchappé d'un ſi grand danger; noſtre Seigneur ſoit beny dans les temps & dans l'éternité.

J'ay bien voulu d'eſcrire ce voyage, pour faire voir à V. R. les grands travaux qu'il faut ſouffrir en la ſuitte des Sauuages, mais ie ſupplie pour la dernière fois ceux qui auroient enuie de les ayder, de ne point prendre l'eſpouuente, non ſeulement pource que Dieu ſe faiçt ſentir plus puiſſamment dans la diſette, & dans les delaiſſements des creatures, mais auſſi pource qu'il ne ſera plus de beſoin de faire ces courſes, quand on aura la connoiſſance des langues, & qu'on les aura reduites en preceptes: J'ay rapporté quelques particularitez

324 *Relation de la Nouvelle France,*
qui se pouuoient obmettre, i'en ay passé
beaucoup sous silence, qu'on auroit
peu lire avec plaisir, mais la crainte d'e-
stre long, & mon peu de loisir, me fait
tomber dans le desordre; il est vray que
i'escriis à vne personne, *qua ordinabit me*
charitatem, les autres qui verront cette
Relation par son entremise, me feront
la mesme faueur. Je dirois volontiers ces
deux mots, à quiconque lira ces escrits,
ama & fac quod vis, retournons à nostre
journal.

Le 31. de May, arriua vne chaloupe
de Tadoussac, qui apportoit nouuelle
que trois vaisseaux de Messieurs les As-
sociez estoient arriuez, deux estoient
dans le port, & le troisieme au Moulin
Bande, c'est vn lieu proche de Tadous-
sac, que les François ont ainsi nommé:
on attendoit le quatrieme, dans lequel
commandoit Monsieur du Plessis, gene-
ral de la flotte, qui vint bien-tost apres,
& loüa grandement le Capitaine Bon-
temps, pour s'estre rendu fort recom-
mandable en la prise du nauire Anglois,
dont i'ay parlé cy-dessus; si tost que ces
bonnes nouuelles furent portées à M^o-
sieur de Champlain, comme il n'obmer

aucune occasion de nous tesmoigner son affection, il nous en fit donner aduis par homme exprés, nous enuoyans en outre les lettres du R. P. L'allement, qui m'escriuoit qu'il estoit arriué avec N. F. Jean Ligeois en bonne santé, & qu'au premier vent il seroit des nostres; il est aisé à conjecturer avec quelle ioye nous benîmes & remerciaîmes nostre Seigneur de ces bonnes & si fauorables nouuelles; il arriva deux iours apres dans la barque que commandoit Monsieur Castillon, qu'on dit s'estre fort bien comporté en la prise del'Anglois.

Le quatrième iour de Iuin Feste de la Pentecoste le Capitaine de Nesle arriva à Kebec, dans son vaisseau estoit Monsieur Giffard, & toute sa famille, composée de plusieurs personnes qu'il amene, pour habiter le pays, sa femme s'est montrée fort courageuse à suiure son mary: elle estoit enceinte quand elle s'embarqua; ce qui luy faisoit apprehender ses couches, mais nostre Seigneur la grandement fauorisée, car huit iours apres son arriué, sçauoir est le Dimanche de la sainte Trinité, elle s'est deliurée fort heureusement d'une fille qui se porte

326 *Relation de la Nouvelle France,*
fort bien, & que le Pere Lallemañt baptisale lendemain.

Le 24. du mesme mois, feste de S. Iean Baptiste, le vaisseau de l'Anglois commandé par le Capitaine de Lormel, monta iusques icy, & nous apporta le P. Iacques Buteux en assez bonne santé, Monsieur le General nous honorant de ses lettres, me manda que ce bon Pere auoit esté fort malade pendant la trauersée, & le Pere nous dit qu'il auoit esté secouru & assisté si puissamment, & si charitablement de Monsieur le General & de son Chirurgien, qu'il en restoit tout confus, maintenant il se porte mieux que iamais il n'a fait.

Le premier de Iuillet le P. Brebœuf & le P. Daniel partirent dans vne barque, pour s'en aller aux trois Riuieres, au deuant des Hurons, la barque alloit commencer vne nouvelle habitation en ce quartier là, le P. Dauost qui estoit descendu de Taboussac, pour l'assistance de nos François, suiuit nos Peres trois iours apres, en la compagnie de Monsieur le General, qui se vouloit trouuer à la traite avec ces peuples. Ils attendirent là quelque temps les Hurons, qui ne sont point

descendus en si grand nombre cette année qu'à l'ordinaire, à raison que les Hiroquois estans aduertis que cinq cens hommes de cette nation tiroient en leur pays, pour leur faire la guerre, leur allerent au deuant au nombre de quinze cens dit on, & ayant surpris ceux qui les vouloient surprendre: ils en ont tué enuiron deux cens, & pris plus d'une centaine de prisonniers, dont Louys Amantacha est du nombre: on disoit que son pere estoit mis à mort, mais le bruit est maintenant qu'il s'est sauué des mains de l'ennemy. On nous rapporte que ces Hiroquois triomphans ont renuoyé quelques Capitaines aux Hurons pour traiter de paix, retenans par deuers eux les plus apparens, apres auoir cruellement massacré les autres.

Cette perte a esté cause que les Hurons sont venus en petites troupes, au commencement ils ne sont descendus que sept Canots: Le Pere Brebœuf en ayant eu nouuelle, les aborde, & fait tout ce qu'il peut pour les engager à le receuoir, & ses compagnons, & les porter en leur pays, ils s'y accordent volontiers. Là des-

328 *Relation de la Nouvelle France,*
sus vn Capitaine Algonquain, nommé la
Perdrix, qui demeure en ville, fit vne
harangue, par laquelle il recomman-
doit qu'on n'embarquast aucun Fran-
çois: Voila les Hurons qui doiuent pas-
ser par le pays de ce Capitaine, à leur re-
tour entierement refroidis: sur ces en-
trefaites arriue Monsieur du Pleffis,
tout cecy se passoit en vn lieu nommé
les trois Riuieres, trente lieues plus haut
que Kebec; comme il desiroit ardem-
ment que nos Peres penetraissent dans
ces nations, il fit assembler les Algon-
quains en Conseil, notamment ce Capi-
taine, pour luy faire rendre raison de sa
deffence; il en apporte plusieurs, on luy
satisfaiet sur le châp, il insuïtoit, comme
ie le coniecture, des lettres du Pere Bre-
bœuf, sur le desordre qui arriueroit, au
cas que quelque François mourut aux
Hurons; on luy repart que les Peres n'e-
stans point en son pays, la paix entre les
Francois, & ses Compatriotes, ne seroit
point rompue, quoy qu'ils mourussent
d'une mort naturelle ou violente. Voila
les Algonquains contents: mais les Hu-
rons commencerent à s'excuser sur leur

petit nombre , qui ne ſçauroit paſſer tant de François ſur la petiteſſe de leurs Canots, & ſur leurs maladies; en vn mot ils euſſent bien voulu embarquer quelques François bien armez, mais non pas de ces longues robbes, qui ne portent point d'arquebules. Monsieur du Pleſſis preſſe tant qu'il peut, prent noſtre cauſe en main, on trouue place pour quelques vns; vn certain Sauuage ſ'adreſſe au Pere, & luy dit, fais moy traiter mon petun pour de la porcelaine, & mon Canot eſtant deſchargé ie prendray vn François, le Pere n'en auoit point, mais Monsieur du Pleſſis ſçachât cela, & Monsieur de l'Espinay acheterent ce petun; voila donc place pour ſix perſonnes, quand ſe vint à ſ'embarquer. les Sauuages qui eſtoient malades en eſſect, diſent qu'ils n'en ſçauoient porter que trois, deux ieunes hommes François, & vn Pere; les Peres promettét qu'ils rameneront ils font des preſents, Monsieur du Pleſſis en fait auſſi, inſiſte tant qu'il peut, ils n'en veulent point receuoir dauantage.

Le Pere Brebœuf a recours à Dieu,

330 *Relation de la Nouvelle France,*

voicy comme il parle en salettre : Iamais
 i ne veys embarquement tant balotté &
 plus traierfé par les menées, comme ie
 croy, de l'ennemy commun du salut des
 hommes, c'est vn coup du Ciel que nous
 soyons passés outre, & vn effect du pou-
 uoir du Glorieux saint Ioseph, auquel
 Dieu m'inspira dans le desespoir de tou-
 tes choses, de promettre 20. sacrifices en
 son honneur; ce veu fait, le Sauvage qui
 auoit embarqué Petit Pré, l'vn de nos
 François, le quitta pour me prendre, veu
 mesme que Monsieur du Pleffis insistoit
 fort que cela se fist. Et ainsi le Pere Bre-
 bœuf, le Pere Daniel, & vn ieune homme
 nommé le Baron, furent acceptez de ces
 Barbares qui les portent en leur pays
 dans des Canots d'escorce. Restoient le
 Pere Dauost, & cinq de nos François,
 ne demandez pas si le Pere estoit triste:
 voyant partir ses compagnons sans luy,
 & sans quasi rien porter des choses neces-
 saires pour leur vie, & pour leurs habits:
 De verité ils ont monstré qu'ils auoient
 vn grand cœur leur le desir d'entrer dans
 le pays de la Croix, leur fit quitter leur
 petit bagage, pour ne point charger

leurs Sauvages qui setrouuoient mal, se contentants des ornements de l'Autel, & se confiant du reste, en la prouidence de nostre Seigneur, leur depart des trois Riuieres fut si precipité, qu'ils ne purent pas nous rescrire : mais estant arriuez au lōg Sault, à quelque quatre vingts lieuës de Kebec, & rencontrant des Hurons qui descendoient, ils nous enuoyerent quelques lettres, dans l'vne desquelles le Pere Brebœuf ayant raconté les difficultez de son embarquement, parle ainsi : Je prie V. R. de remercier, mais de bonne façon M. du Pleffis, auquel apres Dieu nous deuōs certes grandement en nostre embarquement : car outre les presents qu'il a fait aux Sauvages, tant publics que particuliers, & la Porcelaine qu'il a traittée, il a tenu autant de conseils que nous auons desiré, il nous a fourny de viures 'au depart, & nous a honorez de plusieurs coups de Canon; & le tout avec vn grand soing & vn tesmoignage d'vne tres-particuliere affection.

Nous nous en allons à petites iournées bien sains, quand à nous, mais nos Sauvages sont tous malades, nous ramons

continuellement, & ce d'autant plus que nos gens sont malades pour Dieu & pour les âmes rachetés du sang du Fils de Dieu, que ne faut-il faire! tous nos Sauvages s'ont très-côtents de nous, & ne voudroient pas en auoir embarqué d'autres; ils disent tant de bié de nous à ceux qu'ils recôtrent, qu'ils leurs persuadent de n'en embarquer point d'autres, Dieu soit beny. V. R. excuse à l'écriture & l'ordre, & le tout: nous partons si matin, gistons si tard, & ramons si continuellement, que nous n'auons quasi pas le loisir de satisfaire à nos prières; de sorte qu'il m'a fallu acheuer la presente à la lueur du feu, ce sont les propres paroles du Pere, qui adjouste en vn autre endroit, que les peuples par où ils passent sont quasi tous malades, & meurent en grand nombre. Il y a en quelque espece d'Epidémie cette année, qui s'est mesme communiquée aux François, mais Dieu mercy personne n'en est mort, c'estoit vne façon de rougeolle, & vne oppression d'estomach; reuenons aux trois Riuieres.

Ceux qui attendoient quelque autre occasion pour s'embarquer, furent con-

solez par la venue de trois Canots, dans lesquels Monsieur du Pleffis fit embarquer le Pere Dauost, & deux de nos François, avec vne vigilance incomparable, comme m'escriit le Pere. A quelque temps de là vindrent encore d'autres Hurons, il plaça dans leurs Canots & hommes & bagage; en vn mot tout ce qui restoit, si bien que trois de nos Peres, & six de nos François, sont montez aux Hurons.

Ils ont trois cents lieuës à faire dans des chemins qui font horreur à en ouyr parler les Hurons, avec lesquels ils vous cachent de deux iours en deux iours de leur farine pour manger aurtour, il n'y a point d'autres hostelleries que ces cachettes, s'ils manquent à les retrouver, où si quelqu'un les desrobe, car ils sont larrons au dernier point, il se faut passer de manger, s'ils les retrouuent; ils ne font pas pour cela grande chere, le matin ils detrempent vn peu de cette farine avec del'eau, & chacun en mange enuiron vne ecuellée; là dessus ils iouent de leur auiron tout le iour & sur la nuit: ils mangent comme

au point du iour, c'est la vie que doiuent mener nos Peres iusques à ce qu'ils soient arriués au païs de ces barbares, où estants, ils se feront bastir vne maison d'escorce, dans laquelle ils viuront de bled & de farine d'inde, de poisson en certain temps: pour la chair, comme il ny a point de chasse où ils sont, ils n'en mangent pas six fois l'an, s'ils ne veulent manger leurs chiens, comme fait le peuple qui en nourrit, comme on fait des moutons en Frâce; leur boisson c'est de l'eau. Voila les delices du païs, pour les sains & pour les malades, le pain, le vin, les diuerfes sortes de viandes, les fruits, & mille raffraichissements qui s'ont en France, ne sont point encore entrés dans ces contrées.

La monnoye dont ils acheteront leurs viures, leur bois, leur mais d'écorce, & autres necessités, sont des petits canons ou tuiaux de verre, des couteaux, des alefnes, des castelognes, des chaudières, des haches: & choses semblables, c'est l'argent qu'il faut porter avec soy: si la paix se fait entre les Hurons, & les Hiroquois, ie preuoy vne grande porte ouuerte à l'E-

vangile, nous dirons alors avec ioye
& avec tristesse *messis, quidem multa opera-*
rij vero pauci: car on vera la disette de
personnes qui entendent les langues.
L'apprend qu'en 25 ou 30 lieues de pays
qu'occupent les Hurons, d'autres en
mettent bien moins; il se trouue plus de
trente mille ames, la nation Neutre est
bien plus peuplée, les Hiroquois le sont
grandement, les Algonquains ont vn
pays de fort grande estenduë. Je ne
souhaitterois maintenant que cinq ou
six de nos Peres en chaqu'une de ces
nations, & cependant ie n'oserois les
demander quoy que pour vn qu'on de-
sire, il s'en presente dix tous prests de
mourir dans ces croix: mais j'apprend
que tout ce que nous auons en France
pour cette mission est peu: comme dont
prendrons nous les enfans, notamment
de ces nations peuplées, pour les nour-
rir & les instruire, las! faut il que les
biens de la terre, empeschent les biens
du Ciel! que n'auons nous tant seule-
ment les mies de pain qui tombent de
la table des riches du monde, pour don-
ner à ces petits enfans! Je ne me plains

point, ie ne demande rien à qui que ce soit : mais ie ne puis tenir mes sentimens, quand ie voy que la fange (que sont autres choses les biens d'icy bas) empesche que Dieu ne soit conneu & adoré de ces peuples. Et si quelqu'un trouue estrange que ie parle en cette sorte, qu'il vienne, qu'il ouure les yeux, qu'ils voyent ces peuples crier apres le pain de la parole de Dieu, & s'il n'est touché de compassion, & s'il ne crie plus haut que moy, ie me condamray à vn perpetuel silence.

Le troisieme d'Aoust Monsieur de Champlain retournant des trois Riuieres où il estoit allé apres le depart de nos Peres, nous dit qu'un truchement François pour la nation Algonquine venant d'auec les Hurons, auoit rapporté nouvelle que le Pere Brebeuf souffroit grandement, que ses Sauvages estoient malades, qu'il ramoit incessamment pour les soulager : que le Pere Daniel estoit mort de faim où en grand danger d'en mourir, à raison que les Sauvages qui l'ont embarqué quitrans le chemin ordinaire où ils auoient fait les chaches de

de leurs viures, auoient tiré dans les bois, esperant trouuer vne certaine nation qui leur dōneroit à manger, mais n'ayant point trouué ce peuple errant qui s'estoit transporté ailleurs, on conjecture qu'ils sont tous, Sauvages & François en danger de mort; veu mesmement qu'il n'y a point de chasse en ce quartier là, & que la pluspart de ces Barbares sont malades, Dieu soit beny de tout. Ceux qui meurent allants au martyre, ne laissent pas d'estre martyrs. Quand au Pere Dauost, il se porte bien; mais les Sauvages qui le menent luy ont desrobé vne partie de son bagage; i'ay desia dit qu'estre Huron & Larron, ce n'est qu'une mesme chose; voila ce qu'a rapporté ce truchement. Les Peres nous escrirons l'an qui vient, s'il plaist à Dieu, toutes les particularitez de leur voyage, nous ne sçaurions pas auoir de leurs nouuelles deuant ce temps-là: si leur petit equipage est perdu ou volé, ils sont pour beaucoup endurer en ces contrées, si esloignées de tout secours.

Le quatriéme, Monsieur du Plessis descendit des trois Riuieres comme ie

l'allay saluër, il me dit qu'il nous amenoit vn petit Sauuage orphelin, nous en faisant present, pour luy seruir de pere; si tost qu'on aura moyen de recueillir ces pauures enfans, on en pourra auoir quelque nombre, qui seruiron par apres à la conuersion de leurs Compatriottes. Il nous dit encore qu'on traualloit fort & ferme au lieu nommé les trois Riuieres, si bien que nos François ont maintenant trois habitations sur le grand fleue de saint Laurens, vne à Kebec fortifiée de nouveau, l'autre à quinze lieuës plus haut dans l'Isle de sainte Croix, où Monsieur de Champlain a faict bastir le fort de Richelieu. La troisiëme demeure se bastit aux trois Riuieres, quinze autres lieuës plus haut, c'est à dire à trentelieuës de Kebec. Incontinent apres le depart des vaisseaux, le Pere Iacques Buteux & moy irons là demeurer pour assister nos François, les nouvelles habitations estant ordinairement dangereuses, ie n'ay pas veu qu'il fut à propos d'y exposer le Pere Charles Lallemant, ny autres, le Pere Buteuxy vient avec moy.

pour estudier à la langue.

V. R. connoistra maintenant, que la crainte qu'ont eu quelques vns que l'estranger ne vint vne autre fois rauager le pays, & empescher la conuersion de ces pauvres Barbares n'est pas bien fondée: puis que les familles s'habituent icy, puis qu'on y bastit des forts & des demeures en plusieurs endroits, & que Monseigneur le Cardinal fauorise cette entreprise honorable deuant Dieu, & deuant les hommes. Cét esprit capable d'animer quatre corps, à ce que i'apprend, void de bien loing, ie le confesse, mais i'ay quelque creance, qu'il n'attend point de nos Sauuages qui entendent la parole de Dieu, & les veritez du Ciel par son entremise, car c'est luy qui nous a honorez de ses cōmandements, nous renuoyant en ces contrées avec la bien-veillance de Messieurs les Associez: Je croy, dis-je, qu'il n'attend point de cette vigne, qu'il arrouse de ses soings les fruiçts quelle luy presentera en terre, & qu'il les goustera vn iour dedans les Cieux. Pleust à Dieu qu'il veist cinq ou six cens Hurons, hommes

340 *Relation de la Nouvelle France,*
grands, forts, & bien-faits, prester l'oreille aux bonnes nouvelles de l'Evangile qu'on leur va porter cette année: Je me figure qu'il honoreroit par fois la nouvelle France d'un de ses regards, & que cette veüe luy donneroit autant de contentement, que ces grandes actions dont il remplit l'Europe; car de procurer que le sang de Iesus-Christ soit appliqué aux ames pour lesquelles il est respendu, c'est vne gloire peu connue des hommes, mais enuiée des grandes intelligences du Ciel & de la terre.

Il est temps de sonner la retraite, les vaisseaux sont prests à partir, & cependant ie n'ay pas encore releu ny interpondué cette grãde Relation, qui peut suffir pour trois années: V. R. iugera par la necessité que i'ay eu d'emprunter la main d'autrui, pour luy escrire que ie n'ay pas tout le loisir que ie pourrois desirer. Je ne sçay cōme cela se fait, que les nouvelles s'escriuent tousiours avec empressement, aussi n'y recherche-on pas tant de politesse que la verité & la naïfueté, mon cœur a plus parlé que mes leures, & n'estoit la pensée que i'ay,

qu'en escriuant à vne personne, ie parle à plusieurs, il se respandroit bien d'auantage.

Encore ce mot, puisque V. R. nous ayme si tendrement, & que les soins nous viennent si puissamment secourir iusques au bout du mode, dōnez nous, mon R. P. s'il vous plaist des personnes capables d'apprendre les langues, nous pensions nous y appliquer, cette année, le Pere Lallemant, le Pere Buteux & moy, cette nouuelle habitation nous separe. Qui sçait si le Pere Daniel est encore en vie? & si le Pere Dauost arriuera avec les Hurons: car les Sauvages ayans commencé à le dérober, luy pourront bien iouër vn autre plus mauuais traict. Depuis la mort d'vn pauvre miserable François massacré aux Hurons, on a découuert que ces Barbares auoiēt fait noyer le R. P. Nicolas Recolect, tenu pour vn grand homme de bien; tout cecy nous fait voir qu'il est besoing de tenir icy le plus de Peres qu'on pourra; car si par exemple le Pere Brebœuf & moy venions à mourir, tout le peu que nous sçauons de la langue Huron-

342 *Rel. de la Nouel. Fr. en l'année 1634.*
ne & Montaignaise se perdrait, & ainsi
ce seroit tousiours à recommencer & à
retarder le fruit que l'on desire recueillir
de cette Mission, Dieu suscitera des
personnes qui auront compassion de
tant d'ames, secourras ceux qui les vien-
nent chercher parmy tant de dangers;
c'est en luy que nous remercions tous
V. R. de son affection si cordiale, & de
son assistance, la suppliant tres-hum-
blement de se souuenir à l'Autel & à
l'Oratoire de ses enfans, & de ses sub-
jets, notamment de celuy qui en a plus
de besoin; lequel se dira confidem-
ment ce qu'il est de tout son cœur.


Mon R. PERE.

Vostre tres-humble & tres-obeissant
seruiteur en N. S. IESVS-CHRIST.

PAVL LE IEVNE.


De la petite Maison de N.
Dame des Anges, en la
Nouvelle France, ce 7.
d'Aoust 1634.

*V. R. Nous permettra, s'il luy plaist, d'implorer prieres de tous
nos Peres, & de tous nos freres de sa Prouince. Nostre
grand secours doit venir du Ciel,*



EA635
L534r







H T